

Gandhi Memorial College Of Education Bantalab Jammu

(त्रुरयतवार साहित्यिक मैग्जीन)

जुलाई - सितम्बर 2011

U.M. College of Education

Raipur, Bantalab

Jammu.

Acc No... 3283 (10)

Dated... 6-6-19...

वार

WITH LOVE TO  
HINDU EDUCATION SOCIETY KASHMIR  
FROM :  
DR. N.L. ZUTSHI, Mumbai





Gandhi Memorial College Of Education Bantala Jammu

# AIKS Annual Meeting





WITH LOVE TO  
HINDU EDUCATION SOCIETY KASHMIR  
FROM :  
DR. N.L. ZUTSHI, Mumbai

वाख - 23

(त्रुरेतुवार अदबी मैग्ज़ीन)

जुलाई - सितंबर 2011

एडिटर

ओमकार कौल

G.M. College of Education  
Raipur, Bantalab  
Jammu.

Acc No.....3283(1)

Dated.....6-6-19

सलाहकार मंडल

शम्भु नाथ भट्ट हलीम

रतन लाल शान्त

रूपकृष्ण भट

सुनीता रैना

व्यवस्था

रमेश रैना

आल इंडिया कश्मीरी समाज

डी-90, सरोजिनी नगर, नई दिल्ली 110023



## वाख - 23

(त्रुरेतुवार अदबी मैगज़ीन)

जुलाई - सितंबर 2011

### पब्लिशर

आल इंडिया कश्मीरी समाज, डी-90, सरोजनी नगर, नई दिल्ली 110023

फोन 24677114, email: aiksnd@live.com

### एडिटर

डॉ० ओमकार कौल, सी -13, ग्रीनविव अपार्टमेंट्स, 33 सैक्टर 9, रोहिणी,

दिल्ली 110085 फोन 9811885545, 27556197

email: [onkoul@yahoo.com](mailto:onkoul@yahoo.com) [vaakh.aiks@gmail.com](mailto:vaakh.aiks@gmail.com)

### हकूक महफूज़

यथ मैगज़ीनस मंज़ लेख वग़ैर, इसतिमाल करनु ब्रोंह गछि लिखॉर्य, तरजमुकार तु ए आई के एसुक इजाज़थ ज़ोरु ह्यनु युन।

कुनि ति (छाप सपुद्यमुतिस)लेखनस मंज़.जॉहिर करनु आमुच्चि रायि सुत्य एआई कै एस या एडिटर सुंद इतिफाक आसुन छु नु ज़ोरुरी।

**कवर पेंटिंग:** गुलाम रसूल संतोष, मायसुम बाज़र १९५५ (courtesy शकील रहमान)

**म्वल :** (देश) अख अंक: 25 रु, सालानु: 100 रु, आजीवन : 1000 रु

(विदेश) अख अंक: 4 डालर, सालानु : 15 डालर, आजीवन: 150 डालर

**इशतिहार:** अंदर्यम कवर : 8,000 रु, पूर सफु: 4,000 रु, ओड सफु: 2,000 रु

च्चबाग सफु: 1,000 रु

चंदु सोज़नुक तु इशतिहारु खॉतरु पताह

ए आई के एस नाद

डी-90, सरोजनी नगर, नई दिल्ली-110023

दिलि न्येंबरिम्यन चेकन गछन ४० रु अलावु आसनि

**जी टी पी: रोशन लाल भट RRR Enterprises**

Plot No: 469, Sector- 4, Vaishali Gzb. U.P – 201010

+919718118282, +919718503047

**प्रस:** Joeffry and Bell Publishers, New Delhi

CC-O. Agamnigam Digital Preservation Foundation, Chandigarh



## यथ अंकस मंज

पनुन्य कथ	ओमकार कौल	5
<b>लेख</b>		
ललि हुंद जमॉलियात	रविंदर 'रवि'	7
कॉशुर वनुवुन	प्रेम नाथ 'शाद'	11
मेखल	अमर मालमूही	19
थालु चूर तु राजदान	महाराज कृष्ण काव	25
<b>अफसानु</b>		
ज़ून डब	रतन लाल 'शांत'	28
गैस बाल	हृदय कौल 'भारती'	29
व्वस्तादन हुन्द व्वस्ताद	त्रिलोकीनाथ धर 'कुन्दन'	36
खताह	ओमकार कौल	39
<b>शॉयरी</b>		
संसार	शम्भु नाथ भट्ट 'हलीम'	42
मॉज मॅछिज	बाल कृष्ण 'सन्यासी'	42
जु गज़लु	मखन लाल 'कंवल'	43
जु गज़लु	सुनीता रैना	44
गज़लु	प्रेम नाथ 'शाद'	45
जु नज़मु	नसीम शफाई	46
ज़ु गज़ल	जगन नाथ 'सागर'	48
कैह वाख	रोशन सराफ 'रोशि रोशि'	49
जु गज़लु	ए० एन 'प्रशान्त'	51
बटन्य	रोशन लाल भट 'रोशन'	53
म्यानि सोपनो	बृज कृष्ण मोज़ा	54



ज्यूठ कुसु	त्रिलोकीनाथ धर 'कुन्दन'	56
सोन म्वलुल सरमायि		
जु वचन	हबु खोतून	58
तरजमु		
माहिम्नापार	शंभुनाथ भट्ट 'हलीम'	58
शुर्य अदब		
खयॉली प्वलाव (पंचतंत्र मंजु)	प्रेम नाथ कौल 'अर्पण'	61
स्वखन डुस		
अख गव आदथ, ब्याख गॅयि हॉल, त्रेयिम गॅयि मान।	रतन लाल 'शान्त'	66
तबसुर		
नोव केंछा मेंछा (शुर्यन बापथ नजुम तु कहॉनी यि) गुलाम नबी आतश	ओमकार कौल	69
जिगरुक मिश, मखन लाल 'कंवल' रोशन लाल 'रोशन'		74
खबर नाम		
(बावु पोश, विचारगोष्ठी, CKLLC फंड, नॅव किताब, यनामु)		75
तुहुंद वनुन		77
(एम के भट, सरला रैना, राजेश कौल, एम के काव, ए एन प्रशांत)		
अख तहकीकी सवाल	पीटर हुक	79
लेखन वॉल्य		80



## पुनर्नय कथ

रावन त्योल छु इनसानस मंज अख त्युथ छरेर पौद करान, युस पुरनु खौतरु इंसान बेकरार छु रोजान। यि बेकरौरी छे नैव्य जजुबु तु एहसास पौद करान, नवि आयि सौचनस पेट मजबूर करान, तु केंचन छु तखलीकी रुजानस वुतिश मेलान। यिमव हालातव मँज्य गुजरान छि अक्सर लूख वारु वारु हालातन सुत्य समजोतु करान, मसलु पनुनि बोज शोज सुत्य अँजरावान तु नव्यन काम्यन कारन कुन लगान। नवि आयि बोज शोज करनु सुत्य छि केंचन हुँदन देमागन मंज तखलीकी एहसासन जायुन लबान। यि ति कैह रावान छु सु छुनु बेयि मेलान, मगर इंसान छु पनुन छरेर बरान तु ब्रौह पकान।

व्यस्थापनु पतु आव कौशरेन यि रावन त्योल कलु नलु वलनु। कांह ति ओस नु अमि निशि मुछि या अमि खौतरु तयार। अमि मंजु नेरुन ओस महाल। खौर हालात ओस्य तिथ्य जि सौचनस समजनस ओस नु वथुय। चिह्य म्वछि मंज रँटिथ रावन त्योल ललुनावान पेयि दव तुलुन्य। यि रावन त्योल सन्योव अँकिस गौरजान माहोलस मंज, यथ सुत्य छावनु आयि।

अमापोज वखुत छु मददगार। यि छु शुमशान वौरागस ति होमरावान। रावन तेल्य द्युत वारु वारु नैविस सौचस जायुन। हालातन सुत्य आव समजोतु करनु। नवि वतु गँयि यलु, खासकर नवि पुयि हुँदि खौतरु। तिमव वँर सख मेहनत तु पोरुख दिल दिथ। मोजू पननि मनु चौरिख बजि बजि डिगरी हौसिल कँरिथ वौत्य कति कोर। वारयाह छि आलमुचन बजन बजन कम्पनियन मंज, तु सरकौरी अहदन पेट। अगर व्वन्य कांह वेछय छे स्व छे तिमन पुनन्य कौशिर प्रजनथ रँछरुन्य। प्रजनथ छे पनुनि माजि ज्यवि सुत्य कौयिम रोजान। कौशिर ज़बान छे सौन्य माजि ज्यव। यि ज़बान हेकि सिरिफ वरतावु सुत्य बरकरार रुजिथ। असि पजि यि ज़बान ज़्यादु खोतु ज़्यादु वरतावुन्य बाकुय कौशरेन सुत्य कथबाथ करनस मंज।

कौशिर ज़बान्य छु बागि बोरुत, बाव्यकार तु म्वलुल अदब ति बागि आमुत। असि पजि अमिच ज़ानकौरी हौसिल करुन्य। येलि अँस्य ज़बान बूलिथ हेकव, अँस्य हेकव यि देवनागरी लिपि मंज पँरिथ तु लीखित। देवनागरी लिपि मंज परुन – लेखुन छु सँहल। व्वन्य छे कूशिश यिवान करनु यि म्वलुल अदब देवनागरी लिपि मंज फिरनुच। यि छे नु आसान कौम कैह। कौशिर ज़बान, अदब



तु क्लचर मरकज़ (अभाकास) छु अथ सिलसिलस मंज़ कूशिश करान। अमि खॉतर छु सरमायि ज़रूरथ। सॉन्य कूशिश छे जॉरी। व्वेद छे यि मरकज़ छापि कैह किताबु जल्द। वाख स मंज़ ति छे कूशिश यिवान करनु कौशरि अदबुक्य नमून पेश करनुच।

रावन त्योल ललुनावान लेछि वारयाहव कौशरेव व्यस्थापित अँदीबव किताबु। यिमव मंज़ु आयि वारयाह किताबु देवनागरी लिपि मंज़ ति छापनु। १९१० पतु छपेयि वारयाह तिम किताबु ति यिम ब्रौह आसु लेखनु आमचु मगर छपेमचु आसु नु। वारयाह नँव्य अँदीब तु तिहुंज़ु किताबु आयि बारसस। वारयाह मज़हबी किताबु तु लीलायि सौबरनु छपेयि देवनागरी लि पि मंज़। वारयाहन किताबन हुंघ अनुवाद आयि करनु तु छापनु। यिथुकुन्य छे व्वन्य वारयाह सामग्री देवनागरी लिपि मंज़ दँस्याब। सॉन्य नँव पुय यिम नु फारसी लिपि छि ज्ञानान हेकन यिम किताबु पँरिथ।

ज़बॉन्य तु अदबस छु क्लचरस सुत्य सौन वाठ आसान। ज़बान हेकोन नु क्लचर निश ब्योन कँरिथ। असली छु क्लचर तौतताम ज़िंदु रोज़ान, यौतताम ज़बान रोज़ि। अगर ज़बान वरतावस मंज़ रोज़ि नु क्लचर ति हेकि नु दँरिथ। क्लचरस मंज़ छे सॉन्य व्वथुबेठ, रहन सहन, समौजी रसुम रेवाज, मज़हबी रेवौयच वग़ाँरु शौमिल। व्यस्थापनस दोरान वौत सौनिस क्लचरस ति वारयाह ज़ख। अँकिस गॉर कौशरिस माहोलस मंज़ आयि वारु वारु सान्यन रसुम रेवाजन मंज़ वारयाह तबदीलियि। जान चीज़ पानुनावुन्य छि जान, मगर कैह बुरु रेवौयच नु। यि छु ज़रूरी ज़ि नँव पुय गछि। पनुनि क्लचरुक्यन सारिनुय पहलुवन सुत्य ज़ौन्ययाब आसुन्य। अमि खॉतर छि क्लचर रीडर बनावुन्य ज़रूरी। यिमन क्लचरुक्यन पहलुवन पेट गछि खुलु दिलु बहस करनु युन। असि पज़ि बोज़ शोज़ करुन ज़ि अँस्य किथुकुन्य हेकव पनुनि क्लचरुक्य जान चीज़ रँछरिथ।

यिथुकुन्य छु असि ब्रौहकनि सारिवुय खोतु बोड मसलु कौशिर ज़बान, अदब तु क्लचर रँछरनुक। असि छु कौशरि ज़बॉन्य हुंद वरताव बोलनस, लेखनस, तु परनस मंज़ बडावुन। नुव पुय प नु निस क्लचरस सुत्य ज़ौन्ययाब करुन्य।

**ओमकार कौल**

एडिटर



लेख

## ललि हुंद जमालियात

रविंदर 'रवि'

लल छे कोसि कज़ाहुक्यन रंगन हुंद पौठ्य पनुनि हुसनु जमालुक्य स्वंदर तु रुपीठ अलंकार तु उपहार ह्यथ दीदमान यिवान। अँम्यसुंद सौरुप तु बावँच बल छु तीज़मान तु मुशकि बँदिजि हुंदि मनस तु आत्माहस फरहथ बखशन वाजिनि सुगँदी हुंद बागि सदा बहार। पदमान पोरिचि अँमिस ललि हरगाह सँहज़ानंद ह्युव बाकमाल आत्मा पनुन अवतार मानि तु यूगियन, मुनियन, तपस्वीयन, रेशन तु सादन हय क्वदरँती तोर अँम्य सुंदि तीज़ुक एतिराफ आसि, तिक्याज़ि लल छे नु सिरिफ अख शिव योगिनी बँल्कि पानु दीवी हुंद अख रूप। खसु प्रकाशमान छे तु नूरॉनी छे। च्वदॉहिमि सँदी अंदर येलि ललि हुंद प्रकाश सपुद यि ओस सु ज़मानु येलि सोन पनुन फलसफ़ (तरक़ शास्तर) ओरुजस प्यठ जोरि ओस मारान। रुहॉन्यतकिस अँथ्य माहोलस मंज़ येलि यि प्रेथेयि तु बडेयि यि लँज अँथ्य फलसफ़स पनुन्यन ओच़ार तु व्यच़ारन मंज़ ललुखल करनि। चूँकि लल ऑस ज़्यनु पानु प्यठय परमार्थचि वति, ल्याहज़ा असरी सौंचनत्रायन तु वखती रँविशन हुंज़ु वावु प्रायि ति द्रायि नु अँमिस अँद्य कैह। यि वाँच तथ मँज़िलस तु कमालस येति बँड्य बँड्य व्यदवान ताम केशान ऑस्य। फिकरि, नज़रि, क्रेयि तु व्यवहारु किन्य ललि हुंद बा सिफत आसुन ओस पानय अँम्य सुंद जमालियात ब्रोंह कुन अनान। जमाल प्रेडि नु तोत ताम न्यबर योत ताम नु अँम्य अँदरु फुलय छॉवमुच़ आसि। जमाल छु रियाज़त, परहेज़ तु श्रूचरु क्यव मरहलव मँज़्य नीरिथ ज़ायुन लबान। ललि ऑस दयि तु ग्वरु कृपा ख्यहय छु वजह ज़ि ग्वरु सुंद वाख तु वचुन बन्यव अँम्य सुंज़ि पदवी तु वयखोरी हुंद आगुर।

ललि हुंदि जमालियातुक अख ग्वन छु अँम्यसुंदिस बिसियार पासल व्यखतितवस मंज़ मूजूद। अमि वुछ गरु ग्रहस्त, दुनियाँवी ल्वह लंगर, परमार्थ, वॉरिव गरिच ऑड ज़ॉड, वखती शहरि आशूब, ज़मानुच रियाकॉरी तु कदरन हुंद छलु छंगरि गछुन ति। लल छि अख ग्वनमाथ ति तु अख फलसँफी ति, यिम दूशवय छि अख अँकिस सुत्य तिथय कँन्य जुडिथ यिथु कँन्य नम तु माज़ अख



अँकिस सुत्य रँलिथ छि। लल द्यदि कोर पनुन्यव खयालव, मुशॉहिदव, तजरुबव तु सोचि परवाज़ि सुत्य पनुन्यन वाखन तु फलसफन म्युल। तसुंदि जमालियातुक छु ख्वहय बोड बारु वसुफ जि तखयुल क्यव आला तँरीन पडावव नीरिथ कोर तमि त्युथ अख संसार उतपन युस स्वंदर आसनस सुत्य सुत्य अख दिवसथल बनान छु। तँम्य सुंज़ि शखसियँच हुंद बजर तु थज़र छु यी जि तमि कँर अख तिछ ऑडरन तयार यथ मंज़ प्रथ कैह छु। तसुंद वाख छु नु सिरिफ अकी कॉलिबु मंज़ु नेरान बँल्कि छि तस ब्रॉह कनि आँथु रोस कॉलिबु मॉर्य मंघन वाखन थुरान छि। तँम्य सुंद वाख छु नु कुनि मोजूहस मातहथ तिक्याज़ि तसुंद खयाल छु नु कुनि खास न्वखतस तॉबीन रोज़ान बँल्कि छु यि अख spontaneous flow आसान। यि छु अख गॉर मनसूब बंद impulse आसान। यि छु तसुंदुय तखलीकी मेराज जि स्व वाँच तिमन ऑविल्यन तु ज़ाँविल्यन रमूज़न यिहुंज़ कलपना करुन्य स्यठाह मुशकिल छे। तमि दूँछुराँव्य यिम रमुज़ तु येमि स्नेश्टी हुंद सत ओनुन ब्रॉह कुन। यि मेराज ह्येकि ललि हिव्यसुय अँज़ीम ग्वनमातस बागि यिथ। तसुंद फन तु यकसोई छे तसुंदिस बावँच बलस यीच शक्ती अता करान। यि छु लली पोशतु जि तसुंद अख अख वाख छु अख अख अनमूल मगज़न आयतन थावान। ललु वाखन हुंदि जमालियातुक अंदाज़ु ह्येकि येमि हँकीकतु सुत्य करनु यिथ जि स्व यिम ति जज़बु तु एहसास ह्यथ यिवान छे तिम छि नु आम फहम बँल्कि तिमन एहसासन तु जज़बन अंदर छु इन्तिहॉई सन्यर तु शिदत। तु यिम जज़बात तु एहसासात छि सॉन्य ह्यस आवरावान।

ललवाखन हुंज़ पयकर तराँशी छे कॉबिलि दीद। अख अख वाख छु जमालियाँति पयकरन हुंद अख लामिसाल नोमून। यिमन वाखन हुंद मिस्रु योदवय ब्योन-ब्योन छि मगर पतो लाकन छि त्युथ तॉसुर पॉदु करान जि च्वशवुन्य मिसरन हुंद अछ्यन रिशतु छु अख हँकीकथ बनान। ललि हुंद फन छु अँम्य सुंघन वाखन हुंद त्युथ वरदन युस हर हमेशि नोव तु सॉदुरवार छु बासान। हताकि द्वबि द्राव ति नु। लल फिकरि तँर्यतन काँसि या न मगर अँम्य सुंद गंडुल अध्यन छु अँमिस तु अँम्य सुंघन वाखन लाज़वाल बनावान। यि छे अख बँड बारु खूबी। ललि हुंज़ म्यकनातीसी कँशिश छे येमि हँकीकतुच गमाज़ जि अँम्य सुंद जमालियात काँतिहान छु मूहित करान।

लल वाखन युस गँहनु हुसनु जमाल अता छु करान सु छु यिमन हुंद साज़ुत तु मूसीकी। यि साज़ुत छु यिमन अख फरहत तु ताज़ुगी बखशान। वाजि हुंदि



ક્રાંતકૃત્ય પાંઠ્ય છુ ઍમ્યસુંદ અખ અખ લફઝ દુરદાનુ તુ મ્વલુલ લાલ, ગૌહર યિમન લફઝન હુંદ ઍંદરિમ સાઝુત છુ પેઝ્ય પાંઠ્ય જોદ કરાન। સુ જોદ યુસ positive energy પાંદુ છુ કરાન। જમાન-મકાનક્યવ બનવ આઝાદ લલ વાખ છિ તિછ અખ શૂબ ય્વસુ કૉર્ય યસ મુખતેલિફ વસફવ સુત્ય અલંકૃત કરાન છિ। લલ છે પેઝ્ય પાંઠ્ય અખ તિછ કમાલુચ મુસવિર તિ ય્વસુ પનુન્યવ અલફાઝવ સુત્ય બેમિસાલ વાખુ પેટિંગુ બનાવાન છે। દરઅસુલ છુ લલિ હુંદ દૉંખલી દુનિયાહ મૉર્ય મૉદ। યાહે અથ અંદર કુચ્ચ કશમુકશ ઍસ્યતન, કુચ્ચ જિદુજહદ ઍસ્યતન, કમ દૂલાબુ ઍસ્યતન યા કરુબ ઍસ્યતન તુ ય્વહય ઍંદરુની મસબત attitude છુ જૉંહિરી વ્યવહારસ મંઝ સૉંતુ ફુલય છાવુનાવાન। લલ છે યિ જૉંતી પનુનિ બર જસ્તુગી તુ બાગિ બેરતિ અનહારુ સુત્ય બાવેચ્ચ બલસ વુસવૉરી અતા કરાન તુ ઈમતિયાઝ બરખશાન। લલિ હુંદિસ જમાલિયાતસ યુસ બ્યાખ અખ પહલૂ થઝર અતા છુ કરાન સુ છુ ઍમ્ય સુંદ નોવ બામુન અનુન તુ અથ ચૂનિ જરનિ। કમુ તશબીહ તુ તરકીબુ છે અઝ તિ તિછ ખૂબસૂરથ યિછુ યિમ પનુનિસ વખતસ મંઝ આસુ।

(પહલિ રોસ ય્વોલ ગછુન), (ક્રૈંજિલિ પોન્ય), (લતન હુંદ માઝ વતન લારુન), (પોત ઝૂનિ વેંથિથ મોત બોલુનાવુન), (કહન ગાવ રાવુન્ય), (સ્યેકિ લવર વુઠુન્ય), (મંઝ બાઝરસ કુલફુ રાસ વાન ગછુન), (નાબુદ્ય બારસ અટુ ગંડ ડચોલ ગછુન), (વાખ તુ વચુન ગછુન), (શુન્યસ શુન્યાહ મીલિથ ગછુન)। (બેરંગ રંગ કૈંરિથ ગછુન) હિવ્ય દેંપ્ય છિ પનુનિ હર સાતુ લગહાર આસનુક પાનુ સોબૂત દિવાન। લલ છે પનુનિ જમાનુચ હિસાસ કવિતાકાર। તમિ છુ સુય લફઝ ગોરમુત, ચોરમુત તુ કામિ લોગમુત યુસ situation નિ સુત્ય અમલ દખુલ થાવાન ઍસ। અસરી મિઝાજિ મુતાંબિક છુ તમિ લફઝુ રાશ બારસસ ઍનમુત। ઍબ્ય ગોબ્ય, ગૉર માનૂસ તુ ના લગહાર શબદવ નિશિ છુન પરહેઝ કોરમુત। કૉશિરિ જબૉન્ય હુંઝ યિ નગમુ કારહ છે તિથ્ય શાંદાર લફઝ વરતાવસ અનાન યિમ વાખન મોતબર તુ ઍંઝીમ બનાવાન છિ। રાવન ત્યોલ, રતુન દીપ, ચ્યતુ ત્વરુગ, હલૉંદ્ય નૉંદ્ય રસ, ચિતા મૂહ, નહંગય નચુન, કરતલ પાલુન્ય, ગાલ ગંડુન્ય, બોલ પડુન્ય, ઍંદરયુમ ખાર્યુક, સેંહઝ વ્યચારુન, ગ્યાનુ મારુગ, હૂટ બટ, લોલુક વ્યખુલ, વ્વપદેશ, દેંલ્ય ત્રાવુન, દિહ, શેશ્ય કલ, પ્રકાશ થાન, બ્રહ્માંડન, દમન હાલ, ગ્યાનુ અમ્બર, સતુચ ગનટા, બેત્રિ અલફાઝ વરતાવસ ઍનિથ છે લલ વાખન હુંદિસ જમાલિયાતસ મેંઝીદ બોશ યારાન। લલિ હુંઝ બેંડ બારુ ય્વબી છે બુથિસ પ્યઠ કથ વનુન્ય। સ્વ છે નુ કિંહી તિ



नखटान। तँमिस यि दीदमान यिवान छु स्व छे तथ प्यठ ज़ोरुर कैह नतु कैह  
वैनिथ गछान।

ललि हुंछ खयाल छि मीठ्य तु मोदुर्य, रंबुवुन्य, वुशनेरदार तु ज़ोरदार। यिम  
कॉर्य यस मूहित निथ तथ संसारस वातनावान छि येति तस असली पज़र छु  
अँछन ब्रोंह कुन यिवान।

चूँकि ललि ओस बोध, शिव, सांख्य तु वैष्णो बेत्रि फलसफन हुंद कोबूल  
प्रोवमुत अमी तु युस उधयन तु माहरथ तस हॉसिल छे सु छु तसुंदि  
जमालियातुक थँर कौंड। ललि हुंदि जमालियातुक खास ग्वन छु यि ज़ि स्व छे नु  
फलसफु दगान तु न वाज़ परान बैल्कि छे स्व पनुन वंदु तजरुब बावान। तु कॉर्य  
यस छे यि पनुन्य कथ बासान। लल ऑस आदि कालु प्यठय परमार्थुचि वति  
लँजमुच। तु य्वहय परमार्थ बन्योव अँम्य सुंज़ि ज़िंदुगी हुंद निशात फराहम करन  
वोल साजु सामान तु अमी कोर तस व्यकार, बजर तु थज़र अता।

रुहॉनी वातावरनस मंज़ लसनस बसनस द्युत अँमिस sublimation नुक  
मुकाम। लल छे येमि हँकीकतुच गमाज़ ज़ि येमी पनुन पान परज़ुनोव तँमी  
परज़ुनोव बगवान ति। ललि हुंद शॉयिरी जमालियात छु सु scent मुशकावान येमि  
सुत्य प्रथ कांह मोतर तु महफूज़ छु सपदान।

लल छे सानि हँकीकी कॉशिरि मीरासुच ड्यकु टिकु। ललि हुंद जमालियाँती  
शऊर छु सानि तखलीकी तु इखतिराँई बैसीरतुक गाशुर मीनार।

शायिदुय आसि त्सुथ कांह नकाद युस ललि हुंदिस अजमॉली शऊरस थँर  
खारि नु। लल छे रचनाकार तिथ्यन बॉरीक व्यचारन तु रमूज़न हुंज़ यिम  
unearth तु unfold करनु पतु खॉलिकि कायिनात सुंज़न असली व्वपदॉयिशन  
ज़ानुनच तु परखावनुच तहरीक छे मेलान। तु मनुष पनुनिस मँज़लि मकसूदस  
प्रावनस मंज़ कामियाब छु सपदान।

“कॉशिरि सुत्य छि अँस्य कॉशिर्य सॉरी, नतु छि वॉरानुक्य हॉरान काव।”  
अमीन कॉमिल

कॉशिर ज़बान तु संस्कृति रँछिव। यि छे सॉन्य प्रज़नथ।  
शुर्य हेछनॉव्यूख यि ज़बान। यि छे सॉन्य बँड दवलथ।



लेख

## काँशुर वनवुन

प्रेम नाथ 'शाद'

लुकु अदब छु कदीम इनसॉनी समाजन इनसॉनी तहज़ीबन तु रस्सु रयवाजन हुंद आँनु आसान। यि छु कोमन हुंदि कलचरुक नुमायंदु तु तरजुमान। काँशुर लुकु अदब ति छु बागि बोरुत मानि सोव तु शिहुल। यि छु कॅशीरि हुंदि बख़तावार पथ कालुक अमानथ दार तु पोज़ तरजुमान। लुकु अदब छु लुकु शॉयिरी हुंदि खज़ानु सुत्य मालामाल यथ मंज़ ग्यवन बाँथ, हिक्चि बाँथ, खांदर बाँथ, वीग्य वचुन, रोव या रोफ, मेखलि वचुन, दानि मुनुनुक्य बाँथ, लडी शाह तु वनवन वचन बेतरि शॉमिल छि।

बु करु यथ लेखस मंज़ काँशिरि वनवनुच कथ। वनवुन छु सानि शॉयिरी हुंद सु अंग युस हमेशि खांदरन खुंदरन हुंदन तमाम रसमन तु रयवाजन दरशावान छु तु ब्योन ब्योन रसमन तु संस्कारन हुंद सूरति हाल अँछन ब्रोंह कुन अनान छु। वनवन हुरयन हुंद शज़र मेछर तु सहल लफज़ वरताव छु बोज़न वाल्यन ज़ेहनी सौकून तु शॉती अता करान। काँशिरिस वनवनस मंज़ छु प्राचीन ज़मानु प्यठ अज़कालस ताम पनुन मखसूस रंग तु आहंग काँयिम। अथ अंदर छु जुव ज़ेतु, अख रफतार तु अख शिनाख्त मूजूद। आम तोर छु ग्यवुन आवाज़ि सुत्य साज़ आसनुच मंग करान अमा पोज़ काँशुर वनवुन छु खॉलिस तु साज़ रोस्तुय आसान। अथ छे पनुन्य अख मखसूस लय।

काँशिर फोकलोरुक्य माँहिर त म्वहकिक गुलाम नबी आतश साँबन छु पनुनि लुकु शॉयिरी किताबि मंज़ काँशिरिस वनवनस तफसीलु सान वखनय तु व्यछनय कॅरमुच्च।

कॅशीर छे पथ कालु प्यठय मुखतॅलिफ तहज़ीबन हुंद संगम रुज़मुच्च। हिंदूमत प्रथ्योव, बुदमत वोत ओरुजस तु च्वदाँहिमि सी मंज़ वोत कॅशीरि मंज़ इस्लाम।

कॅशीरि मंज़ छि वारयाह रसुम तु रयवाज बटन तु मुसलमानन मुशतरक़ तु रलुवन्य यिमान मंज़ कोशुर वनवुन ति छु।



बटु वनवनस छु वुनि ति वेद मंत्रन हुंद आहंग सृत्य तु मुसलमान वनवनस मंज छे हतुवाद वॅरियन हुंज लुकु लय मूजूद। यि अमल छे मुलु तलु कुनी अमा सूरॅच छेस अलग अलग। दपान पथ कालु आसु बटनि तु मुसलमान ज्ञनानु खांदरन खुंदरन अलावु बेयि ति वारयाहन रसमन प्यठ वनुवान-मिसाले ज़रु कासनस, कन च्वम्बनस, दपनि यिनस, मसालु चेटनस, ज़्युन चटनस तु फालवुनस। वरदन सुवनावनस, माहरेनि डूल्य वातनस, लॅगनु चीरि, सालु मॅहनिविस तु वुरु लागनस बेतरि। यिमन मोकन प्यठ ऑस्य हख हमसायि सोम्बरावनु यिवान, शाँदियानु ति करान तु साल ति करान।

ज़रु कासनुक रयवाज छु वुनि ति बटन तु मुसलमानन मंज मूजूद। मुसलमान छि नेचिविस तु कोरि द्वशवुन्य ज़रु जकासान। ज़रु छि वनान शुर्य सुंदिस ज़ा मसतस। कन छि कोर्यन बटु तु मुसलमान द्वशवय ल्वकचि वॉसि मंजुय च्वम्बान। मसालु ओस गरुनुय मंज कंजन मंज चेटनु यिवान। खांदरु बापथ ज़्युन चटनुक द्वह ओस वाज़ु यिवान लागनु। वरदन सुवनावनु बापथ ओस सुच गरु यिवान अनुनु। यिमन सारिनुय रसमन प्यठ छु नु व्वन्य वनवनु यिवान। मगर वनवन हुय आयि नु मनसावनु। अलबतु छि येनिवॉलिस मंजम या लॅगनु करनु वखतु यिम हुय ति कनन गछान।

ज़रु कासनस आसु बटनि यिथु कॅबन्य वनुवान :

ज़रु काँसिथ द्राख ओबरु तलु सिरियो  
गोबुर छुख वासदीव राज़ोनय  
सरु की पम्पोश दूर्य गयि ताज़य  
ज़रु माहराज़य लॅसीनय

मुसलमान ज्ञनानु आसु ज़रु कासनस येमि आयि वनुवान :

बेसमिला कॅरिथ ज़रु कासॉयो, इसमे-अज़ुम परॉयो (या)  
मॅग्यमति गोबरो ज़रु कासॉयो, बडु कासॉयो वज़हदार

बटु तु मुसलमान ऑस्य कोर्यन कन च्वम्बनस वनुवान। मुसलमान ज्ञनानु आसु यिम हुय वबनान :



कन च्वम्बेये साहबजॉदी –सॉन्य शाहजॉदी बोज़ि वनुवोन

खांदर मेखलि या खतन हॉज ब्रोंह कैह छु हख हमसायन यारन  
दोस्तन तु अंगन ऑशनावन अथ व्वछबस मंज़ शिरकथ करनु ख्तर दावथ  
यिवान दिनु। अथ छि दपुन वनान। दपनस छे मुसलमान ज़नानु यिम हुय वनानः

दपुने द्रायखय पनु निस पूरिस  
दपुवन्य अँनिथय दूरिस कथथ  
दपुने द्रायखय हाकु पचि मँज़िये  
काकु देद्य यँज़मन बाँयिये

तु बटनि येमि आयि वनवानः

दपुने द्रायखय जंगि कुसुय ओये  
मंगला दीवी तु नंदकीश्वर

यि हुर छे द्दशवय बटनि ति तु मुसलमान ज़नानु ति वनानः

दपुने ग्वडु च़,य माल्युन च़ायिखय  
सति सिनि वँरहॉय ज़ियाफत  
नून, च्वचि,अत-गथ तोरु ह्यथ द्रायखय  
दँपिथ आयिखय बांदौवन

मसालु च़ेटनस ऑस्य यिम हुय वनानः

ल्यँदुर बाँदियानु थाव मचन बँय बँरिये  
यँज़मन बाँय रंगु च़ँरिये लो (या)  
ऑलु तु दालचीन लॉलु छि च़ारान  
दुनिया दारन कोरि येनिवोल (या)  
मसालु दगुयो स्वनुव्यन कंज़न  
रवपुव्यन परिन्यन छानाँयो

ज़्युन च़टनस तु फालवनस ऑस्य यिम हुयः

स्वनु सुंज़ि मकच़े रवपु सुंद आरय  
ज़्युन च़टनॉव्यज़्यम वारु वारय

तोमुल छ़टनस छि अज़ ति यिथु वँन्य वनुवानः

ऑविल्यन शुपिनुय तोमुल छ़टॉयो  
क्यँसुर वटॉयो लछटले सुत्य



माहरेनि माहाराजस वरदन सुवनावनि आँस्य तेलि सुचस गरय अनान तु तँती  
ओस सु पलव ति सुवान तु रोज्ञान ति।:

वरदन ओनमय दिलि हुँदि वानय

गिलि हुँद्य थॉविज्यस निशानय

वुर लागनु द्वह ति आँस दोह्व द्वहस व्वसु द्रवसु आसान तु ज्ञनानु आसु वनुवान:

वुर लागॉयो लबि देंरियावस—यिवुनकिस यावस दस वोथुयो

व्वन्य करु बु तिमन रसमन तु रयवाजन हुंद ज़िकिर यिमन प्यठ अज़कालस मंज़  
ति वखती तबदीलियव बावजूद ज़ोकु तु शोकु सान वनुवनु यिवान छु।

वनुवन बटन हुंद आँस्यतन या मुसलमानन हुंदद्वशवुन्य हुंद सकाफँतीआगुर  
छु कुनुय। व्वन्य गव तवॉरीखी तबदीलियव किन्य युस लिसॉनी बदलाव तु आहंगु  
बदली अथ बागि आयि तमिच निशानदिही करुन्य छि ज़ोरुरी। बटु वनवुनिस मंज़  
छु देवमालायि हुंद बरपूर इज़हार युस अथ मुसलमान वनवनु निश ब्योन कडान  
छु। देवमालायि हुँदि इज़हार रोस छि वारयाह वनवनु हुयं तिम ति यिम बटु तु  
मुसलमान द्वशवुन्य मंज़ मुशतरकु छि। ब्याख फरख छे ज़ोरुर ज़ि बटनि छे  
वनवनु हुयं कलासिकी आयि ज़ेठुरॉविथ या वनव तॉथ गँडिथ वनान तु हैँजे तु  
शोकलाम लफज़व सुत्य शोरु करान। तथ मुकाबल छे मुसलमान ज्ञनानु छोट  
छोट तु वुछु सान वणवान तु बिसमिला सुत्य शोरु करान। मिसाले बटनि छि  
वनान:

हैँजे—शोकलाम कॅरिथ वनुवनु ह्योतये —श्वब फल द्युतये माजि भवाने  
तु मुसलमान छि यिथु पॉठ्य वनुवान:

बिसमिला कॉरिथ ह्योतुय वनुवनुय —साहिबन अंजाम ओनुये  
कॉशिर्यन लुकु बॉतन हुंज़ि मकबूलियँछ हुंद बोड वजह छु ज़ि यिम छि समॉजी  
तकरीबन हुंद लॉज़ि हिंसु करार दिनु आमत्य, मेखल आँस्यतन या  
मॉज़िराथ।खतन हाल आँस्यतन या खांदरस सुत्य वाबसतु कांह तकरीब वनुवनु  
छु अम्युक लॉज़िमी जुज।

बटु लॅडकस येलि मेखल करुन्य आसि अथ मोकस प्यठ छि गरुनावय, दपनि  
नेरुन, कनि श्रान, क्रूल खारुन, मस कासुन, दिवगोन द्युन, मॉज़ि राथ पतु योनि  
त्रावुन तु आँखरस क्वशल हुम हिव्य रसुम अंजाम यिवान दिनु। यिम सॉरी रसुम  
छि मेखलि तु क्वशलहुम वरॉय लॅडकु या कोरि खांदरस प्यठ ति पूर यिवान  
करनु।



खांदरु ग्वडु छि बटु ति तु मुसलमान ती माहरेनि मस मुचतावान। अथ मोकस  
प्यठ छु यिथु पॉठ्य वनवनु यिवान।

मुसलमान वनुवुनः

हूरन तु पॅरियन अथि वनुनावय - रुमु रुमु मस मुचरावोये (या)

कलु प्यठु वालतय जॅरी टाकॉनी—पॅरी क्या गामुच नुंदबॉनी  
तु बटु छि वनुवानः

कंगने चानि छी स्वनु सुंद्य बॅरिये—गहॉरिये वोतुय व्यवाह कार (या)

रुम छी ज़ाँविल्य सुम स्यॅज द्रायी—शारिका आयी वॉकु पारुने

मुसलमान छि खांदरस प्यठ माहरेनि या माहराज़ सुंदिस श्रान करनस आब शेरुन  
वनान तु बटु छि मेखलि या खांदरस प्यठ लॅडकस या कोरि हुंदिस श्रान करनस  
कनि श्रान वनान। वुछतव अमि रसमुक्य खूबसूरथ हुर्यब। मुसलमान छि वनुवुनः

आबय टठलिस खोर वोलूथो—स्वनते महम्मद पोलूथो

वुन्युकताम ऑसुस चॅनय तल कॅन्यये—अज़हय कूर्य द्रायख डेकु प्रेनिये  
या

बाबन ओनुनय साबनि ब्वक्सय - यिना मल अकसय रोज़ीयो

बटु वनुवुनः

स्वनु सुंज़ि पीरे रवपु सुंद्य सॅग्ये - व्वथी मानुरेनिये कनि श्रानस (या)

आमे द्दुद सुत्य गरु गरु करुयो - ज़ामुते द्दुद सुत्य तन मलुयो

तेलि ओस माहराज़स खोरि सुत्य सौरुय मस कौसिथ टिनि कलु बनावनु यिवान।  
मगर व्वन्य छु नु ति सपदान बॅल्कि गोल कटॉय करान तु बस। पोज़ वनुवन हुर्य  
छि अज़ ति कौयिम। मुसलमान वनुवुनः

मस कासॉयो ऑनु हावोयो - ज़ाँनु शाह सॉबुने मरीदो

बटु वनुवुनः

नॉविद दपान क्या करु तौमलस—मे गछेम दुसु तय जोरे शाल

खांदरु ब्रोंह छि बटु तु मुसलमान द्दुशवय लिवान डुवान तु सफॉई करान। बटु छि  
गरु दारस चूनु सुत्य लिवान अथ पतु द्दुशवुन्य तरफव खूबसूरथ गुलकॉरी रंगव  
सुत्य करान। अथ छि कूल खारुन वनान।

बटु छि अथ यिथु पॉठ्य वनानः

कूल खारॉनस ज़ंगि कुस ओये- परमीर तु पारवती मॉज (या)

कूल खोरुथय कूलत गॅरिये - नर्यन कुंदनदार कॅर्ये छी



बटु छि लँगनु ब्रोंह दिवगोन दिवान। कोरि दिवगोनस छु यिथु वॅन्य वनवनु यिवान:

दिवगोनस ब्यूतुख गोर तय पानय - स्वनुसुंघ बानय वाहरावसे  
मॉज़ लागनुच रसुम छि दशवय बटु ति तु मुसलमान ति अंजाम दिवान। कूर  
आसि या गोबुर मॉज़ लागुन्य छे ज़ोरूरी। यि छे रातस मंज़ लागनु यिवान तवय  
छि अथ “मॉज़ि राथ” वनान। मुसलमान छि मॉज़ि यिथु पॉठ्य वनुवान:

मॉज़े मजमन म्वखतु छुय अंदनुय - असि वोत त्रोट तय चंदन-हार  
मॉज़े प्यठु कनि स्वनु सुंद बादम - नज़रे आदम दूर गॅछिनाँय  
मॉज़े डुलिसुय अँद्य अँद्य खॉसी - वलय व्वन्य मॉसी लोल बरुसे  
तु बटनि छे यिथु पॉठ्य वनुवान:

मॉज़ लागॉनस ज़ंगि कुस ओया-मंगला दीवी तु नंदकीधर (या)

प्वफु जिगुर छेय सॉ म्वछि मॉज़ लागान

पनुन्य मॉज छेय सॉ क्वछि ललवान (या)

पादशाह बागस द्युतमय वोनुये-छॉडिथ ओनमय मॉज़े पोश  
मेखल या योनि त्रावुन छु बटन हुंद अहम रसुम। अथ सुत्प छि त्वकुट्य  
त्वकुट्य वारयाह संस्कार वाबसतु याने अँगनु क्वंड, ककलुश, मंडुल, टैक्य  
पूच, ट्योक करुन, नॉर्यवन गंडुन, तु व्यूग त्रावुन बेतरि। बटु वनवनस मंज़ छि  
यमिन सारिनुय रसमन रयवाजन हुंज़न वखनय तफसीलु सान मेलान। प्रथ मोकु  
खॉतरु छि वनवन हुयं तु वखनय मूजूद। वुछ तव यिम हुयं:अँगनु क्वंडस:

क्यँसरि कनि क्वंग तय पानि कनि अमरयथ-

सोम्बरिथ खोरमय अगनय क्वंड

नॉर्यवन खारनस:

कृष्ण मेखले गॅडुथ सरदॉरी -तलय वनहॉरी नॉर्यवन हाव

कलशस - अर्शि वॅथ्यमुते अर्ज़न दीवो-फरशस प्यठ कर कलशस जाय

ट्योक करनस:

वासुदीव राजुने गुयं गंड बागस - बडि ब्रहमनु कर दातस ट्योक

मंडुल त्रावनस:

वुछतव गरुजी पनुने अथय - मंडुल किथय खारान छु

योनि त्रावनस:

दीवकी व्योछ, नय सबॉद्रायि कोतुये-योनि सूजूयो नारॉनी



व्यूग त्रावनसः

व्यूग त्रावोयो सतय रंगय—जंगे ओयो परमीष्वर ।

व्वन्य करव तमि वनवनुच कथ येलि माहराजु होहवुर नेरान छु तु  
निकाह पॅरिथ माहरेन्य ह्यथ वापस यिवान छु । निकाह नामु छु दून बाँचन हंजि  
जिंदगी हुंद मजहबी तोर रिशतु गंडुनुच दसतावेज ।

माहराजु छु होवुर नेरनुच सखर करान तु ज़नानु छे वनुवानः

यारव दोस्तव कोरयो गेरो—व्वथु व्वन्य शेरो चेर हो गोय

होवुर वातनस प्यठ छिस वनुवुन त्रावानः-

गेसुक गाह प्यव ज़ाँविजि मूरे—वुनि हय यौसयफ दूरे छुम (या)

कोरे माँजी तपु तपु चोलुये—नपु नपु करुवुन राजि हय ओय

निकाह परनसः

निकहस बीठी कम कम काँज़ी - कूरी बब चोन राँज़ी गव (या)

निकाह छी लेखान सँतरे सँतरे—क्वंगुचे पॅतरे तु अँतरे सुत्य

माहरेनि सुत्य छे दूदु माँज ति सखरान तु वनुवान छिसः

हतय दूदु माँजी वति व्वलसाँव्यज़्यन - तति करुनाँव्यज़्यन सावेनि तोन

कूर येलि वाँरिव नेरान छे । सु मंज़र छु वाँलिंगि खंजि करनबबोल  
आसान । कमन कमन संग दिलन छु ओश ठेंचि वसान । अमि सातुक वनुवुन छु  
जज़बातन वुतुश दिवान, वुतव यिम कैह हुर्यः

पथ रोज़ बाँबरो यँबुरज़ल नेरी - मुशुक हो फेरी द्यमागस (या)

मालिनिचि कुंज़ु कर माजि हवालु -नेरि व्वन्य वाँरिविकि सवाल्य (या)

डोले चाने स्वनु सुंद कुबु छी -माजि छय वाँलिंगि दुबु फेरान (या)

चसदुकुय हाँव्यज़्यस दिलुकुय बाँव्यज़्यस

बिल्ला छुय मोल माँज मँशराँव्यज़्यस

माहरेन्य छे वाँरिव वातान तु तति छे ज़नानु दॅर्य गॅडिथ यिथ्य हिव्य हुर्य वनुवानः

ओबरय तलुची काचय ज़ूना - अँन्यखय अफलातूनिये (या)

यँज़मन बाँयी ताँर क्या गँयिये - काँर हय लूसुय म्वहर तुलसे

यिथय पाँठ्य येलि बटु कोरि माहराजु यिवान छुबटनि छे यिथु पाँठ्य वनुवानः

म्वलुलुय क्रॉख छुस स्वनु सुंजि वाजे-त्रेन भवनन हुंद राजे आवपाँर्य पाँर्य  
लॅग्यतोस अथ सवारे - माहराजु राजु कुमारे आव



લેંગુન અંજામ યિથ છે કોરિ સખરાવાન તુ વોરિવ નેરનુ બ્રોંહ છે સ્વ મૉલિસ માજિ તુ કરીબી અંગન ઑશનાવન વેંચસત હ્યવાન। યિ છે ડોંઠ હ્યુવ ઑશ ત્રાવાન તુ સારિનુય છુ ઑછન મંજ ઑશ યીરાન। વનવન વાજિનિ છે યિથુ પોંઠ્ય વનુવાન:

દસ્તારસ છય કોસ્તૂર્ય રંછી - ઑછન અંદર રંછી જ્યન (યા)

યેતિ દિચ કવંગ મોંડ તતિ નો તંછિજે - કૂર હો રંછિજ્યન લુકુ હુંદ માલતુ યિથુ પોંઠ્ય છુ ઝાંદરુક સંસ્કાર અંદ વાતાન।

બદલાવ છુ જિંદગી હુંદ વેંતીરુ। રસમન તુ રેવાજન છુ જમાનુ બદલનુ સુત્ય જોરુર અનહાર બદલાન। મગર મજહબી રસૂમાતન હુંજ બુનિયાદ છે મજબૂત આસાન। મન રંજનાવનુક્યન વસીલન મંજ જબરદસ તબદીલી બાવજૂદ છે વનવનસ તીચ ત્વછ જિયિ રોજિ સોંન્ય મન રંજનાવાન તુ પ્રોંન્ય યાદ તાજુ કરાન।

ઑંચરસ પ્યઠ કરુ બુ તિમન દ્વન બટન્યન હુંદ જિકિર યિમવ બટુ વનુવુન પનુન્યન દ્વન કિતાબન મંજ છાપ વેંચિથ મહફૂજ કોરમુત છુ। ઑકિસ ઑસ નાવ સ્વનુ બટની ત્રકરુ ચ્વસુ રૈનાવારી સિરિનંગરુચ ઑસ તુ કિતાબિ હુંદ નાવ છુ કોંશિર વનુવનમાલા દોયિમ ઑસ શ્રીમતી કમલાવતી કૌલ ચ્વસુ યછકૂટ બડગામિચ ઑસ તુ કિતાબિ હુંદ નાવ છુ લોલુ વચ્ચનય~ યિમુ દ્વશવય છે નુ વ્યન્ય યથ દુનિયાહસ મંજ। ઈશર કેંચનચ સ્વર્ગસ મંજ જાય। વુન્ય વુન્ય લોગુમ પય જિ અત્રતનાગુચ બ્યાચ બટન્ય શ્રીમતી લક્ષ્મીશ્વરી કાન્દરુ તિ છે હેંજે નાવુચ અચ વનવન કિતાબ પેંતિમિસ દેંહિલિસ મંજ લીછમુચ। સ્વ છે વુનિક્યન ઑમ નેંગુર ઉદયવાલા રોજાન।

### લેખકન તુ પરન વાલ્યન ઑંપીલ

- ૧ વાચુ ઝોંતરુ સૂજિવ કોંશિરિ જબોંન્ય, અદબસ તુ સંસ્કૃતિ (સકાફતસ) પેઠ પનુન્ય તાજુ લેચ, અફસાનુ, શોંચરી, નચ્ચન કિતાબન હુંદ્ય તબસરુ દેવનાગરી લિપિ મંજ।
- ૨ વાચસ મંજ તબસરુ કરનુ ઝોંતરુ સૂજિવ પનનિ નવિ કિતાબુ યા સોજનાંવિવ તિમન પેઠ તબસરુ।
- ૩ પરનવોંલ્ય સૂજિન પનુન્ય કુમતી રાય ચ્વસ છાપનુ યિયિ।



लेख

## मेखल

अमर 'मालमूही'

मेखल छे कॉशिर्यन बटन हुंज सारिवुय खोतु बॅड प्रज़नथ तु योनि छु अमि प्रज़नॅच हुंज अहम अलामथ। योदवय मेखल ओसूलन कॉशिर्यन बटन हुंघव चोवुहव मज़हबी रसमन मंज़ अख रसुम छे मगर अमलन छु अँम्य अँक्य रसमन त्यूत काड कोडमुत तु सु वाहराव प्रोवमुत जि अकि तरफु छु वारयाह मज़हबी रसुम अँथ्य मंज़ चमान तु बेयि तरफु छे अथ तीच मज़हबी अहमियथ तु समॉजी प्रज़नथ जि अमि रसमु रोस न छु अख लॅडकु बटु बनान तु न कुनि समॉजी या मज़हबी जिमुदॉरी हुंद अहल।

लफुज़ मेखल छु वेदिक मेखला याने मे - ख - ला। अकि तशरीह मुताँबिक गव मे स्व ब्वद येमि सुत्य "ख" याने दय "ला" ज्ञानुनु यिवान छु। अम्युक मतलब गव जि मेखल छु सु शऊर युस ग्वर चाटस दय प्रावनु खॉतर दिवान छु। अवय छु योनि त्रावनु ब्रॉह ग्वर मेखलि माहराज़स शोलूकन मंज़ वनान चु छे म्यानि बबि द्वद तु चेन तिथय पॉठ्य यिथु पॉट्य बु चेनान छुस। उपनिशदन मुताँबिक छि मेखल तथ दरबि रज़ि वनान खसु त्रोगुन्य कॅरिथ रसमस दोरान माहराज़स कम्बरस गंडुन्य छे आसान। यि हलि गंड छु अमि कथि हुंद अलामॅती इज़हार जि व्वन्य छु अँमिस लॅडकस ज़िंदगी हुंघन सन्यन तु व्वगन्यन मंज़ व्वठ छाँठ ति करुन्य तु पनुन्य असलियथ प्रज़नावनुच कूशिश ति करुन्य। मेखल छि तथ दॅरिस पनस ति वनान युस शुरिस कम्बरस छि गंडान तु यथ मंज़ सु ऑठ गिराह खोल तु स्वाद गज़ कपर टुकरु बंद छु सपदान। यथ श्रानु पठ वनान छि तु युस सॅतर पूशी करान छु। अमि आयि छि मेखल ऑट्य पनस वनुनु यिवान। शास्तरव मुताँबिक यस शखसस ऑट्य तु श्रानुपट लॉगिथ आसि नु तँम्य सुंज़ कांह ति मज़हबी अमल छे फोजूल तु सु छु पोशिस बराबर।

मे छु बासान जि आर्यन हुंदि हिन्दोस्तान यिनु ब्रॉह छु मेखलि हुंद रसुम तिमन मंज़ मूजूद ओसमुत तिव्याज़ि ऑट्य पनुक तसवुर छु पारसीयन मंज़ ति मूजूद। व्वं गव अज़ कल छि नु तिम पन गंडान बॅल्लिक ड्वड ऑट खोल अख डोरु।



योताम नु तनि प्यठ तिमन यि हलि गंडुन आसि तिम ह्यकन नु पनुन्यन मंदरन  
अँचिथ तनु न चंद अवस्ता पँरिथ।

अज़ कालस छि मेखलि मुखतलिफ नाव। मिसाले योनि त्रावुन। उपायन याने  
चाटु सुंद ग्वरस निश गछुन। उपनैन याने सु ऑनक येमि सुत्य दूर्युक चीज़  
नज़दीक बासि। मतलब गव सु अऊर येमि सुत्य सॉलिकस दय नखु छु बासान।  
अथ छि गायत्री संस्कार ति वनान याने ग्वर छु महागायत्री मंज़ ब्रह्मचौरिस कनस  
मंज़ वनान तु तमि आयि वादु करनुक तरीकु बावान युथ हनि हनि गॉर शऊरी  
पॉठ्य अँम्य सुंद खसुवुन तु वसुवुन शाह फकत सू-हम-सू शब्द वरतावि तु अथ  
छि अज़पा गायत्री वनान।

मेखलि रसमुक रूह छु यज्ञोपवीत या वनव उप नैन। ग्वडु छु ग्वर तु पतु मोल  
बचस योनि त्रावान। योनि गव सु पन यथ त्रे लरु आसन मगर गंड छुस अकोय  
आसान। अथ गंडस छि ब्रह्म गंड वनान तु अथ छे स्वय अहमियथ खसु सुमरन  
मालि समीरो पँलिस आसान छे। यि पन हेकि योनि छेनिथ कुनि कामि ति  
लॉगिथ मगर गंड ओस आसान या तु ज़ालुन या पॉनिस त्रावुन या कुनि श्रूचि  
जायि थवुन। योन्यस छि ब्रह्म सूत्र ति वनान। कपस कतनु विज़ि पन खालनु तु  
गंड दिनस ताम ओस लगातार लफुज़ ओमुक ज़फ करनु यिवान तु यि लफुज़ छु  
ब्रह्म संज़ अलामथ।

बटु छु फकथ योनि सुत्य प्रज़नथ प्रावान। योनि चि त्रे लरु छे प्रथ द्रुह तु प्रथ  
विज़ि त्रे करज़ु पूर करनुच यादावॉरी करान।(1) यिम त्रे करुज़ छि बुज़र्गन हुंद  
करुज़ (पेत्रु ऋन) योनि त्रावनु पतु छु लॅडकस खानदानचि नेक नॉमी कुन  
तवजह द्युन तु तिम कामि करनि यिमव सुत्य तँम्य सुंदान बुज़रगन हुंद नाव  
नेशनावनु यियि। पँत्यम्यन च्वन पीर्यन ताम छि यिम बुज़र्ग अहम। याने मोल,  
बुड्य बब, बडु बुड्य बब, मॉज, नान्य, बडु नान्य, मातामाल तरफुक्य बुज़र्ग तु  
हश हिहुर ति। (2) रेशन हुंद करुज़ (रैश्य ऋन) अँलिमस, अदबस, सकाफतस  
पोछर द्युन तु पनु निस माशरस मंज़ ज़्यादु खोतु ज़्यादु गाश हुररावनुच कूशिश  
करुन्य, खँदमति खलुक कॅर्य कॅर्य पनुनन पान महज़ समॉजी पापर जॉई हुंद  
वॉसिलु ज़ानुन। (3) देवताहन हुंद करुज़ (दिवुऋन) यि करुज़ छु रूहॉनी रंगु  
पोछर प्रॉविथ नखु वालुन। रूहॉनी पोछर प्रावुन तु पनुन वजूद लबु न छु इनसानु  
सुंद बुनियाँदी मकसद। ग्वडुनिक्य ज़ु करुज़ नखु वालुन सुत्य छे रूहॉनी तरकी  
हुंज़ वथ वारयाह हमवार सपदान।



खांदरु विजि छे लॅडकस योनि चि त्रे लेरु दोगनि सपदान तु योनि छु शु-लोर गछान। अम्युक मतलब गव जि मरदस छु आशनि हुंद करुज नखु वालनुक फरुज ति पूर करुन। यि कथ छे हावान जि प्रानि वखतु कोताह रुतबु तु इज्जथ छु अँकिस ज़नानि ओसमुत। पनुनि गरेलू जिमुदौरी नखु वालन्य ओस ज़नानि खौतरु यिम त्रे करुज पूर करुन्य मुशकिल। तँम्य सुंद वौहिद तु अहम फरुज ओस गरु अकि रूहौनी तु इखौकी लाकमि रँटिथ स्वखु सौव्य मँजिल बनावुन।

मेखल छे सारिवुय खोतु अहम ब्रहमन रसुम। योदवय बाकयव जौ चव मंज ति कैह लूख यि रसुम पूर करान छि तिक्याजि मनू सुंदि वनुन मूजब छु प्रथ कौसि रूहौनी पोछरुक हख। वेदु मुताँबिक छु योनि त्रावनु सुत्य मरुद दोयिम ज़नुम येमी ज़नुम लबान। अथ छि दूज वनान। यि दोयिम ज़नुमय छु मरुद सुंद दुनियाहस युन रथि खारान। तिक्याजि मेखल छे शोद शऊर समौजी रुतबु तु इखलौकी अजमथ प्रावनस कुन ग्वडन्युक मुसतनद कदम।

बटव कोर हर हमेशि मज़हबुक्य बुनियौदी असूल मदि नज़र थौविथ हालातन सुत्य तमि आयि समजोतु युथ तिहुंज स्वरनय ति वज़ि तु गँत्य ति खसन नु। य्वहय वजह छु जि अज़ कल चि मेखलि प्यठ छि तिम सौरी मज़हबी तु समौजी रसुम। पूर करनु यिवान यिमन मेखलि सुत्य कांह तोलुक छु नु। बटन खौतरु छि यिम रसुम बिलकुल तिमय दूह शोरु गछान येमि दूह ज़नान मॉज बननस कुन ग्वडन्युक कदम त्रावान छे। ग्वडन्युक रसुम छु बीज़ संस्कार याने ग्वबि ख्वर रोज़नुक रसुम। प्रानि ज़मानु ओस यि बँरत्रि ग्वडनिक्यन त्रेन रेतन मंज कुनि दूह ति करनु यिवान। यिम रसुम छि ख्वखुर्य आसन वजायि वेदिक रेशन हुंघन समौजी, इकतिसौदी, मज़हबी, नफसियाँती तु रूहौनी तजरुबन हुंज बावथ करान। मिसाले छि तिम अथ कथि प्यठ ज़ोर दिवान जि शुर्य सुंद ज़ेहनी इरतिका छु माजि हुंदिस शिकमस मंज चूरिमि रेतु प्यठ शोरु गछान। माजि हुंद माहोल, तँम्य सुंद सौंच तु तँम्य सुंज वथु बेठ छे शुरिस प्यठ कौफी असर त्रावान। अवय ओस चूरिमिस रेतस मंज समतो रसुम करनु यिवान। यथ मंज माजि हुंद पान, तँम्य सुंद माहोल प्रथ आयि पौरनु शेरनु यिवान ओस। व्वन्य छु मेखलि दूह यि रसुम नौर्यवन खौलिथ तु टेक्य तालु लौगिथ पूर करनु यिवान। “पुन सूहन” युस बचि सौर्यसय ख्वश तु ख्वशहाल बनावनुक रसुम छु ओस पुंन्निमि रेतु पूर करनु यिवान। यि ओस अलामँती यि बचि सुंद शऊर गाशुर तु शीतल बनावनुक संज। पुंन्निमि रेतु आँस कोरि तु शेयिमि रेतु नेचिविस अनु प्रौविश करनु यिवान।



तिव्याज़ि कूर छे लॅडकस खोतु शरीरु रंगु ज़्यादु जलुद फबान। अमि पतु गयेयि ज़रु कासय। तु तमि पतु मेखल याने ऑट्य पन तु श्रानु पठ लागुन तु अमि स्रुत्य ओस शुर ब्रह्मचरी आश्रमस मंज़ अचान। अमि पतु चोतरु होतरक विद्या आरम्ब, यज्ञोपवेत, प्रवरवाथ याने प्रकरँच हुंज़ ज्ञानकॉरी। अमि पतु संद्या त्रिवेदिक याने त्रेन वीदन मुताँबिक सॉरिसुय ज़िंदगी अमल करनुक इरादु, उपान तु उपवर्ग याने रोज़ानु अमल। अरुनु व्रत याने वनवास याने ग्वरु क्वलस मंज़ श्री करुम याने ख्वशहाल बननुक्य तोर तरीकु हेंछिथ यश करुम नेक नॉमी हुंद संज़ करुन तु ऑखरस प्यठ उपनिशद वृथ। यिम सॉरी रसुम ऑस्य कॅशीरि अँकिस द्रहस रातस मंज़ करनु यिवान तु अथ सॉर्यसुय अमलि छु मेखल नाव।

यिम रसुम किथुवॅन्त्य चमेयि मेखलि मंज़ तथ वाश कडनुक छु नु यि मोकु। वँ गव यि इशारु करुन रोज़ि मुनाँसिब ज़ि च्वदॉहिमि सँदी योर कुन न रूज़ बटन स्व ख्वशहॉली, न ज़ेहनी सकून तु न स्व फुरसथ। बडशाह सॉबनि दॅप्य लोग तिमव फारसी परुन तु सरकार्य मुलाँज़िमत बनेयि तिहुंद तकदीर। तिव्याज़ि अथ न ओस फिरनुक खतरु तु न ज़ालनुक। करीबन नमथ फीसद बटु बनेयि कारकुन तिमव कम कलीलु बटव मंज़ यिमव इसलाम कबूल ओस नु कोरमुत। यिमव थोव रसमन हुंद हर तर मूजूद युस पठान दोरस मंज़ बेयिहन म्वच्योव।

मेखल छे तमि दोरुच यादगार येलि शुर्य कुनि जंगलस मंज़ काँसि रेशिस तॉलीमि तु तरबियँच खॉतरु हवालु करनु ऑस्य यिवान। अति ओस सेकु असूलन मुताँबिक सखुत रबतु ज़बतु सान आशरम या वॅन्यूस ग्वरु क्वल चलान। अति ऑस्य तॉलिबि अँलिम परान, कॉम करान तु आशरम चलावनु खॉतरु बेख्यायि ति नेरान। बासान छु ज़ि पठानन हुंदिस दोरस ताम मा आसिहे कॅशीरि मंज़ ति यि चलन। वुह त्रुह वॅरी ब्रॉह ताम ओस किशतवार अलाकु क्यन कॅचन गामन मंज़ यि चलन तु अति छे अज़ ति मेखलि जायि न्यँबरु अबीद रटनु यिवान। बेख्यायि हुंद यि रसुम छु मेखलि अज़ ति ज़बरदस अहमियथ दिवान। अबीद त्रावुन्य छि अख समॉजी दारु होरय या अख रुच अमल ति। 1990 तु पतु योदवय बाकुय रसुम बेयि ति चमान गॅयि मगर अबीदि लोब ज़्यादु चाव तु चलन। गोर ऑस्य वारयाह ब्रॉह पुज़ॉर्य बनेमुत्य तु जलायि वतनी पतु रूद्य नु यिम पुज़ॉर्य ति तु तवय छि यिम व्वन्य रसुम पूरु करनु बजायि अबीद थालस कुनुय यॉच नज़र थवान तु ज़्यादु खोतु ज़्यादु तूल लागान।



बटु छि वुनि नैचिविस मेखल दिन्य कोरि खांदर करुन पनुन अहम तरीन फरज़ ज्ञानान। वुनि ति छु नु सु कांह बटु नज़रि गछान युस यस मेखल आसि नु दिनु आमुच येलि ज्ञन वारयाह परि मचु बटनि अज़ कांदरु रोसतुय छे। नैचिव्य खांदरस छे नु स्व समोजी या मज़हबी अहमियथ य्वसु मेखलि छे।

बटव थॉव्य तिम रसुम ज़्यादु ज़िंदु यिमन मंज़ माशरुक कांह दखुल छु। मेखल छे सु रसुम यथ मंज़ ज़बरदस व्वसु द्रवसु छे आसान। गरनावयि तु साथ रटनु सुत्य छु यि रसुम शोरु सपदान तु अमि द्रह प्यठु छु शामन तुम्बखनारि दस तुलुन ज़ोरुरी। वंशीरि मंज़ ओस गरनावयि हुंद रसुम कैह काल ब्रोंह आसान तु शामस आसु महलुचि या गामु ज्ञनानु मेखलि वाल्यन हुंद गरु वनवुनि तु ग्यवनि गरि बतु ख्यथ यिवान। बाह अख बजे रॉच ताम ओस गिंदुन ग्यवुन आसान युस गरुकुली ज्ञनानि खॉतरु अख रंज़ुवन अख तफरीह तु बोस लोचरावुन ओस। गरुनावयि द्रहय छे यँज़मन बाय मालिन्यन वँर ह्यथ सातु दपनि गछान। तु अँथ्य सुत्य छु दपनि नेरुन तु दपन बतु ख्योन शोरु सपदान। दपन बतु खेनि ऑस्य मेखलि वाल्यन सुत्य वारि वारि तिहुँद्य अंग ऑशनाव तु यार दोस ति आसान। अमि पतु गँयि मॉज़्यराथ, दिवगोन तु मेखल। बटु छि फितरतन माज़ खेनु वॉल्य मगर मेखलि प्यठ ओस नु आम पॉठ्य माज़ रनुनुक कांह चलन। तिक्याज़ि माज़ ख्यथ अबीद त्रावुन्य छु पाफ मानुनु आमुत। अमि किन्य ओस मेखलि दोयिमि द्रह क्वशल हुम करनु यिवान युस माज़ ख्यनु किस रगबतस रंज़ुवान ओस। क्वशल हुम छु माज़ खेनुच बटु रेवायथ तु तांत्रुकुच प्रज़नथ ति यथ मंज़ शिव सुंद बहसियति बैरच तसवुर ति छु। क्वशल हुम गव अँमिस बैरवस कारि खॉर रुत्य पॉठ्य अंद वातनावनु खॉतरु बोग द्युन युस तँहर चरवन तु शुशनोर आसान ओस। आसन वॉल्य ऑस्य क्वशल हुमुक द्रह माज़ साल ति करान मगर आम पॉठ्य छे व्वन्य तँहरुय यॉच करनु यिवान।

मेखलि प्यठ छि मातामाल दुर्य बतु च़ानान यथ मंज़ माहराज़स, तँम्य सुंदिस मॉलिस माजि, प्वफन तु नानि बुड्यबबस तु प्यँतरन पेचिन्यन खॉतरु पलव दलव ति आसान छु। गुलि म्यूठ छु करनु यिवान। माम तु मासु छि अकि तरफु कुसमु कुसमु चायि करान तु बैयि तरफु छे प्वफ मिठायि, म्यवु बेतरि किमामु सान बॉगरान। प्रानि वखतु ऑस्य फकत गारि आटिक्य शकर पारु बॉगरनु यिवान मगर अज़ छु प्रथ दौर पनुन्य शान वखरु वखरु पॉठ्य हावान।



योदवय नॉर्यवन खारनस व्वन्य कांह फिकरी त्वछ तु नफसियाँती इफॉदियत छे नु मगर तोति छु यि रसुम माहोलस हना जमालियाँती रंग दिवान तु नॉर्यवन वाजिनि हना बोश तु चाव। शायद अमि मूजूब जि तॅम्य सुंद बॉच छु तस सारिनुय थिय पानस नखु रॅटिथ कनस या लठरिस मंज तुलुमूरि सुत्य नॉर्यवन तारान।

अबीद त्राव्य छे मेखलि हुंद अख अहम रसुम। ग्वडनिच अबीद छे मास त्रावान। माखलि यॅज्मन छु मासन तु प्वफन पलव अनान। प्वफ छे वारि दानस प्यवान यथ शेयित्रुह चॉर्य आसान छि तु अथ प्यठ छु शेयित्रुहन त्वकचन वार्यन मंज बतु रनुनु यिवान युस शेयित्रुहन दिवताहन बोग आसान छु। अज कल चि प्वफु छे वारि दानस तल गैस या स्टो थवान। बोय छु बेनि वारि दानस प्यवनुच जंग दिवान। शामन छु मेखलि हवन समाप्त सपदनु ब्रॉह सारिनुय अथि फोल याने अर्ग बॉगरनु यिवान। यथ मंज वुशकु तोमुल तु तेल आसान छु। यि सोरुय छु शाँति पाठ परनु पतु यथ मंज आलमुक्यन लूकन, राजस तु मुलकस वनन तु वनासपती, जानवरन तु हयवानन तु सारिनुय फितरी अनसरन हुंज पापरजॉई तु सकून खॉतर दुआ छु करनु यिवान तु अँगनु क्वंडस त्रावनु यिवान। मेखल म्वकलनु पतु छि माहराजस पलव तु दस्तार गंडनु यिवान। वीगिस खालनु पतु छि तॅमिस यारुबल वालान। ज्ञानु छे अमि पतु वीगिस प्यठ नचान तु अख अँकिस वॅनिवी वॅनिवी वखनय करान। माहराजु यारुबल निनुक इनतिजाम ओस आम पॉठ्य मातामालन हुंद आसान।

अजकल छु माहराजु आम पॉठ्य कारि मंज यारुबल वालनु यिवान। व्वन्य गव येति यारुबल आसि नु तति छु मंदरस गछनु यिवान। ब्रॉह कालि ओस नु माहराजु यारुबल वालनु विजि वॅंदलस तरान तिव्याजि अमि विजि ओस पोन्त्य लॉकुन पाफ मानुनु यिवान। यारुबलु वापस यिथ छि ग्वडु फाकु वॉल्य नवीद करान तु पतु बाकुय लूख। अमि दूहु छि आम पॉठ्य दाल, हाख, म्वंजि नदुर, ओलव तु चेटिन्य स्युन आसान। मेखलि सुत्य छि लॅडकु मज़हबी प्रजनथ प्रावान, सु छु व्वन्य बटु बनान तु करमु कांडुक हकदार ति बनान। अगर काँसि बचस कुनि हॉदिसु किन्त्य मिसाले मोल मरनु किन्त्य ब्रॉठ्य करमु कांडस अचुन पेयि तस छु बांगि विजि चुवॅतिस प्यठ योनि त्रावनु यिवान मगर अथ सूरतस मंज छे शेन रेतन ताम मेखल दिन्त्य ज़ोरूरी मगर हालाथ बदलनस सुत्य आव अथ मंज ति बदलाव। व्वन्य छि ज़्यादतर मेखलु रोजगार प्राँविथ खांदर ब्रॉह दिनु यिवान।



लेख

## थालु चूर तु राजदान

महाराज कृष्ण 'काव'

पथ कालि ओस बटन खिंगरि मारनुक स्पठाह शोक। अगर काँसि हुंदिस बबस ओस करतान्य बोड मंदुल, तँमिस ऑस नु कांह शरुम अगर तँम्य सुंदिस सॉरिसुय खानदानस वनुहॉव 'मंदल'। या, अगर काँसि ऑस थफ दिनुंच तु तँम्य सुंज़ ज़ाथ बनिहे 'थपल', सु ओस तथ खोशी खोशी कबूल करान।

अज़कल छि हालाथ यिथ्य कि हर कांह छु यछान पानस "कौल" वनुनावुन, तु कौलन मंज़ ति गछि आसुन दतौत्री कौल। व्वन्य छु अख नफर दौयिमिस मिलनावुन मुशकिल। ए एन कौल छि मिलनावान के एन कौलस टी एन कौलस सुत्य। काँसि छु नु तरान फिकरि ज़ि कुस म्यूल कस।

क्याह ओस तेलि, तोह्य हरगाह मीलिहिव काँसि, त्वहि ओस तरान यकदम फिकरि ज़ि नफर क्युथ छु, ल्वकुट म्वहन्युव छा किनु बोड। वैसे ति ऑस्य सॉन्य बुज़र्ग 99 % क्लर्क आसान, खासकर डूगर राजस मंज़। फरख ऑस यिचुय ज़ि कथ महकमस मंज़ ऑस्य तिम क्ललॉरुक या तिम किथ्यन इनसानन या जानावारन ऑस्य पेठोवली करान। या तिम कॅमिस ऑस्य रिपोर्ट करान।

असि पज़ि समजुन ज़ि सुलतान ऑस्य नु यूसुफ शाहि चक हिव्य सुलतान। तिम ऑस्य सुलतानस कारंदु याने नोकरी करन वॉल्य। दौयिमु तरफु ऑस्य नु बटु ऊंट चलावान। तिम ऑस्य ऊंट वाल्यन निश टेकुस वसूल करान।

जॉचन सुत्य ओस यि ति पताह लगान ज़ि सॉन्य ज़िठ्य कमन ओहदन प्यठ ऑस्य कॉम करान। मिसाले मीर ख्वर ऑस्य बादशाहन हुंद्यन गुर्यन हुंज़ देखबाल करान, हँस्य वॉल्य ऑस्य हसित्यन हुंज़ पेठोवली करान, तु तुफुच ऑस्य तोफु चलावान, नतु ज़्यादुतर तोफु महकमस मंज़ क्ललॉरुक आसान। लंगॉर्य आसुहान चोकु संबालान तु कॅचन ओस बतस पोन्थ ज़्यादु पहन गछान युथ ज़न बतु वुगरु गछान ओस तु प्योख नाव वुगरु।

अज़कल छि बटन गलत फहमी यि ज़ि बटु ऑस्य नु तिजारथ करान। मगर कारवान ऑस्य करु मुठ कुनान। कलपूश ज़नानन हुंद्य कलपुश, बादौम्य ऑस्य



बादामन हुंद कारुबार करान। बज़ाज़ आसुहॉन बज़ॉज़्य, बान आसुहॉन बान कुनान तु द्रॉल्य ऑस्य मँज़िमयारुज़ (द्रालुज़) करान। बटन ओस गुज़ारु करनुक बेयि ति ज़ॅरियि। मोट्य ऑस्य मठन इतिज़ाम करान, हाख ऑस्य सबज़ी पॉदु करान, हॉशियि ऑस्य काकजस प्यठ हॉशी बनावनस मंज़ मॉहिर। जुतिश ऑस्य जोतुश कारस मंज़ तु साद्यन आसिहे कांह गरु त्रॉविथ साद बन्योमुत।

अगर ज़ॉच आसु अँकिस निरंजन नाथस बेयिस निरंजन नाथस सुत्य फरख करनु खॉतर। मगर नोकरी पेशिय योत ह्येकिहे नु यि फरख कॅरिथ। अथ बरअकुस योदवय कांह दुर्घटना कौसि आसिहे पथकालि सपुज़मुच तम्युक ओस ज़्यादु असर प्यवान। कांह बुज़र्ग योदवय कुनि सातु बेसॉली सालस प्यठ कौसि नज़रि गॅयोव तस ऑस्य डुडु वनान तु तसुंदिस खानदानस छु डुडु नाव चालू रुदमुत। तु कौसि हय बतु थाल चूरि ओस न्युमुत तस ओस थालु चूर नाव दर्योमुत, या कांह हरगाह ब्रष्ट गयोव तस ऑस्य ब्रॉठ वनान। कांह ओस ज़ारुक शोकीन आसान तु तस ओस ज़ॉर्य नाव प्यवान।

यिथय कॅन्य ओस असि आदथ ज़ि कौसि हुंद कुनि कुसमुक कांह ति नोकुस या कांह कॅमी वुछिथ छि अँस्य तॅमिस रेछ कडान, खसु तस दॅरिथ छे गछान तु ज़ाथ बनान। मसलन जीठिस वन्योव दराज़, छोटिस वन्योव छोट, शे ऑंगजि वॉलिस वन्योव शॉंगुल, कोबिस कोब, तु निकिस नोर बेतरि। कांह हरगाह कुहुन पहन आसिहे तस प्यव नाव काव, काचरिस काचुर्य। हालांकि कुहुन या काचुर छु अख या जु नफर आसान मगर तँहदि खानदानुक नाव छु ती दॅरिथ गोमुत। यिथय कॅन्य प्यव तोतु नसति वालिस 'शोगु', बिलु अँछ वॉलिस 'ब्रोर, गेशॉमिस 'गुरुट', लँगिस 'लॉग' नाव तु यिंहद्यन खांदानन गयि ज़ाथ दॅरिथ। कॅचन आदतन या कुनि जिसमॉनी कमज़ूरी प्यठ ति ओस नाव प्यवान तु ज़ाथ बनान। खोश पायि नफरस ऑस्य 'खोश' वनान, तु त्रामु कलु वॉलिस वोनुख 'गोंज' तु हजि गरदनि वॉलिस 'कारि होल' बेतरि।

अँकिस इनसानस क्युथ मिज़ाज छु तथ प्यठ ति छे ज़ॉच बनेमचु। प्रथ कुनि सनन वॉलिस ऑस्य 'माम', गरुम मिज़ाजि वॉलिस ऑस्य 'मरचुवांगुन, सखुत मिज़ाज थवन वोल वन्योव 'त्रकुर, रेछ कडन वोल गयोव 'चौव' तु ख्वशुक या न सनन वोल ह्युव नफर 'होख'।



म्योन्य पसंदीदु ज़ाँच छि “गमखार” तु “राजदान”। मे छि पताह ज़ि सान्यव लिखार्यव छि यिमन प्यठ वेछि वेछि किताबु लेछिमचु, मगर बु छुस तोति यछान सौंचुन ज़ि सौन्य बुजर्ग आसुहॉन नु सौरी रेछु कडान। जान तु समुजदार ति आसुहॉन। म्यानि मुताबिक आसिहे गमखार बेयन हुंदिस गमस मंज शरीक सपदन वोल नफर, युस तिहिद्य अँश्य फेर्य व्वथरान आसिहे। मे छु नु बासान ज़ि राजदान छु राजानकु प्यठु द्रामुत। मे छु नु यि संस्कृतुक लफुज बासान। म्योन्य किन्य आसुहॉन सौन्य कैह बुजर्ग गाटल्य यिम ज़न राजन नज़दीक तोलुकात आसुहॉन थवान। तवय छुस बु सौंचान ज़ि राजदानुक मतलब आसि राजदौन्य याने राज़सी हुंद वॉकुफकार। म्योन्य किन्य आसुहॉन तिम अँज़िक्य डाइरेक्टर हिव्य। यि क्याज़ि छु नु मुनौसिब ?

### देवनागरी तु कौशुर

कँशीरी नेबर हेकि कौशरि खौतरु देवनागरी अख अँहम लिपि बाँनिथ। देवनागरी लिपि मंज छु कौशुर परनु तु लेखुन सँहल। कँशीरी नेबर कौशुर परनु तु लेखनु खौतरु छे दिलचस्पी बडावुन्य तु बरकरार थावुन्य ज़रूरी। अमि खौतरु हेकि वाख अख अँहम वसीलु बाँनिथ। यि गोछ सारिनुय गरन मंज वातुन। वाख पँरिव तु परनौयूख बाकी ति।

कौशिर ज़बान छे सौन्य प्रज़नथ, असि छे यि कुनि ति सूरतस मंज कौयिम थावुन्य।

### देवनागरी लिपि

देवनागरी लिपि मंज कौशुर लेखनु खौतरु कँरिव यिमन निशानन हुंद इस्तिमालः

- तुर, करु, पर, गछु
- तुर,
- ॐ गँर, नँर, अँर, हँज
- गॉर, नॉर, दॉर, ऑठ,
- बेह, चे, मे, पेठ
- १ दोर, तोर, नोर, होल, दोल, चोल



अफसान

## जून डब

रतन लाल 'शांत'

पँडिथ द्राव ठोकुर कुठि तु मँजिन न्वशि चाय। चाय ऑस नु तयार। बॉच बॉच ओस न्यँदरि व्वथान तु स्व ऑस चायि खोस खोस लागान। पँडिथ रुडचोस।

“अकि दूह ज़न डाजोथ रुटीन। बोड चायि ब्वहगुना थव्योथ वँरिथ। युस वछोव तु चेयेयन .....व्वलु अन व्वन्य दूदु खोसुय। पतु लागि ज़ून डब।”

लँडकु ओसुस शुर्यन स्कूल वरदी कुंघ करान। पँडिथ वोल्थोव।

“ऑसुख नु ज़न अज़ कुंघ वँरिथ। पतु ? रंगा रँगी छि यिम अंग्रीज़् स्कूल सिरिफ यक रँगी बडावान। हुंह! यू-नी-फारुम!”

लँडकन वोनुस नरमी सान। “वुनि माहरा बजेयि स्वादय सथ। साडि सति कडु बु कुंघ तु रेडियो त्राव।”

पँडितन ह्यचोस खबर क्याह वनुन ज़ि प्यठय खँचुस ज़नान ब्वनु प्यठु दवान। तँस्य कुन वोथ,

“कांह शोक छु नु यिमन म्यान्यन शुर्यन। सुबहॉय आसुहान रेडियो त्रावान। मुलुख बोज़ान ज़ून डब। यिम बनेयि जादय अंग्रेज़। तलय अनुन न्वश ति। बूज़िव अज़ क्याह वनन। क्या ड्रामा लागन!”

“यि ओस शुर्यन अज़ अकस्करशन गछुन। सुली गव चिर्य ग्युश। चे गँयी न्यँदरि खँचल तु अज़ गोहस पनुनि वॉसि सुली हुशार। क्रख क्या लॉजिथ सुबहॉय। बु खँचुस दवान। गॉर ऑसुस पिहान। मे दोप खबर कुस वशुफ गव।”

“गछ वस। दि ग्रटस फ्युर फ्युर। तोह्य सॉरी छिव हिवी। दिवान ग्रटस फ्युर फ्युर.....”

बेयि खबर क्याह क्याह वनिहे यि नय न्वश दूदु खोस नँरिस प्यठ थविहेस। वुशुन दूदु गोल चवान-चवान ह्यचन पँडितस डिकसु गछनि।

दूहदिशिक्य पॉठ्य ऑस रेडियो हस प्यठ “ज़ून डब” लँजमुच मगर खोस त्राँविथ ओस पँडितन नोर शांद द्युतमुत।



## अफसान

### गैस बाल

हृदय कौल 'भारती'

सनु छुम नु यिथु पौठ्य याद, व्वन्य गव येमिस सनु ज़्याद अहम बासि, सु हेकि यिम निशानु छाँडिथ ज़ि तिमन दूहन ओस ताज़ु ताज़य महमद अली जिनाह येमि कथि हुंद तसला सपदिथ जहलिमि हुंज़ि वति (जहलिम वेली रोड) वापस करौची गोमुत ज़ि कौशिरिस मुसलमानस कथन हुंज़ जौद मॉथुर दिन्य छु नु फिलहाल मुमकिन तु जवाहर लाल नँहरिस ओस “दुमेल” वातनस प्यठ कौशिर्यन पँडितन (बटन) हुंद “क्वंग” त्वहफु कनि रटुन व्वन्य बाक्य!...व्वन्य ऑसिन जिनाहस जनतस तु नौहरिस स्वरगस जाय (द्वशवुन्य हुंदि खौतर मा बनि अकी जायि बापथ दुआ करुन, तिमन आसि नु कांह हरजि दफ येति व्वथन फसाद!

बहरहाल तिंहदि खौतर दुआ कॅरिथ कोर असि सिरिफ यि सौबिथ ज़ि अँस्य ति छि म्वहज़िब नतु सानि कथि छु नु तिमन सुत्य मुलय कांह तोलुक। ति हँदि हवालु प्यव महज़ अकि खौतर द्युन युथ ज़न सनु हेकि मुकरर सपदिथ ... वेठ्य पौठ्य बूज़िव ज़ि अंग्रेज़ बहादुर ओस वुनि येत्य तु पौकिस्तान ओस वुनि तसुंज़ि यँड मँज़ुय याने वुनि थनु पेनय !

मे छि असली पक्कु बालन हुंज़ दँलील वनुन्य मगर सनु मुकरर करनु खौतर पेयि यि फोज़ूल दँदुर ज़ेठरावुन्य ... तिमन दूहन आसु पक्कु बालु इंगलिस्तानु प्यठ यिवान, मँज़्य मँज़्य ति यिवान .... असली रबडुचि रंगु शोख, अँज़िकि खोतु वारयाह ज़्याद नरुम तु मलौयिम। अख पक्कुदम दिवान ज़ि पक्कुबाल पूर बनान, मगर यिमु आसु फटान जलदुय, मोमूली गासु तुल ति हरगाह सनि हे ...टास ज़ि पक्कुबालि अँस्य नु बुदन यिवान अथि। अज़ कल छे ना पक्कुबाल पँटिथ ति बचेमुत्यन रबड द्यलन वुठन प्यठ रँटिथ अंदर कुन दाम दिवान तु त्वकचि ल्वकचि बालु बनान। बांटु हिशि। तैलि ओस नु यि मुमकिन गैस बालन ति छु व्वन्य सिनथॅटिक (synthetic) रबड आसान तवय छे हना दरि पहन ति आसान। तैलि ओस अमि कुसमुक मसनूई रबड ईजाद सपदनु



किस आँखरी पडावस प्यठ। बस सिरिफ अख कदम दूर! .... बु ओसुस ल्वकुट यिहय बूजिव अठ सठ पॉठ्य वुम्बुर आँसुम पक्कु बाल न गिंदनुच। त्रुक ओसुस तवय छुम सोरुय याद। वैसे छुस बु अज़ ति त्रुक मगर मानि मा कांह। कॉशुर नु बिलकुलुय.....तु म्यानि खॉतरु छु अहम ती, इसलिये छु यि वनुनुय फोज़ूल !!

वुनि वॅन्य नु मे असली दॅलील, कथ छे सय असली पक्कुबालि हुंज़ वनुन्य। स्येक्युलरइज़मुक नारु ओस तोतताम ईजाद सपदनय मगर रहनुमा आँस्य मेहनथ सखुत करान। अमि बापथ सानि बस्ती मंज़ ओस शामु पँडितस, टवुन एरिया कॅमीटी हुंदिस दफतरस, तु नबु तिलुवॉनिस रेडियो। क्वकर चानुनुक वखुत ह्युव ओस वातान जि त्रेशिवुन्य जायन आँस्य फलकन ठँठ्य लगान। शामु पँडितुनि बैठकि मंज़ आँस्य तसुंदि होहवुर्य दरिक्व आँशनाव, मुनसिफी हुंध मुलॉज़िम, (पँडिथ ओस पानु अति मुहरिर) तु कैह खास हमसायि जमाह सपदान। टवुन एरिया कॅमीटी हुंदिस रेडियोहस प्यठ आँस माशटरन, कलॉरकन, तु डाखानु क्यन किहो बम चोकि हुंधन मुलॉज़िमन हुंज़ बीरु बारय सान मगर मे आँस ल्वकचारु पानु स्व खलकथ ख्वश करान, ख्वसु नबु तिलुवॉन्य सुंदिस ल्वकटिस रेडियो सेटस ब्रॉह कनि जमाह आँस आसान। ल्वकटि बाज़रुक्य दुकानदार फंबु मिठॉय कुनन वोल, अहमुद्य बाँज़्यगरुन लॅडकु येमिस सु कपर चादरि तल मॉरिथ दूहय दुबारु जिंदु ओस करान। तुलिनि डंडस पक्कुबालि तु टिकु वावजि गँडिथ कोचि कोचि फीर्य करन वोल समुद्य चाचि। समुद्य चाचस ओसुस बु असुल पॉठ्य वनि। असि दरमियान ओस पक्कुबालि हुंद रिशतु। कालु फटान पगाह नॅव पक्कुबाल यिवान .....। बेयि वॉच कथ खबर कोत, .... मूल बूजिव बुडिथ छेनु पतु दलील ति तगान फिरुन्य। मुदा ओस असली वनुनुक यि जि स्येक्युलरइज़मुक नारु ईजाद करनु खॉतरु आँस्य रहनुमा बडु सखुत मेहनथ करान तु अमि कथि हुंज़ चेनुवन आँस रेडियो प्यठु मेलान तु त्रुक्य आँस्य पतु यिछन खबरन पनुनि पनुनि जायि ख्वखलान, छ्वख कडान, इस्तरी करान तु दूर अंदेश आँसिस ओबुरु मायि कॅरिथ चमकदार ति बनावान। नबु तिलुवान्युन रेडियो बोज़न वॉल्य आँस्य बोज़ान बोज़ानुय यि सोरुय करान फिलफोर। अँथ्य मंज़ गव मे अकि दूहु कनन जि व्वन्य छे गैस बालु योर ति कुनुनि आमचु। यि अहम निवुज़ वॅन्य मे शायद पनुन्य मॉल्य। स्वरगस जाय आसनु खॉतरु छे नु तस म्यानि सुफॉरिशि हुंज़ ज़ोरुरथ ख्वदा दोस ओस तु तसुंद दोस ओस अख दोबु बदलुय यारानु ओस यिमेन दवन पान वॉन्य दोब ओस



हॉज्य। दूशवय ऑस्य गनटु वादन बिहिथ खबर क्याह कथु करान, येमि दूहु मे मोल गुज्रयाव तमि दूहु प्यतु त्रॉव्य हॉज्य खलकन हुंघ पलव छलुन्य। अमि दूहु पतु वोथ नु सु गाठस प्यठ ज़ांह। वासकटस (सदरि) मंज़ ओस पेठिमिस चंदस चेनि सुत्य बंद चंदु गॅर थवान। अकि दूहु मुच़रावुन तु दिचुन नेचिविस यि वॅनिथ ज़ि व्वन्य क्याह छु वखतस करुन ? .... बेयि वोतुस बु खबर कोत ! असली छु पज़ी बुजरस मंज़ दलील बोज़नावनुक ह्वनर ति सोरान....कथ ऑस गैस बालि हुंज़। यि खबर बोज़नोवुस बु मॉल्य....बालि छि मिशीनि सुत्य फ्वकु बदल गैस बरान, पन गंडान तु बाल पतु पानय ह्योर खसान। कुठिस मंज़ त्रावोन तु तालवस सुत्य लगान, न्यॅबर त्रावोन तु असमानस मंज़ गॉब गछान। अमि दूहु प्यतु प्रारयास बु गैस बाल बाज़रस मंज़ यिनस। लिनि गॅडिथ टिकु वावजि तु फ्वकुबालु ह्यथ नफर ओस दूहय कोचि मँज़्य हख दिथ नेरान तु दूहय ओसुस बु तस कुनुय सवाल प्रुछान। तु पतु ओस सु मे वुछथुय ओरय वनान जिगरा बुनि आयि नु। येमि दूहु स्व बाल यियि बु यिमु ग्वडुनिच बाल ह्यथ च्येय....।

मुलुख गव आज़ाद, वारु कारु ज़ाव पॉकिस्तान। रहनुमाहन हुंज़ मेहनथ लॅज बॅठिस स्येक्युलरइज़मुक नारु सपुद ईजाद। अँथ्य मंज़ गव सु डंडस गॅडिथ टिकु वावजि तु फ्वकुबालु कुनन वोल ज़न खबर कोत गॉब। वखुत च़ोल ज़न वाव तु अँथ्य मंज़ गॅयि अकि दूहु क्रख गैस बालु छे बाज़रस मंज़ आमचु मगर म्योन वखुत ओस ओत ताम म्वकल्यामुत। बटु कॅटिस बनेयि नोकरी तु खांदरन छि ठॅठ्य गछान, तमि ज़मानु ओस यी सपदान। वैसे जीन जैकटु अलावु छे नु अज़ ति अथ ज़्यादु तबदीली कैह आमुच़। .... येमि दूहु मे लॅगुन ओस तमि कालु वँथ्य सखुत फसाद, रेडियो स्टेशन ऑस्य व्वन्य बिसियार गॉमुत्य तु रेडियो ति ऑस्य मछन हुंघ पॉठ्य शुमारु रॅस्य। मगर शामु पॅडिथ ओस इसरार करान ज़ि तसुंद रेडियो छु “pye” असली जरमनी हुंद। हिटलर सुंदि वखतुक। अथ पोशि नु कांह। बी-बी-सी छुस त्युथ यिवान ज़न तसुंदिस कमरस मंज़ बिहिथ निवुज़ रीडर तस खबर बोज़नावान छु। यि वनुनस ब्वहर्याव नु तसुंदिस मरनस ताम कांह ज़ि च्ये नय अंग्रीज़्य पोरमुतुय छुय तु बी-बी-सी यस क्याह छुय करुन। नबु तेली ओस ख्वश ज़ि थफ वॅछ, वगविस ओसुस नु रैथ ति नेरान ति ऑस्य रेडियो बोज़न वॉल्य अथ बीह्य बिह्य गॅखुर करान !! टावुन एरिया कॅमीटी हुंद रेडियो गव अकि दूहु हंगु मंगु पानय गॉब। हतव वनि हथ कथु मगर रेडियो द्राव नु नोन कैह। व्वन्य छे अख कमीटी मुकरर करनु आमुच़ यथ पॅतिम्यव पुंचुहव वॅरियव



प्यठु मामलस सनान वोत। चूँकि वेंमीटी मुकरर करनु विजि छु अथ स्येक्युलर किरदारुक खास खयाल थवनु आमृत। अउ किन्य छे वेंमीटी हुंज कॉम कुनि रखनु बगॉर हमवार तरीकु ब्रोंह कुन पकान। स्येक्युलर किरदार मतलब वेंमीटी मंज छि ज़ु मुसलमान, ज़ु बटु तु अख सिख शॉमिल। अमी किरदारु किन्य छु नु अडिटर ति अथ मामलस अथु लागनास ब्यहरान। बलाय म्यॉनिस बुजरस बेयि वॉच कथ डुलु गॅछिथ खबर कोत इथु छि नु बुडस पेनशन दिवान। अंगरेज़न ऑसि मगुज़ डॅल्यमुत्य ज़ि रिटॉर लफुज़ कोरुख ईजाद। बहरहाल कथ ऑस ज़ि तमि वखतु ऑस्य सखुत फसाद चलान, येमि दूहु मे लॅगुन ओस रेडियो तु रेडियो स्टेशन ऑस्य बेशुमार। अमिकिन्य ऑस फसादव खवतु यिंहुज़ शोवय ज़्यादु। दूशवय फसॉद्य दॅर्य ऑस्य पनुनिस पनुनिस अवामस अपील करान ज़ि यथ नोज़ुख वखतस मंज गछन नु तिम स्येक्युलरइज़मुक नसबुलैन नज़रि निशि डलनु दिन्य। बाकुय पनुन पनुन एहतिजाज गछि जॉरी थवनु तु सु रुद जॉरी। रंगरन ओन बेबि मंज चूरि चूरि तोरु केसरी रंगु दसतार, सु गोंडुख मे कलस तु फॉसलु गव ज़ि माहराज़ु गछि कोचव कोचव बॉसकलस प्यठ होहवुर लॅगुन करनि। ब्रोंठ ब्रोंठ रोज़ि ब्याख नफर शेंख ह्यथ बेयिस बॉसकलस प्यठ। प्रोगरामु मुताबिक द्राव अख नफर बॉसकलस प्यठ माहराज़स याने मे ह्यथ तु ब्रोंठ ब्रोंठ द्राव शेंखु वोल दोयमिस बॉसकलस प्यठ कोचव कोचव। .... अँथ्य मंज पेयि मे याने माहराज़स बुथि पक्कुबालु वॉलिस प्यठ नज़र-गैस बाल ऑस पज़ी बॅसती मंज वॉरिद सपुज़मुच। लिनि लोरि अलावु आसु तस पनस गँडिथ वारयाह पक्कुबालु ह्योर असमानस कुन लमान। मे ज़ोन पानय ज़ि यि आसि हे अवय गॉब गोमुत। गैस बालु छांडनि। पक्कुबालि वोल ति ओस कोचव कोचवुय पकान। .... मथ गोम ज़ि माहराज़ु दसतार दिमु अकि तरफु दॉरिथ तु गैस बाल ह्यथ नेरु पानस गिंदनि मगर म्योन वखुत ओस म्वकल्यामुत दसतार लायिनु सुत्य नेरिहे नु कैह। वखुत यियिहे नु वापस।

फसाद हमेयि तु फसॉद्य रहनुमाहव कोर पनुनिस पनुनिस अवामस शाबश तु मरहबा ज़ि नोज़ुख दोरस मंज स्येक्युलर कदरु तु शीरुशकरुक बॉईचारु बरकरार थाँविथ कोर तिमव अँज़ीम रेवायतन हुंदिस तॉरीखस मंज अकि स्वनुहॅर्य बाबुक इज़ाफु। दोयमि दूहु द्रायि खलख बेयि कोचि तु कॅरफिव मॅशरिथ सडकन प्यठ अलु तु म्वंजि हेनि। गैस बालु आसु जायि जायि कुनुनि। मगर में रुद यि शर अँदरी, बालि गिंदनुक।



तथ कालस ऑस्य कॅशीरि मंज़ बटु ति रोज़ान। मे ज़ाव ज़नानि लॅडकु तु तैथ्य सुत्य ज़ाव मे ति एडिया। सूचुम अदु म्वकल्याव म्योन वखुत। म्योन नेचुव आसि गैस बालन गिंदान, मँज्य मँज्य आसु बु ति ल्वकचारुक तमाह पूर करान। दुनियाह छु पतु वथ यिथय पॉँथ पकान आमुत। मे द्युत पानस तसला। बाक्यन हुंज छे नु मे खबर मगर पानु छुस बु पॉँन्य पानस तसला दिनस यकता तु मॉहिर। वसुफ ओस मे ज़्यन वॅरियि बगवानन द्युतमुत। हूरिथ ह्यकस नु। असली आसिहे तस ति यि अंदाज़ु ज़ि सॉरुय ज़िंदगी बॅरमस अबावु सुत्य यि वसुफ हरगाह नु दिमस यि मरि ज़्यवान ज़्यवानुय। बॅल्य छिस नु बगवान वनान। प्रथ कथि छि ग्वडय वॉतिथ आसान। यिथु छिसु खलख पूजा करान। ....उफ....आव कथि बेयि वती .... खबर मे ज़न छे व्वन्य यि बेमॉरी लारेमुच, कथ आसान खबर क्याह चलान बु वातान खबर कोत .... वैसे पनुनि जायि छे कथ बु ओसुस द्दहय मगज़व युथुय दफ जवॉनी ऑस बास ओस नु लगान। बेयि ओसुस ना बु खॅरिफु .... आ.... अवुकिन्य ओसुम नु कांह कैह वनुनस ब्वहरान।....खॉर कथ ऑस चलान ज़ि मे सूच ज़ि नेचिविस सुत्य आसु बु ति मँज्य मँज्य गिंदनुक शोख कडान। .....मगर ति ह्योक नु मुमकिन सपदिथ तिक्याज़ि योत ताम सु गैस बालि गिंदनुचि उमरि वोत, तोत ताम ओस बाक्य चीज़न सुत्य सुत्य अशराफ शुर्य हुंद ल्वकचार छावनुक मीज़ान ति बदल्योमुत। स्येक्युलरइज़मस सुत्य सुत्य ऑस्य रहनुमाहव बेयि ति बिसियार नारु ईजाद कॅर्यमुत्य। असुल ख्वश यिवुन्य, वज़नदार तु अकी तॉलीमि याद रोज़न वॉल्य। व्वन्य ऑस्य नु स्कूलन मंज़ परान “लब पे आती है दुआ बन के तमन्ना मेरी।” म्योन नेचुव गव ग्वडु प्रपस दॉखुल। अमि विज़ि ओस सु अडुकोलुय येलि सु नरसरी, लोवर-के-जी, अपर के-जी द्दन व्वन वॅरियन वोत। अदु तोर मे फिकिरि ज़ि ह्म्टी ड्म्टी सैट आन ए वाल परान। अवलस ताम वातान वातान ओस ल्वकचार ह्म्टी ड्म्टी यन पानस सुत्य देवारु प्यठ व्वन द्युतमुत दॉरिथ। गैसबालि सुंब ओस तोति वखुत वारयाह बचान मगर फीस, टिवशन, ट्रानस्पोर्ट, किताबु, वरदी तु बाक्य अँडिन्य गॅडिन्य ह्यनु पतु ओस नु गैस बालि खॉतरु कैह बचान। हरगाह लॅडकु कैह बनावुन छु तैलि गयि वुनिक्यन लागथ लागुन्य।

यि मूल मन्त्र ऑस्य सॉरी वनान। तु यि मन्त्र प्रखटावनस लॅग्त सॉरी शोख तु वारयाह ज़ोरुतरु छेपि। .... मगर लॅडकु बन्याव पज़ी कैह। .... बॅल्लिक वारयाह कैह....अम्युक सारिवुय ख्वतु ज़्यादु एहसास ओस लॅडकस पानस तु



तसुंदि ख्वतु ज़्यादु तसुंधन ह्ववुयन। अख अजीब कथा .... अजीब क्या बॅल्कि ना कॉबिलि बवर कथ ऑस यि ज़ि गैसबालु तु टिकुवावजि कुनन वोल् ओस वुनि ति सुय तँथ्य लिनिवि लोरि गँडिथ बालु तु टिकु वावजि कुनान। तिथय पॉठ्य ओड सिग्रेट छेतु कॅरिथ बिटु कनस प्यठकनि थवान यिथु पॉठ्य पथ कालि चिठी रसान कलम थवान ऑस्य।

व्वन्य ऑस्य अलेकशन वारयाह सपदान। जोमहूरियत ऑस ना कॉफी फॉलेमुच्च। अज़ म्यूनसपलटी हुंघ पगाह असम्बली हुंघ, कॉल्यक्यथ पारलीमेनटुक्य। गरा जनरल तु गरा बाई। गरा कांह मरनु किन्य तु गरा कांह मारनु किन्य, सरकार गिरनु किन्य या सरकार गिरावनु किन्य। गैसबालु वोल् ....ओस प्रथ एलेखशनु विज़ि मुखतॅलिफ सियाँसी जमाँचन हुंघ इनतिखॉबी निशान कॅरिथ गैस बालु कुनान। यिथ्यन द्रहन ओस तस कनस प्यठकनि फिलटर दार बिट, आसान। .... मे छु बासान बु ह्योतनस बेयि असली कथि निश डलुन, बेहतर छु दलील छोटारानु .....! सपुद यि ज़ि मे ज़ायि लॅडकस ग्वंदुर हिश लॅडकी, बु गोस स्पठाह ख्वश, सूंचुम ज़ि व्वन्य छे नु मे कांह पाबंदी। व्वन्य गयि सॉरी पेनशन पाँसु बालन, गैस बालन प्यठ खरचिन्य। मगर निच ज़्यनु सुती आयि मे दोयिमि पोरुच कूठर दिनु यथ महज़ वोब हिश अख सीकुदॉर ऑस। .... व्वन्य ओस बोड कमरु म्यानि न्वशि लॅडकस तु तिहंदिस अयालस ज़्यादु ज़ोरुरथ। मीज़ान ऑस्य ओत ताम वारयाह बदलेमुत्य। तु जोमहूरी कदरव ऑस फुलिथ कोचन ताम छठ कॅडमुच्च। .... हॉरॉनी हुंज़ कथ छे ज़ि फक्कुबालु कुनन वोल् ओस अज़ ति सुय .... द्रहय ओस म्यानि सीकु दारि निश रुकिथ नरकॉन्य कलमुक बीन टाँ कॅरिथ वायान तु बु ओसुस सीकु दारि मँज्य दजि गँडिथ पाँसु त्रावान तु सु ओस अँथ्य दजि अकि तरफु गैस बालि हुंद पन गंडान। बु ओसुस बडु कशालु कॅरिथ द्वयव सीकव मँज्य बाल अंदर चानान। पकु ओसुम बिहिथ ज़ि अकि द्रह खसि निच बुड्यबबस छांडनि ह्योर तु बु दिमस यिमु रंगाबुरँगी बालु यिमन प्यठ वारयाहन बालन मुखतॅलिफ रहनुमाहन हुंघ इनतिखॉबी निशान ति बनाविथ ऑस्य। बालु गयि वारु वारु म्यानि कूठरि मंज़ जमाह गछान, सारेय आसु गैस बालु। अवु किन्य आसु सारेय यलु गछवुनुय वुफ दिथ तालवस सुत्य लगान। अकि वखतु आव सौरुय तालव बालव सुत्य बॅरिथ .....वारयाह वखुत लोग अथ शायद, न्यँबरु ऑस्य वारयाह मीज़ान बदलेमुत्य तु अँदरु ओसुस बु खबर क्याज़ि वारु वारु बालन मंज़ रुज़िथ ज़न पानु ति द्रह ख्वतु द्रह हलकु गछान। ....अकि



दुहू येलि बु सुबहन न्येदरि वोथुस....बु ओसुस पज़ी बालन सुत्य तालवस लेंगिथ बालन मंज़ हानु आमुत। बु ओसुस वुनि अथ प्यठ सौंचानुय जि ब्वनु गँयि वदन क्रख। ग्वडु म्यॉनिस लेंडकु संज़ पतु म्यानि नचशि हुंज़। सुती तुज निचि ति वदन ग़ज़.....बु ओसुस प्यठ कनि स्यठाह हलकु गेंछिथ बालन दरमियान तालवस सुत्य लेंगिथ खबर क्याज़ि ख्वश ह्युव।

केंचि दोह्य येलि कूठरि मंज़ बालु नेबर आयि कडनु बु ति द्रास यिमुनुय सुत्य ....व्वन्य छुस बु पनुन्यन रंग-ब-रँगी बालन सुत्य खुलु असमानस मंज़ आज़ाँदी सान फेरान !! बिलकुल हलकु!! सनु तु तौरीख छुम नु याद यिथु पौँठ्य, व्वन्य गव येमिस सनु ज़्यादु अहम बासि, सु हेकि येमि निशानु छौँडिथ जि बटन ओस केंशीरि प्यठ चेंलिमुतिस वारयाह काल गोमुत।

### वाख गोछ. गरु गरु वातुन

देवनागरी लिपि मंज़ छु काँशुर परनु तु लेखुन सँहल। काँशुर परनु तु लेखनु खाँतरु छे दिलचस्पी बडावुन्य तु बरकरार थावुन्य ज़रूरी। अमि खाँतरु हेकि वाख अख अँहम वसीलु बँनिथ। यि गोछ सारिनुय गरन मंज़ वातुन। काँशिर ज़बान छे सौँन्य प्रज़नथ, असि छे यि कुनि ति सूरतस मंज़ काँयिम थवुन्य। वाखु खाँतरु सूज़िव तु सौज़नॉविव चंदु। वाख-परिवारस दियिव वुसजार। यि छु तुहुंद पनुन मैगज़ीन।

### चंद

वाखु गोछ गरु गरु वातुन! वाखु खाँतरु सूज़िव तु सौज़नॉविव चंदु। वाख-परिवारस दियिव वुसजार। यि छु तुहुंद पनुन मैगज़ीन।

### अपील

अँस्य छि अँदीबन गुज़ारिश करान जि तिम सूज़िन पनुन्य ताज़ु छोट्य लेख, अफसानु, शौँयरी, तबसरु, अदबी खबरु बेतरि वाखस मंज़ छापनु खाँतरु।



अफसान

## वस्तादन हुन्द वस्ताद

त्रिलोकीनाथ धर 'कुन्दन'

यूरपस मंज छि जु मुख, ऑस्ट्रिया तु हंगरी यिम अख अकिस नखु नखु छि।  
यिहिन्ध सरहद छि रलान मगर जिन्दगी हुन्द मिजाज छु यिमन ब्योन ब्योन। अख  
छु ओसूद हाल तु अख छु हना कम पायि पहान। अमि किन्य छि सरहदस प्यठ  
सामानु चूरि छेपि अनुनुच निनुचि छोम्बु वार्याह वरतावनु यिवान। अमी ओस हंगरी  
सरकारन अख बडु कॉबिल, तजरुबुकार तु सीनियर कस्टम अफसर अथ  
बोडरस प्यठ ड्युटी लोगमुत। तस ओस नाव अलफ्रड। मुलॉजिम ऑस्य अँमिस  
यूत खोचान जि यिम ऑस्य अँमिस हिटलर वनान।

अँम्य ओस अथ बोडरस प्यठ त्युथ कतु गंड कॅरिथ थोवमुत जि चॅर ते  
अपॉर्य वुडिहे तस ति ऑस गरदनि थफ यिवान दिनु। अलफ्रड ओस पानु सुबहँय  
ओत वातान, इतिजामस साम ह्यवान त, सारिनुय अलग अलग कॉम मटि  
थावान। बसि मंज यिहे कांह या कारि मंज तस ऑस्य यि बूजिथ ति पलव ताम  
कडान तु तलॉशी कॅरिथ त्रावान। मजाल छा अकि डालुरुक कांह चीज ति हेकि  
हे कांह चूरि यपोर तॉरिथ। दोहस रातस ऑस यिहय बाँश्य। अतिक लूख ऑस्य  
अपॉर्यम्यन हँद्य पलव, गरि, साजु सिंगारुक सामानु बेतरी बडु पसंद करान। तमी  
ऑस यिमन चीजन थपु थफ तु अगर अपोर यिम चीज वाचॉयि यिम ऑस्य  
यिवान द्रोगि म्वलु कॅनुनु। खास कॅरिथ लिप स्टिक, मुशकुदार साबनु, पोडर डबु  
तु यावु पलव।

हंगरी हुन्द युस गाम अथ कस्टम दफतरस अँद्य पॅख्य ओस तथ ओस  
नाव गराड। अति ओस अख शख्सा रोजान योहय वॅहरि पंचाह मरि। तस ओस  
फिलिप नाव। यि ओस बडु शोकीन मिजाजुक, असुबुन तु ख्वश यिवुन। अँम्य  
ओस गरस निशि बोड बाग लगेवमुत। अथ मंज ऑसिन कुस्मु कुस्मुक पोश  
वॅव्यमुत्य। यि ओस कमि लोलु पोश ववान तु कमि मायि यिमन रॉछ करान तु  
सगुनावान। कमव कमव जायव प्यठु ओस यि अमि बापथ ब्याँत्य अनान, खास  
कुस्मुच म्वेच तु खाद अनान। अँडिस हिसस बागुकिस ओस अँम्य पश द्युतमुत  
युथ तत तल वॅव्यमुत्यन पोशन न वाति ज्यादु ताफ न ज्यादु रुद। अकि अंदु



ऑस्य अँम्य गमलु ति तंदलि थँवमुत्य। यिमन मंज़ ति ऑस्य रंगाबरँगी पोशि ज़ाँच, यिमन सगुवान तु चूर दिवान ओस अँमिस अख बदलय कुस्मुक सरुर यिवान। अँछन ऑसुस मस्ती यिवान तु यिमन गुलालन ओस कमव लोलु चेशमव थलि थलि वुछान। अँमिस ओस कस्टमु क्यन अहलकारन सुत्य जान दोस्ती। यि ओस यिमन निश गंट, वादन बिहान तु पनुनि अमि शोकच श्येछ बावान।

दोहु अकि आव फिलिप अलफ़डस निश। ऑल्यवाखा कँरिथ वोननस, हे करख ना वोपुकाराह? मे छि अँकिस खास पोशि ज़ाँच बापथ खास मेचि हुन्द ज़रुरथ। स्व मेच छि सरहदु अपारि बिसयार दस्तियाब। बु तारुहा ठेलु दह वुह अकि अकि दोयि दोयि अगर तोह्य इजाज़त दियिव। अलफ़डन त्रव असुनाह तु वोननस, ऑशा कँरिथ। तँम्य कोरुस शुकरिया तु द्राव गरु कुन।

अलफ़ड ति ओस वोस्ताद। तँम्य बुलॉव्य सॉरी मुलॉज़िम तु वोननख, येमि कथि गँयि यि कथ, फिलिपस सुत्य। सु छु मे ज्ञानान चोर ज़ाँहिरा। क्याहताम प्येट छस द्यमागस मंज़। नतु छा अँमिस मेच तारुन्य? वोन्य कँरज्यव तोह्य कॉम। येलि यि मेचि ठेलु ह्यथ तरि अँमिस गछि कलु नलु तलॉशी करुन्य। मेच ताम गछि दोनुन्य तु कंहँन चीज़ गछि नु तलॉशी बगॉर त्रावुन। असि छि अँम्यसँज़ शेताँनी नँन्य कडुन्य। अँमिस छुनु अलफ़ड स्वपुन्य ति आमुत। बु हय वुडवुनिस जानवारस छुस ठूल ह्यवान। बु त्रावुन यि यिथय योताम नु अँम्यसँज़ छोम्ब नँन्य कडु।

दोयिमि दोहु ाव फिलिप बॉसकल कैरियरस प्यठ बडि बोड मेचि ठेला ह्यथ। कस्टमक्यव कॉरिन्दव कँरहस नरि थफ। कुठिस अंदर निथ कँरहस पूर पूर तलॉशी, लगबग कोरुख नंगु। पतु प्युरुख मेचि ठेलु पँथरिस। रचि रचि दिचहस दून्य, अथव तु ऑगज्यव सुत्य, मगर अति द्राव नु कँह। यिम गँयि साहबस निश तु वोनहस, हे अति नसँ द्राव कँह, छराह मेचँय यॉच, मतलबुक नु कांह चीज़। साहबन दोपनख, म बँरिव फिकिर, मे तोर फिकरि, यि छु यछान चालॉकी करुन्य। दोन त्रन दोहन अनिनु यि किहीं योताम ऑस्य गफलुच मंज़ प्यमव तु गछव बेफिकिर। पतु करि यि अकि दोहु छल तु तुलि सानि गफलतुक फॉयिदु। तोह्य कँरिव कॉम, अँमिस कँरिव प्रथ दोहु खूब तलॉशा। या ह्यकि नु यि कँह चीज़ अँनिथ नतु यी अकि नतु अकि दोहु रटनु।

फिलिप द्राव गरु कुन तु बँरुन यि मेच बागस अकि अंदु। खोपि सुत्य कँरुन हमवार तु वँव्यनस पोश। अमि पतु गव यि दोहय अख अख ठेलु अनान,



बागस मंज फिरान तु खोपि सुत्य हमवार करान तु नवि नवि पोशि ज़ाँच ववान। दोहय रुद्य कस्टम वॉल्य अँमिस तलॉशी करान तु दोहय गँयि तिम मुजि ख्यथ सरुद येलि नु अति किहींन अथि आख। तिमन रुद योहय बीम ज़ि अगर अकि दोहु असि डेजर त्रोव यि नी केंह नतु केंह चूरि कँडिथ तु अँस्य रोजव वुछान। तिमव कँर अँमिस दोहु खोतु दोहु ज़्याद सखती मगर मेचि वरॉय आख नु केंह लबनु। यि मामलु गव चलान योताम दोह वुह पँचुह मरु गँयि। अँम्य वाहरॉव ज़मीनि पतस प्यठ यि मेच। अथ बनाँविन डूर्य तु वँव्यनख पोश तंदलि। बडु मेहनतु सान सजोव अँम्य पनुन बाग।

अलफ़ड ओस स्यठा सीनियर। वोन्य ओस तस रिटायर गछुन। ऑखरी दोहस ताम कँर तँम्य कूशिश ज़ि फिलिप सँज छोम्ब गँछ पताह लगुन्य मगर रुद अथय मूरान। न सु न तसुन्द्य मुलॉज़िम ह्यक्य कामयाब गछिथ तस चूरि रटनस। ऑखुर आव सु दोह ति येलि अँमिस ओस रिटायर गछुन। अमि दोहु लोग अति जेशनु। दफतर वाल्यव कोर बजि पारटी हुन्द इन्तिजाम। ख्यन च्यन, बाजि गाजि अलावु सपुज़ ल्यकचर बॉज़ी ति। ऑथ्य मंज आव फिलिप पनुन मेचि ठेलु ह्यथ। मगर यिमव त्रोव नु यि अमि दोहु ति। स्यठा लिथु लोर कोरहस मगर अज़ ति द्राव नु अँमिस निश केंह।

फिलिप ओस पनुन ठेलु ह्यथ गर गछनस तयार तु त्युथुय कोडनस अलफ़डन आलव। हे ठँहर सँ, मे छि ज़रूरी कथ करुन्य चै सुत्य। यि वनिथ न्युव यि अँम्य खलवख कुन तु यारुज़ लॉगिथ वोननस, 'वोन्य वनतम पोज़ पोज़। चै क्याह छोम्ब कँरुथ? भु ह्यकु नु यि मॉन्यथुय ज़ि चु क्याह ओसुख मेच सारान अपारि प्यठ। वुछ सँ वोन्य योसु कथ गँयि स्व गँयि। बु गोस अज़ रिटायर। वोन्य करय न बु केंह न वनु चोन राज़ काँसि। यि गव म्यिन वादु चै सुत्यन। चु वन मे पोज़ क्याह छु। नतु रोज़ि मे अम्युक हसरथुय। फिलिप वोथुस दर जवाब, 'वोन्य येलि तोहि वादु कोरवु कथ ख्यनुच बु वनोवु असलियथ। कथ छि यि बु ओसुस प्रथं दोहु अख अख नोव बॉस्कल यपोर तारान तु तोपतु सु कँनान तु जान नफा कमावान। तुहँद्य अहलकार रुद्य मेज़ी छाँड दिवान तु नँविस बॉस्कलस कुन गोख नु ज़ोनय। अलफ़डन छुन्य ज़ेवि तल ऑगुज्य तु हुकु चोलुस नीरिथ, वुम्बिहँज यबादथ कँरथम क्वलि। चु द्राख व्वस्तादन हुन्द ति व्वस्ताद।



अफसान

## खताह

ओमकार कौल

यि छु नूरआबादुक अख स्यठहुय खूबसूरथ ल्वकुट गाम।  
द्यव तरफव छु थद्यव पहाडव तु जंगलव सुत्य वॅलिथ तु अकि तरफ छु अख बोड  
दॅरियाव वसान। येम्युक आब सॉरिसुय गामस छु सॉराब करान। लूकन चेनु आब  
फराहम करान। लूख छि दॅरियावस प्यठ श्रान करान। अँती पलव छलान।  
गामुक्य चारवॉय छि दोह्य दूहस दॅरियावुकिस आरस तु जंगलु दामनस गासु  
ख्यवान।

लूख छि जॅमीनदॉरी करान, वारि तु बाग कमावान। पॅतिम्यव केंचव वॅरियव  
प्यठु छु येतिव्यन चूँत्य बागन जान फसल नेरान।

येति छि कैह ल्वकुट्य म्वकुट्य दुकान ति। सारिवुय खोतु बोड दुकान छु  
विजय कुमारन। तसुंद मोल नंद लाल ओस दोयिमि अकि गामु प्यठु पंचाह वॅरी  
ब्रॉठ योर कारुबार करनि आमुत। तॅम्य बनोव येति बोड मकान तु दुकान ति। तु  
बन्योव येतिकुय बॅसकीन।

मोल गुजरनु पतु प्यव विजय कुमारस ल्वकटिसुय मॉल्य सुंद कारु बार  
संबालुन। कालेज प्योस त्रावुन। मॉलिस ओसुस अथ गामस मंज स्यठाह यजथ।  
यि ओस कुनुय बटु गुरु सॉरिसुय मुसलमान गामस मंजड़। नंद लाल ओस गामस  
मंज सरपंच ति। तॅम्य सुंदि गुजरनु पतु चोरुख विजय कुमार पंचायतुक मेम्बर।  
यिथुकुन्य बन्योव सु ल्वकटुय मॅर्यद्यादुम।

विजय कुमारस ओस बचपनुक सोपुन थॅज तॉलीम हॉसिल करनुक, मगर सु  
गोस नु पूर। सु ओस येमि गामुक ग्वडुन्युक लॅडकु युस कालेज गव, मगर  
जलदुय प्योस त्रावुन। विजय कुमारस कौरुख ल्वकटिसुय नेथुर। तॅम्य सुंज  
ज्जानान फूलु ऑस टीचर अँकिस सरकार्य स्कूलस मंज। नेथुर पतु वॅरुख तस  
तबदीली ऑथ्य गामस मंज। स्व ऑस प्राइमरी स्कूलस मंज कुनी टीचर। टीचर  
आसनु अलावु ऑस स्व अख सोशल वॅरकर ति। तमि ह्यँच यि कॉम गामस मंज  
करुन्य मटि। स्व ऑस गामुचन ज्जानानन तु शुर्यन हुंदि बेहबूदी खॉतरु कॉम  
करान। मुडु ज्जानानन ऑस परुनावान। तिमन गरुच सफाई थवनुच तरबियथ



दिवान। गामुचन ल्वकचन कोर्यन तु न्वशन बॅनियानु वोनुनि हेछिनावान तु केंचन सिलॉय हेछिनावान। अँनिस छि गामुक्य सॉरी ल्वकुट्य, बॅड्य, ज़नानु, मरुद हूला बहनजी वनान। यिथुकुन्य काँसि तेय कांह कॉम आसिहे, या गरुकुली मामलन मंज़ सलाह मशवरु करुन आसिहे, तिम ऑस्य विजय कुमारस तु फूला बहनजी निश बे फ़ोक यिवान। यिहुंघ रुत्य मशवरु ऑस्य मानान। दूह खोतु दूह बड्योव यिमन यथ गामस मंज़ यज़थ। बाक्य नज़दीकी गामन मंज़ ति ऑस्य यिमन यज़थ करान। तु यि यज़थ रुद दूह खोतु दूह बडान।

मगर अकि दूह सुबहन वॅथिथ वुछ यिमव गरस तु दुकानु दरवाज़न प्यठ बड्यन बड्यन अछरन मंज़ उर्दू पॉट्य “नोटस” लीखिथ। अथ मंज़ ओस यि साफ साफ वनुनु आमुत ज़ि यिम नीरिन येमि गामु मंज़ु गरु तु दुकान त्रॉविथ फोरन। वरनु यिन —-यि नोटस वुछिथ गयि आंगनस मंज़ लूख जमाह। अँड्य छि अख कथ वनान तु अँड्य ब्याख। सॉरी पेयि असमानु ज़ि यिमन कुस खताह खोत अटस। यिमव क्याह कोर यथ लायख ज़ि यिमन नोटस दिचुख गरुबार त्रावनु खॉतरु। यिमव हय सारिनुय खॉर छु कोरमुत। प्रथ रंगु छुख लूकन मदथ कोरमुत। तिमन क्याह सॉ खताह खोत मटि। सिरिफ ओस युहुंद मज़हब अलग तु बेयि नु कैह। य्वहय मा खोतुख खताह।

लूख ऑस्य सुसरि गुसरि करानुय तु ज़ेबु वॉच आंगनस मंज़ तु चार्यन नोटस लेखन वाल्यन बजि बजि लेकु। तस आव अँजीब जेरु ह्युव। तस लॅग्य गामुक्य ज़िठ्य समजावनि ज़ि लेकव सुत्य क्या गछि। अड्यव वोनुस:-

“यिमन छु नु कैह ति परवाय। चु मय गाबर। अँस्य हय सॉरी यिहुंदि खॉतरु जुव दिमव। चु मतु बर तु परवाय। मगर ज़ेबन कॅर नु छ्वप। तमि दिचु ज़ोरु ज़ोरु क्रकु। विजय कुमारन तु फूला बहन जी ति समजॉव।”

“असि नाय छु नु परवाय। चु मय गाबर। अँस्य नाय त्रावव गरुबार। अँस्य गछव कोत गरु त्रॉविथ? गछव कस निश? यि बनि ति बनि येती।”

यिमु कथु बूज़िथ गॅयि ज़ेबस सथ हिश। फूला जी ऑस यि पानस कुन क्वमि रॅटमुच। तमि त्रॉवुस व्वन्य क्वम यलु।

ज़ेबु ऑस यिमन हमसायि। तस प्यठ ऑस्य यिहुंघ वारयाह एहसान। स्व ऑस ल्वकट्य म्ण्ड गॉमुच। शुर्य ऑसिस ल्वकुट्य। विजय कुमारन पुरनोव तॅम्य सुंद नेचुव यूसुफ। पनुनि रोसूकु सुत्य द्यावनाँवनस सरकॉर्य नोकरी ति। सु ओस शहरु व्वन्य नोकरी करान। ल्वकुट्य नेचुव तु कूर ऑसुस स्कूल परान। तिम ति



ऑस्य फूला बहन जी निश परनि यिवान। ज़ेबु ति ऑस यिंहंज़ ल्वकुट म्वकुट  
गरुच कॉम करनस मंज़ मदथ करान।

ज़ेबन येलि मसा मसा छ्वपु कॅर, फूलन चॉन्य पनुन गरु तु चॉवुन चाय। बेयि  
तोरनस फिकिरि ज़ि अँज़िक्य हालाथ वुछिथ पज़ुहान नु तस आंगनस मंज़ क्रकु  
दिनि तु लेकु चारनि।

दोयिमि द्रहु सुबहॉय फॉलेयि यि खबर जंगुल्य नारुक्य पॉठ्य। ज़ेबु ऑसुख  
गरी राथ क्युतुय गोल्यव सुत्य मॉरमुच। अमि द्रहु कोर गामन मातम। काँसि ति  
रोन प्यव नु योताम पुलीस आंव तु यि वॅडरॉवुख नु। गॉम्य गामस गव दम। विजय  
कुमारस तु फूलस गव ज़्यादय पहन महसूस। तमि दिच तिंहदि बापथ ज़ुवुच  
क्वरबॉनी। अगर नु क्रकु आसुहान दिचुमचु, तस कुस खताह खचोव।

अज़ बास्योव विजय कुमारस तु फूलस च्वपॉय द्युन। तिमन बास्यव ज़न तु  
ह्योत सारिवुय गामु क्यव तिमन निश पोत। यिमन ओस नु वुनि ति पनुन खताह  
फिकरि तरान। दोयिमि द्रहु सुबहॉय ऑस्य विजय कुमार तु फूल पनुन्य ज़ु शुर्य  
ह्यथ मकानस तु दुकानस कुलुफ कॅरिथ द्रामुत्य।

### अँपील

वाख छु नु ह्यकान वखतस पेट छँपिथ तिक्याज़ि सामग्री छेनु वखतस पेट  
वातान। अँस्य छि यछान ज़ि अथ मंज़ गॅछ ताज़ु सामग्री छपुन्य। अदबी मैगज़ीन  
पकि तेली ब्रॉह कुन, येलि अथ मंज़ नॅव सामग्री छपि। यि छुनु वुनि मुमकिन  
सपदान।

अँस्य छि अँदीबन गुजॉरिश करान ज़ि तिम सूज़िन पनुन्य ताज़ु छोट्य  
लेख, अफसानु, शॉयरी, तबसरु, अदबी खबरु बेतरि वाखस मंज़ छापनु खॉतरु।

परनवॉल्य सूज़िन पनुन्य राय तु म्वलुल्य सुजाव वाखस मुतलख।  
वाखस पोछर दिनु खॉतरु छु यि ज़रूरी। वाख छु महज़ अख अदबी मैगज़ीन,  
नकि सियाँसी। अँस्य छिनु सियाँसी मज़मून या रायि छापान।



शॉयरी

संसार

शम्भु नाथ भट्ट 'हलीम'

बहस अवसर जि मौलिकि कुल कुनि कांह छा किनु न  
मगर वोजूदि आदम निशि मुनकिर गछुन छु मा मुमकिन  
बु छुस योताम नफुस नफुस छु रवान दवान क्रँजस  
वैल्युत कॅरिथ छु क्रँज अख हसीन तर जुव ज़ाथ  
य्वहय छु येम्य कायिनातस छु नाल वोलमुत  
अज़ल तु अबदुक गुमान थनु प्यथ यसुंद असासु बन्योव  
मलख तु जिन येम्य व्यपदोव्य थॅविन दुंबाल  
पनुन छ्वचर खोटुन तु दराज़ दस सपदिथ  
द्युतुन जलवु खयालस तु थुरिन ताह ब ताह इबहाम  
छोटुन गाह तु ताफ प्यव ईकानस  
अँकीदन थफ लॉयिन तु वोलुन नखव प्यठु बार  
सन्यर सु आबुक सर सोदुर कोरुन पाबंद  
कमंद लॉयिथ खोत नबस तु प्रॉटुन स्यख  
सितारु छँकरनु आय सँयारु दम फॅट्च गॅय  
हचर तिहुंद वोल्योव मचर वॅसिथ मद् गव  
तलाशि मौलिकि कुल बन्यव मुशकिल तर  
यि सुतरु क्वथ खुर्यलद बनेयि बेयि खुर्यलद  
अंदव ती यथ नु व्वन्य शाँद नय कुनि अंद  
मगर वोजूदि आदम निशि मुनकिर गछुन छु ना मुमकिन  
यि डलुवुन ब्यह कोताह बनान गोव महकम!  
यिहय छे पॅज़ अरज़थ य्वहय नेदोर आधार  
वनान छि अँथ्य दुनिया, वनान छि अँथ्य संसार।।



## मॉज मॅछिज

बाल कृष्ण 'सन्यासी'

नूर हलम छुय असवुनि ह्वंजि छख  
वसवुन्य आरु तुलान छी व्यूर  
मागुचि छटि मंज शीनु शहर छख  
हारस मंज बरजसतु फुलय  
श्रावुन छख अमृत वरुन छख  
हरदु ग्वन्यन हुंज छख अंबार  
महानदी कावेरी कृष्णा  
ब्रह्मपुत्र वितस्ता मॉज  
गुफतारा, ल्वकचारा चोनुय  
चॉनी स्वर लय चॉनी ताल  
उचकु बॅज जगतस रुत कांछान छख  
मॉज मॅछिज छख सरवु शुहुल  
दीवी छख द्वहदिश पूजुन्य छख  
क्वह तु संगर चॉन्य चावान शीर  
रंगाबुरंग्य वरदन लॉगिथ छख  
जन तु समन्दर च़ेय छी नॉल्य  
कारतिकुच छख जून च़े छ्वपु छय  
नॉर सुभाषिन्य तिलुकुन्य छख  
मालि जॅरिथ छी जाफुर्य पम्पोश  
अॅष्कु पेचान क्वंगुपोश ग्वलाब  
उचकु टिकु चोन कश्यप रयोश नुंदु रयोश  
संत कबीर अगस्त रेशि  
विन्द्याचल महेन्द्र हिमालय  
अरावली चोनुय अनहार  
सोन्तु फुलय दिवय अस्तानन  
चान्यन वुठनुय हुंद कुमजार  
बुद्ध, नानक, चिस्ती च़ेय थनु पेयी



चैय ज़ामुत अशफाक उल्लाह  
 पॉज़ गुरू गोविन्दु सुंद चुय छख  
 चुय छख अर्ज़न दीवुन तीर  
 ग्यानुक आगुर द्यानु मगन छख  
 मॉज मोदुर वॉणी चॉन्य वीद  
 अज़मथ चॉन्य ललुव ख्वनि वीरव  
 हीर ग्यवान अनहुर अरमान  
 शोज़ छख, मायि बॅरुच, रुच ह्य़ेच छख  
 तिनु कैह कॉली हुंज़ छख रुप्फ  
 दुर्गा छख गंगा माता छख  
 दज़वनि अँगनु क्वंडुच छख जूत्य  
 भरतुन्य छख धरती भारत छख  
 रमन रिआन्यि अरबिनदुन्य वॉर  
 बैकिम चंद्रन्य मनि कामन छख  
 चिनामा झांसी हुंद ज़ोर  
 इंद्रपरस्त, बुद्ध गया, अयोद्या  
 मथरा बिन्द्राबन अजमीर  
 चॉनी आंगन, चॉनी वथ कथ  
 चॉनेय प्रचंड चॉनी तस्वीर  
 मोर च़े छिय ख्वनि व्वसि छख आमुच  
 ओबरुचि पखु छय छख वुज़मल  
 ज़लुवुन्य ज़लुवुन्य लोलु गज़ल छख  
 डलु ख्यलु वेंथरस मंज़ पम्पोश  
 रुस्य कचन हुंद चंचल मन छख  
 स्वंदर वन छख, छख वन हॉर  
 जलियानवाला बागुच कथ छख  
 ताजमहल छख छख ज़ूनु गाश  
 चानि प्रभातुचि प्रवु अँस्य सॉरी  
 चानी शामुक ज़ूल यकुत  
 चॉन्य वरासत भीम, शिवाजी



अभिमन्यू ओबदुल हमीद  
चौनिस सुबहस शामस कुस फरि  
युस फरि नारस बुथि दियि पान  
मौज बखुश पेंद्य म्योन्य प्यवान छिय  
सब्जारस चौनिस लगु पौर्य

### ज़ु गज़ल

मखन लाल 'कंवल'

१

असि थेंव्य ताकस प्यठ आदाब  
प्रथ कैह बास्योव असि पायाब  
यथ बैस्ती गैयि फेर्य कामुन्य  
हुथ शहरस फोर आबुय आब  
वखतुच छुर्य वेंछ बखतस याम  
च्वय कॅर मौरिथ छुन स्वहराब  
कथ करनस मा थोवहम वार  
कथ कॅर वौनुहम खानु कराब  
होशस मंज़ छुम रावान दिल  
बेहोशी दिम म्वकलि अज़ाब  
चेनु रोस रिंदु क्या ज़िंदु रोज़े  
साकुय चावुम पानु शराब  
दग हय आसि तु सेहतस खौर  
ठीख हय आसु तु रावान ताब  
गोबरा द्युतनम आँन तु गौन  
पोवा खँस्यथुय छुम यि जिनाब  
हुम्य याम छल वल लोलस कारर  
पशमीनस ज़न प्यव तेज़ाब  
'कंवलस' तनु मोठ पनुनुय पान  
यनु तस यारन रवय कोर खाब



यनु गव नीरिथ दिलबर सोन  
 तनु लॅज दृशवुन्य चेशमन ज़ून  
 वावस वॅर्यतव नबज़स रॉछ  
 दावस लोगुन मोत मॅजलून  
 अज़ छम दग ज़न गॉमुच कम  
 ज़खमन म्यान्यन त्रॉविव नून  
 कुस छुस वनतम क्याह छुम नाव ।  
 लूकव वोनहम आशक चोन  
 दॅज्य दॅज्य रातस पानस सुत्य  
 अॅम्य शमहन वॅर्य कुत्याह खून  
 नज़रव चॉविन वुहवुन्य जाम  
 नज़रव मॉरिन कम शब खून  
 असुवुन्य अछरुय वॅर्य नायाब  
 वदुवुन्य छॅकरॉव्य कम मज़मून  
 'कंवलस' प्रछयतव क्याह छुस हाल  
 तस हय फोरमुत छुम वेसुतोन

ज़ गज़ल

सुनीता रैना

बेखबर पॉठ्यन यिनुक अनुमानु वुछ  
 शब छु सौबरान रोवमुत सामानु वुछ  
 या च सुबहुक खाब तस पावुस चेतस  
 छयनु गॅछिथ यान्य गोमुत देवानु वुछ  
 टारि खारत मा ास वुछिव म्योनय थज़र  
 या छ नज़रन तल तॅमिस ासमानु वुछ



खोफ छुम खामोश नज़रन हुंद स्यठाह  
 छुम चुकावान अज़ पँतिम अहसानु वुछ  
 तस पज़र ब्रोंह कनि छु ज़ाहरुक प्यालु ज़न  
 तस छु वुनि लसनुक ति अख अरमानु वुछ  
 कल सु म्यौनी ह्यथ छु द्रामुत तवय  
 वुठ छि तस मेय कुन वुछिथ लरज़ानु वुछ

२

बसनस लसनस किछ.तरसान  
 बैस्ती गौमुच येति वौरान  
 बर दिथ क्याह करि सरु वनतम  
 अरु-वरु गौमुत्य येति देवान  
 तारख नब ख्यव गटुकारन  
 बद रंग गोमुत छुय असमान  
 शहरन ज़र प्यव शोरुय शोर  
 रौवुय कुकिलन हुंज़ पहचान  
 दमफटि शकलन हुंज़ बैस्ती  
 बासान कुनि छुनु ख्वश इनसान  
 शामुकि ज़ूलु छे नैन्य बैस्ती  
 सिरियस आसन यिम मंदछान

गज़ुल

प्रेम नाथ शाद

तवारीखु वरकन परान छुस शुहुल  
 दज़ान दौंग्य लफज़व लेखान छुस शुहुल  
 बदल रंग बदल विह्य अँछन डैशमान  
 बु दामानु दौरिथ मंगान छुस शुहुल  
 गोमुत व्यहरु ज़न दुपहरस सिरियि ताम



दपान छुम चे डींशिथ वटान छुस शुहुल  
 अछर मुनतेंशिर थर फिरिथ लय लहन  
 पकान तीलु सडकन ग्यवान छुस शुहुल  
 दिवान बाज़रन हख जिगर दोर वेंगरिथ  
 कुनान खाब स्वनहँर्य ह्यवान छुस शुहुल  
 बुसर नारु ब्रेहयस येत्यन आवुरान  
 हुत्यन दूरि रुज़िथ असान छुस शुहुल  
 छवकल तावु तन चोँन्य प्यवान शाद याद  
 युथुय पुरनि प्येजि चानि वुछान छुस शुहुल

## जु नज़मु नसीम शफाई

१

### ज़ॉन्य मोत

नैन्य नु न्यथुनैन्य ऑसुस कनु प्यठ  
 छुम नु ज़्चनुय  
 येम्य येम्य वुछमुच आसु तैमिस हय  
 आसि नज़र पज़ि तम्बलेमुच  
 म्यॉनिस जिसमस वलुवन्य प्रथ ज़ॅट  
 आसि ल्वती पनु पनु गॉमुच  
 येमिसुय अथु सुत्य सॉरिथ आसु बु चेनुन्य तैजमुच  
 तैम्य आसि नु क्याह क्याह वोनमुत  
 अज़ पोक म्यान्यव कोचव कमि ताम  
 प्रानि वेंबीलुक ज़ॉन्य मोता  
 तैम्य ति वुछिस पोक द्राव स्योदुय  
 रछ खंड पोक ब्रौह पतु ठहर्योव  
 वापस फीरिथ नज़राह वेंकरनम बाकि वोदुन  
 क्याहताम सूंचुन नॉल्य फेरन बेवायि कोडुन



कलु नोमरिथ रसु आव मे कुन अदु  
शुर ज़न तँथ्य फेरनस वँजनस

२

### आगही

तिम चिह तिम गरि  
येलि अख दिवता  
बेयि अख अछु रछ  
हंगु मंगु समखिथ  
शुर्य लॉज्य मँज्य  
अख अँक्य सुंजि कलि  
फेरान फेरान  
फरॉरुय गँय अदु  
गीरान गीरान  
यिरु वँथ्य आरस  
वातान वातान  
वॉतिथ गयि तथ  
ब्वन सेठुहय ब्वन  
तल पातालस  
शह खसु वसि मँज्य  
जोनुख च्यनुख  
जि बंदु ओसुन  
छे ख्वश नसीबी  
ज़मीनि प्यठ ज्योन  
छु बोड कमाला  
(न छाय न अक्स २००७ किताबि मंज़ु)



## जु गज़ल

जगन नाथ 'सागर'

१

तिम चिह्न अगर रछ ति तलबगार आसुहन  
 संगदिल मे मा तिम यार दिल आजार आसुहन  
 अथ वरजु वावस आव मा ख्वश ज़ांह ति बसुन म्योन  
 सर खम तेलि मा म्योन्य तिम देवार आसुहन  
 सँहरॉव्य वतन ओस पकुन ह्यथ सराबुच शय  
 रतु दॉव्य पॅद्य वतु ति नाहमवार आसुहन  
 पेयिहे नु जरुन म्वखतु सियाह रॉचुनुय नालस  
 यिम शोक अगर म्योन्य नय मिसमार आसुहन  
 मेय लोग दावस पान रॅछिम तोति पनुन्य नस  
 नतु म्योन्य पुरवज नाहकु शरुमसार आसुहन  
 रॅछ्य रॅछ्य थॅविथ 'सागर' चे यिम सहरॉव्य समंदर  
 नतु कति सॉ रंबुवुन्य चॉन्य यिमय शार आसुहन ।

२

चोट कंड्यव दामानु ख्वनि ललुनॉव्य दूह  
 खोट अॅछन मंज़ ओश तु अदु व्वलसॉव्य दूह  
 नय छु रोफ व्वन्य नय नचुन नय कांह गिंदुन  
 वरजु वावुय कॅम्य नु अॅक्य मनसॉव्य दूह  
 छु नु नयन मंज़ अज़ कुहुंय वायान नय  
 अॅम्य पॅहॅल्य कॅट्य कथ कुलिस तल सॉव्य दूह  
 युथ सियाह शब ओस मा ज़ांह कौछमुत  
 वुछ नु यथ सहरुय नय वरतॉव्य दूह  
 वुछ तु सुकरातस ति प्यव ना चोन ज़हर  
 असि मगर गँड्य लॉचि गम असुनॉव्य दूह  
 म्योन दुनियाह देंदवनाह बासान छु अज़  
 ऑस्य कम ताम तिम यिमव येति छॉव्य दूह



वैर्य नु 'सागर' शिकवु यारन दर दिलन  
वुछ बितुर क्याह गव क्यथु अज़मौव्य दूह

## कैह वाख

रोशन सराफ 'रोशि रोशि'

### १ राज़ होंज़

आसुन गोछुम तौयिर सुंद परवाज़  
साज़ गोछुम पुरिथ राज़ होंज़ सुंद  
खँसिथ फलकन वुछहान फयाज़  
नियाज़ खारुहॉस अमारन हुंद ।।

दूह लूसिथ थँकिथ छेनिथ  
कँडिथ वाशा सोंतु लंजे  
होखिस अँदरिस पतु ब्रोंह कँरिथ  
सॉरिथ सोंथ असुवुनि ह्वंजे ।।

बेहमुहा ग्वरस पादन तल  
जल तु कोसूर तुलुहॉन सुत्य  
शेरि बावुहॉस अमरेथ ज़ल  
लोलु बोज़ुनावुहॉन सोज़ कुत्य ।।

वुठव नु कैह अँछव वनुहॉस  
करुहॉस फँर्य याद अँश्य कतरव  
अकॉय कथ सासि फिरि खनुहॉस  
गंडुहॉस मुदय लोसुमचव न्यँथरव ।।

छ्योनमुत हलम रुन्योमुत दामानु  
नज़रानु अनु कति तु निमु क्याह तस  
रंज़नावुन महाल रूठमुत जानानु  
यी स्वरान वोतुम दूहस तु रातस ।।



रंग रंग कोसि कज़ुहस नखु रूज़िथ  
रँगिथ पान सथ रंग  
रंगदार च़ुहिथ सफेद बाँगरॉविथ  
च़टिथ 'रोशि रोशि' पार संसंग

## २ तमुहन जमाह

असुवुन समा रोज़िहे प्रथ दमा

शमुहा दज़िहे रॉत्य रातस ।

नैव्य तु प्रॉन्य पूर गछुहॉन तमाह

रोवमुत यियिहे जमाह ।।

न वदनुय रिबुनुय आसुन गोछ

न आसुन गोछ ज़्योन तय मरुन ।

मंदरन मॅशीदन गछुनुक कोछ

ओछ पन श्रदायि हुंद गोछ दरुन ।।

सूहम सोज़स सूहमकुय साज़

आवाज़ ग्रज़ुन्य गॅछ दॅहन दारन ।

अख अख तार सासन प्रचन हुंद राज़

माने हयॉति फिकिरि तारुहन ।।

अथुवास कॅरिथ गिंदुहॉव रासाह

लासा लबुहॉव तु बाँगरावव ।

न हावुन लछा न बावुन सासाह ।

कम कासाह सोम्बुरावव तु खरचावव ।।

बर तल बेहमुहॉव ग्वरुदारस

आच़ारस व्यच्छ़ारस दिमुहॉव खॅहरन ।

लोलुय वरतावस तु लोलुय व्यवुहारस

हारस तु मागस हेछिनावुहोन मन ।।

लोलुय रटुहोन चीरु नालुमति

येति तति करुहॉव कथ लोलुच ।

लोलुय बाँगरावुहॉव प्वति प्वति

'रोशि रोशि' प्रज़ुलावुहॉव वथा अज़लुच ।।



## जु गज़ल

ए० एन 'प्रशान्त'

१

वावु खबराह अन ततिच, येति मे सुय शोहजार रोव  
 ग्रशमु चंजिवुय सूर कोरहम, यथ रवयस वजुजार रोव  
 द्रोत कॅम्य द्युत बाँय बंदुतिस, कॅम्य यि कॅन्य शोछ वॅन्य कॅमिस  
 बाँयचारस कफनु वॅलिथुय, कॅम्य सना मंज़ कबरि सोव  
 वछ चटान रेश्य वॉर वुछतोन, हाय कम गंदर मे रॉव्य  
 माजि हुंज़ि क्वछि मंज़ मे बसनुक, तॅत्य पनुन अरमान त्रोव  
 कॅम्य दुई हुंद नार दिथ व्वन्य, चूरि नियि अज़ पॉर्यज़ान  
 अॅस्य ततिक्क ब्रसकीन, येति 'ललि' ह्यौद मुसलमान शीर चोव  
 काव लॉगिथ आव कुसताम, करनि मे सुत्य खॉर पाट  
 दार लॅज चेशामन मे यामथ, तस पनुन अवहाल बोव  
 बायि म्यान्या क्याह वनय, अर्जॅथ तु प्रज़नथ कॅम्य नियम  
 सु ति सपुद ओज़ुरदु यामथ, तस मे दिलुकुय दाग होव  
 वख छु बदलावान बुथ, गाहे शुहुल गाहे तचर  
 हे 'प्रशान्तन' थोव रॅछरिथ, कौंसि मा अज़ ताम बोव

२

कथ गिरदाबस फ्युर चु दिवान, मॅशरावख ना  
 गटु जॅलिसुय मंज़ कोत चु दवान, मॅशरावख ना  
 सुरु बनि मा वोथ कावुय अज़ ताम, बावव कस  
 नय बुलबुल नय कुमुर् ग्यवान, मॅशरावख ना  
 जून खॅच बालव पॅत्य किन्य लोत लोत गाह त्रावान  
 कायि वनस छु नु नार छ्यवान, मॅशरावख ना  
 मॅत्य आबन मा वुछ पथ ब्रोंह यिरु वॉलिन विरिवार  
 द्दछि द्दछि छख तेज़ाब चवान मॅशरावखना



कुन्य म्वठ रॉविथ वतु गयि ज़ेठान फेशान रुद्य अशंस्य वुठ

चेशमव कथ छख अज़ खून हारा, मॅशरावखना

व्वश कथ प्यठ छख त्रावान ,बॅर्य नय वॅग्म्य च़े कन

कॉत्याह अज़ ताम येति गयि रावान, मॅशरावखना

“प्रशान्त”वनि हे शमसुन ननिराह मा छुस वार

नेरि कति योर कुन गज़ल ग्यवान, मॅशरावखना

## बटन्य

रोशन लाल भट ‘रोशन’

राज़ु गरुची शूबुन्य राजि रॉनी

यी नु ज़ानुहाख ती छेख च़ालॉनी ।

द्वखु ज़द छेख काँह नु चोन बोज़ॉनी

यी नु ज़ानुहाख ती छेख च़ालॉनी ।।

हाल बावख कस वॅग्म्य सुंज़ छय आश

तुलि चान्यन कथनुय कुस पुरखाश ?

वछ अँदरी गम छी कूरॉनी

यी नु ज़ानुहाख ती छेख च़ालॉनी ।।

पर छेन्य छेख स्यकि सँहरावन मंज़

रवपु तन हय दँज़ुय यथ तावस मंज़ ।

सथ सूरिथ ओश छख हारॉनी

यी नु ज़ानुहाख ती छेख च़ालॉनी ।।

शोद ख्यन, चोन ताज़ु हवा ओसुय

पोन्य अग्नेथ, दाद्यन दवा ओसुय ।

रुदु कतरन येति फोर दारॉनी

यी नु ज़ानुहाख ती छेख च़ालॉनी ।।

वरतोवुथ कुनिरा ओसुय हिशर

ती ओसुय दरुम ती ओसुय बज़र ।

अस्तानन तु मंदरन च़ु फेरॉनी

यी नु ज़ानुहाख ती छेख च़ालॉनी ।।



चोन गँहनय शूब तु शरुम ओसुय  
 सीव निष्काम करनी दरुम ओसुय।  
 हमसायन क्युत रुत काँछाँनी  
 यी नु ज्ञानुहाख ती छेख च़ालाँनी।।

लरि फ़्युर द्युत समयन रोव सोरुय  
 गरि द्रायख नेह गटि ननु वोरुय।  
 शुरिनुय पतु पतु चुय लारौनी  
 यी नु ज्ञानुहाख ती छेख च़ालाँनी।।

रौछ करुने दरमस द्रायख चुय  
 पान पुशरिथ करमस द्रायख चुय।  
 दौद्य ललुवान छेख नैव्य तय प्राँनी  
 यी नु ज्ञानुहाख ती छेख च़ालाँनी।।

मस्त आँसुख पनुनिस कारस मंज  
 गरु किस तथ राज़ व्युहारस मंज।  
 राज आँसुख करान ज़न माहरौनी

यी नु ज्ञानुहाख ती छेख च़ालाँनी।।  
 सुलि वेंथिथुय सुबहन ब्रांदु फ़श द्युन  
 अथु बुथ छँलिथ ठोकुर चोन पूज़ुन।  
 अदु आँसुख गरुसुय माज़ौनी

यी नु ज्ञानुहाख ती छेख च़ालाँनी।।  
 कुठि पथ कुठि गरि आँसुख फेरान  
 शुर्य बाँचन आँसुख लोल बाँगरान।  
 वछि वॉलिंजि तय खंदु पेशाँनी  
 यी नु ज्ञानुहाख ती छेख च़ालाँनी।।

“ललद्यद”तय “शारदा”रुपु चुय छख  
 “रूपभवाँन्य” तु मथरा रूपु चुय छख।  
 मातृ शख्ती साध छी पूजाँनी  
 यी नु ज्ञानुहाख ती छेख च़ालाँनी।।

चुहुथ अलमास खंजरा च़ोलुथ च़ेय  
 शूब रँछरुथ विज़ि विज़ि होवुथ च़ेय।



शाहमीरस ति गॅयि ना हॉरॉनी

यी नु ज्ञानुहाख ती छेख चालॉनी ।।

पुशरोवुथ हर विजि दयि सुय पान

सुय श्रूच्यन जज़बन रंग छुय बरान ।

चॉन्य 'रोशनन' छे कॉछिमच्च कामरॉनी

यी नु ज्ञानुहाख ती छेख चालॉनी ।।

## म्यानि सोपनो

बी. के. मोज़ा

नूर चोन वुछुम मे पूर पूरय

राग चोन ग्येवुम मे गूरुगूरय

द्यान चोन दितुम कूरुकूरय

रुप चोन स्वरुम दूरि दूरय

म्यानि सोपनो गछ सॉ पूरो

अँछ लजि तवु मे दरु चाने

ओश कूत त्रोवुम दारि चाने

वोश्य कूत्य हेतिम चारु चाने

गीर अदु गोस बु सीरु चाने

म्यानि सोपनो गछ सॉ पूरो ।

मुराद चु म्योन सु खाब छुक

मकसद चु म्योन हुबाब छुक

मँजिल म्योन लाजवाब छुक

मंदर चु म्योन सवाब छुक

म्यानि सोपनो गछ सॉ पूरो ।

सरहद नु अदु आसान बासान

दग ऑसिथ नु दोद बासान

गॉयिल गॅछिथ नु गाव बासान

सूर्य गॅछिथ नु नार बासान

म्यानि सोपनो गछ सॉ पूरो ।

दूरि डीशिम छॉप चॉन्य हिशी

दूर तारु तोरुस बु बालन निशी

रोवुस चे पॅत्य बॅ पनुने खुशी

वोतुस बॅ कोत मे वथ मा मॅशी

म्यानि सोपनो गछ सॉ पूरो

विगनि चानि कति कॉत्या वुछिम

लोलुक्थ तरानु किथु कूत्य हेछिम

मे चॉन्य दग कमि दादि रॅछिम

लोलु ललुवुम ललु वाख वुजिम

म्यानि सोपनो गछ सॉ पूरो ।

थोकमुत बु छुस छांडान च्वपॉय

करमु वतु पोकुस मांडान कपॉय

कोसन नोचुस बु तांडान ननुवॉय

मे ड्यूशुम यपॉय तु वुछुम हुपॉय

म्यानि सोपनो गछ सॉ पूरो ।

तारस तोरुस बु कोहन पती

वथ मा डॅजिम मे शायद तॅती

ह्यस होश डॅलिथ वोश मे हेती

मे ज़ोन नो कुनि पानस पती

म्यानि सोपनो गछ सॉ पूरो ।



वनु क्याह बु यिम कृत्य सितम      यी गोम ती गोम मे पनुने खुशी  
मे दग दौद्य किथु कृत्य सुहिम      गाश आव दँज़िथ मे पत्रे लँशी  
छाँप अख बुछिम कृत्य सँनिम      आनंद बु प्रावँ व्वन्य च़े निशी  
मे कूता ओसुम तु कूतुय वोदुम      दरशुन दितम मे दग दोद मशी  
म्यानि सोपनो गछ साँ पूरो।      म्यानि सोपनो गछ साँ पूरो।

व्यनती छि म्याँन्य पूर गछतम  
चु पूर गछतम बरपूर गछतम  
कामना यि म्याँन्य पूर करतम  
दरशुन दितम मे गाश हावतम  
म्यानि सोपनो गछ साँ पूरो

नज़्म

## ज्यूठ कुसु

त्रिलोकीनाथ धर 'कुन्दन'

बोम्बरन तस द्युत म्यूठ	कुसु छुय यिति बडु ज्यूठ।
तँल्य टारि पोशव ड्यूठ	कुसु छुय यिति बडु ज्यूठ।
लोकुचारु पतु यावुन	बुजरन ह्योत पावुन,
ज़िन्दगी हुन्द सफर क्रूठ	कुसु छुय यिति बडु ज्यूठ।
ज़िन्दगी हुन्द सफर क्रूठ	तोति छुय लगान बडु म्यूठ,
काँसि मासँ पगाह ड्यूठ	कुसु छुय यिति बडु ज्यूठ।
कँत्यजव ह्योत वनुवुन	कोतुर कथु करवुन,
बुलबुल पंजरस ब्यूठ	कुसु छुय यिति बडु ज्यूठ।
दँय दोह गोस ख्यावान	रातस लोति सावान,
सुय शुर तँस्य माजि रूठ	कुसु छुय यिति बडु ज्यूठ।
वरतावुन पज़राह	बेयि प्रावुन स्यज़राह,
सबखाह यि छु व्योठ पूठ	कुसु छुय यिति बडु ज्यूठ।
पज़रुक पय प्रावुन	असलुक मय चावुन,
यिनु ज्ञानख यि छु लूठ	कुसु छुय यिति बडु ज्यूठ।



दूर छा किनु छुम सुत्त्य      आलव दित्यमस कुत्त्य,  
कोताह फोट मे फयूठ      कुसु छुय यिति बडु ज्यूठ ।  
कथ ताम गोमुत मौत      बाँथुय येलि प्योस छोट,  
'कुन्दन' अन्दकुन ब्यूठ      कुसु छुय यिति बडु ज्यूठ ।।

सोन म्वलुल सरमायि

जु वचन

हबा खोतून

१

चु वेंग्यू स्वनि म्यानि ब्रम दिथ न्यू नखो  
चे किहोज़ि गयी म्यॉन्य दुय ।  
    च़ख त्राव दुय मलाल वंदु छुय नो यिवान  
    चे किहोज़ि गयी म्यॉन्य दुय ।  
न्यसुफ रॉचन बर वेंथ थव्य मयो  
साथा यिख ना चुय  
    फेरु छु नु कैह ति फेरु छुख पावान  
    चे किहोज़ि गयी म्यॉन्य दुय ।  
मदन वारो बदन ज़ोलथम  
गोछहम मे आदन चुय  
    बादम चशमो खून छेसा हारान  
    चे किहोज़ि गयी म्यॉन्य दुय ।  
श्रावनुन शीन ज़न बु गलान आयस  
बागस फोजिस बो ही  
    चोनुय बाग तय चुय व्वलो छावान  
    चे किहोज़ि गयी म्यॉन्य दुय ।  
ज़्वल छम ना यिवान म्वलु छुख वालान  
गम छुम वॉलिंजि सुय



ज़ांह छुख नु दोदमुत सीनु शेहलावान  
 चे किहो ज़ि गयी म्याँन्य दुय।  
 तन छस नाउवान जामु छस पौरान  
 हावान छसया चॉन्य द्रुय  
 पनुनिस पानस ग्रायि छुख मारान  
 चे किहो ज़ि गयी म्याँन्य दुय।  
 ओश छस त्रावान बु चालि चाले  
 मे बालि गोछ, हम चुय  
 चु कवो वतु म्यानि आख मँशरावान  
 चे किहो ज़ि गयी म्याँन्य दुय।  
 हबु खोतून छय अर्मान ख्यवान  
 वेंगरमय नु ज़ांह बंदगी  
 यावुन रोवमुत छुम याद पावान  
 चे किहो ज़ि गयी म्याँन्य दुय।

२

वॉरिव्यन सुत्य वारु छस नो  
 चारु कर म्योन मालिन्यो  
 गरि द्रायस आबु नॅटिस  
 नोट मे फुटमो मालिन्यो  
 या तु दियतव नटि नोटा  
 नतु नटिचे हारु मालिन्यो  
 वॉरिव्यन सुत्य वारु छस नो  
 चारु करतो मालिन्यो।  
 हशि लॉयिनम टॅपिसुय थफ  
 सुय मे गव मरनु खवतु सख  
 यॅदरु पचि प्यठ न्यॅदुर पेयिमो  
 चॅखुर फुटमो मालिन्यो।  
 वॉरिव्यन सुत्य वारु छस नो  
 चारु करतो मालिन्यो।



यारु दादे तारि गँयिसो  
 बारु बुख छुम आमुतुय  
 हबु खोतूनि वोन शारो  
 दिल हुशारो मालिन्यो  
 वॉरिव्यन सुत्य वारु छस नो  
 चारु करतो मालिन्यो।  
 शुरय पानस सेंदुर गँयिमो  
 वुडुर खसुन कुडुर प्योम  
 कतरि सारान कतुर सृत्यमो  
 वेतरि नून प्योम मालिन्यो  
 वॉरिव्यन सुत्य वारु छस नो  
 चारु करतो मालिन्यो।

तरज्जुम

महिम्नापार

शंभुनाथ भट्ट हलीम

अंगव-सान आँसिथ ति जगथ हेकि तु ज्यनु निशि मुछि बँनिथ  
 अधिष्ठाता रुस्तुय किथु सपदि रुष्टी हुंद व्वदय ?  
 दयस रुस कुस करि युथ जगथ पौंद करनुक कांह प्रयास  
 मगर ही अमरीक्षर ! मुख यिम छि चैय प्यठ शख करान ॥६॥  
 त्रे वीद सांख्य, यूग दर्शन, पशुपत तु वयश्नव मथ छि यिम  
 छे सारेय वतु ब्योन-ब्योन खँसिथ अख बेयिस वयिवुन्य वनान।  
 पनुनि गवु स्योद क्यो हजि वतु कुचु पकृनावान लुकन  
 मगर माठ अख चोनुय क्वलु यिम छे सोदरस मंज व्यपान ॥७॥  
 बृशब ब्रद, चारपायि खूर, तबुर सुह मुसलाह तु भस्माह  
 सरफ, कलु-ख्वपुरा अख यि छु कुल असासा वरदु! चोन।  
 यि दीवन हुंज सौपथ यि छे चानि बुमि हुंद कुन हजर  
 करेस क्याह मृगत्रषणा येमिस आत्म स्वख वुजि अँदुरय ॥८॥



वनान अँड्य समसारस अटल, अँड्य वनान अथ नु ठहराव  
 अड्यन निश कुल आलम, दोर- अदोर स्वभावकि ब्यनु म्खय।  
 असरु नाशक! आश्वर यि छु यँच स्पठाह छुस नु मंदुछान-  
 बु चॉन्य अस्त्वथ करनस, वनुन युथ दपान बुथि प्यठ तुलुन॥१॥  
 गिरीशि! चॉन्य दयि गथ वुछिनि ब्रह्मा खोत हेरि-ह्योरुय  
 प्रकाशुक थंब मेनान वोथ ब्वनि-ब्वनुय व्यष्णु भगवान।  
 लोबुख मा अंद -शांदुय, गयि अदु शरन व्याकुल गँछिथ  
 प्रोखुट सपदुख पानय, बनि नु श्रद्धा रोजि फलनय॥१०॥  
 सँहल पॉठिन थोवुन त्रे भवन वुटँकुर्यव निशि म्कुल  
 तवय नरि फोरेयस नवि नवि ख्वदुक्क ओस दम दिवान।  
 सु रावुन श्रद्धावान, कलु चँटिथ लागान पोश हरस  
 त्रिपुर दानव नाशक! यि छु फल सदा द्रढ न्यश्चयस॥११॥  
 युथुय मछु बलु सुतिन अरु करनि कॉलासस ति लोग  
 सु रावुन डोल न्यासय ख्वरुन्यठु कि चाने च्यलु अके।  
 सु गव तल पातॉली तति ति अथु-पाद लँग्य नु कुनि तस  
 यकीनन कमजातस, वुनु वँछ अगर् प्यठ्य फोल गछ्यस॥१२॥  
 यि कुस आश्वरु शंकरु! त्रे भवन थँविथ तस खँदमतस  
 सु बानास्वर यस ज़ांह यंदुरु संपत खँच नु फिकिरिय।  
 सु ओस चोन आराधक वर युस मोंगुन सुय च़े द्युतथस  
 सु कुस हश्मथ युस ज़न अथि लगि नु तस येम्य च्यु सौरुख॥१३॥  
 यि कुस वनि हँट्य-नीजर छु नु शूबि हुरु रावान बोश  
 सु वेह येम्य दीवासुर त्रँहरॉव्य ज़ि ज़गतस गछि प्रलय।  
 कौरुथ खलकन व्यपुकार च़ेथ ज़हर च़ँलुरोवुथ यि त्रास  
 विकार तामथ म्वलुवुन, येमि सुत्य ज़गतस नठ च़ले॥१४॥  
 यसुंद्य कान त्रिनयन दीव! छि नु ज़ांह निशानव निशि डलान  
 नु कांह दिवता तस निश नु मनुष नु दानव कांह बचान।  
 तँमिस रतिनाथस गव ब्रम यी ज़ि दीवा च़ु ति अखा -  
 म्वच्यव बस यादुय यॉच, छु नु हतख शूबान वशिमत्यन॥१५॥  
 (व्युनपोश, 2010 किताबि मंज़ु)



शुर्य अदब

## खयॉली प्लाव

(पंचतंत्र मंज़)

प्रेम नाथ कौल 'अर्पण'

आलुछ्य शखचा अख नादान

गामस मंज़ अँकिस रोज़ान ।

कॉमाह कारा कैह नु करान

बेछ्य-बेछ्य ख्यवान खॉराथ मंगान ।

कुनि द्दहु ओसुस नु कैह मेलान

अदु ब्यछि होतुय ओस रोज़ान ।

द्दहु अकि वोत फेरान फेरान

गामस मंज़ अँकिस हालि हॉरान ।

कुस्मथ चमक्योस वखुत ओस शाम

ऑट्य लेजाह अख दिचुस कॅम्य ताम ।

ख्वश स्यठाह गव गरु आव लारान

लेज्य थॅवुन पानस निश अवेज़ान ।

बिस्तरस प्यठ खोत रूद शौगिथ

ऑट्य लेजि कुन रूद मुदय गँडिथ ।

ओस नु वेचान कुनि यिति पोज़ छा

यिकुवटु मे बनेयि ऑट्य लेजाह ।

सोंचिनि लोग मेय र्वपयि वनुहान

अदु मे बेछि कठ मा वनुहान ।

त्रावुहा बेछुन बु ति ऑश करुहा

कौंसि हुंज़ ऑड ज़ॉड मा ज़रुहा ।

सोंचुन छु ऑटिस अज़ कल बाव

ह्योत तॅम्य पकावुन खयॉली प्लाव ।

यीतिस ऑटिस बु करु क्याह



कुन ज़ोन छुस तु खेम कोताह ।  
मुलकस मंज़ गोछ द्राग व्वथुन  
द्रवगि म्वलु ऑट्य फोल हेम बु कुनुन ।  
बाज़रस मंज़ यियि कुमथ जान  
लेज्य ह्यथ कलस प्यठ नेरु बाशान ।  
क्रख दिमु वॅलिव साँ ओट हेयिव  
ताज़ु छुवु मज़दार फुलकु खेयिव ।  
बोजन न येलु लूख समन यकजा  
अख दप्यम दाह दिमय ब्याख पंदाह ।  
त्रेयिम थाव्यम र्वपयि वुह अथस क्यथ  
ऑखुर चलि सुय ऑट्य लेज्य ह्यथ ।  
दूत्य अख तु ख्वरुबान ओसुम ह्योन  
ननुवोर फेरान छुस न्यथु नोन ।  
मगर न - न वुनि कथ मे बकार  
बेहतर छु करुन कैह कारुबार ।  
छावजि ज़ु हेमख वुहन रोपयन  
ताज़ु ताज़ु ख्यावख कुल्पन हुंद पन ।  
जलदुय छावजन बचि ज़ेवन  
बचन ति बचि ज्यथ बॅड्य गछन ।  
दाह छावुल्य गछन जलुद तयार  
कुनुन्य कित्य वातुनावख बाज़ार ।  
दिमु क्रख छावुल्य मा हेयिव कांह  
जलदुय हेनु वोल नेरि कांछाह ।  
सु प्रुछ्यम वन साँ क्याह छुय द्युन  
बु वनस यिकुवट माल छुय न्युन ।  
सु दप्यम सारिनुय कर च़ु कुमथ  
बु वनस अख बराबर हथ ।  
रवपयि हथ थाव्यम सु अथस क्यथ  
च़लि साँरी छावुल्य मॅल्य हेथ ।  
व्वन्य क़रु क्याह यीचन र्वपयन



सूठाह बूठाह बेयि ख्यन चेन ।  
 न साँ न यि गव खरचि फोजूल  
 बेहतर छु कारुबारस द्युन तूल ।  
 जान गछि गाँव जोराह हेमु मॅल्य  
 वॉल्यविनि आसन प्रसन वॅल्य वॅल्य ।  
 वछरि ज़ेवन तिमु होखरि बनन  
 वॉल्यविनि रोज़न तिम ति प्रसन ।  
 दूद तु ग्यव नार्यव नट्यव कुनु बु  
 जलदुय बोड म्वहन्युव बनु बु ।  
 त्रावु हलवॉय वान करु बु तयार  
 कुसमु कुसमु कम कम मिठायि मज़ुदार ।  
 शहरथ गछि म्याँन्य साँरी यिन  
 मेय योत निश मिठायि मॅल्य निन ।  
 मालस म्याँनिस लागि चलेजाव  
 सुबुह शाम रोपयन करु तुलु त्राव ।  
 कुन ज़ोन वातु कोत यी छु बेहतर  
 जान गव रटुन्य पांछ दाह नोकर ।  
 नोकर चलावन हलवॉय कार  
 करुन पज़ि बोड कांह कारुबार ।  
 मे ह्युव कुस आसि दवलथ मंद  
 जवहॅर्य कारुबार करु बु पसंद ।  
 आसनम रोपयन हुंछ अंबार  
 लाल तु जवाँहिर हेमु बिसियार ।  
 पानु मा ज़ानु कैह रटख नोकर  
 लाल शिनाख बेयि कैह काँर्यगर ।  
 कुसमु कुसमु ज़ेवर करन तयार  
 डेकु टिकु मछु बंद बेयि म्वखतुहार ।  
 दूहु ख्वतु दूहु हरि म्योन कारुबार  
 बोड अँमीर बनु बु नामावार ।  
 थदि ख्वतु थोद प्शख लॉगिथ नॉल्य



राजस निमु म्बखतु हारा डॉल्य ।  
 रॉनी ख्वश गछि हार वुछिथ  
 राजु तम्बलि म्योन गाटुजार वुछिथ ।  
 ऑखुर दिन मे यनाम यकराम  
 पतु पतु मे नेरन मे न्यबर ताम ।  
 मकाना आसि मे ऑलीशान  
 डेडि प्यठ प्रारान आसि डीडच वान ।  
 मकानस अँद्य अँद्य आसि सबज़ार  
 रंगु रंगु पोश ग्रज़ुवन्य आबशार ।  
 तालाबन मंज़ आसन कम पम्पोश  
 कुल्यन प्यठ जानवर करान बोलबोश ।  
 दूर दूर ताम गछि म्यॉन्य शहरथ  
 कोरि वॉल्य अँद्य पॅक्य मे करन गथ ।  
 वातन मे निश कौत्याह मँज़िम यॉर्य  
 मानख नु हरगिज़ गछन हॉर्य हॉर्य ।  
 ऑखुर राजु सुंद वाति पॉगाम  
 राजु कूर आसि गुलि अंदाम ।  
 बडु दूम दामु सान करु खांदर  
 लुख गछन हॉरान वुछिथ करु फर ।  
 गछि कैह काला शुर्य तारु ज़ेन  
 आसन ज़ु नेचिव्य तु अख कोरि हन ।  
 दूनवय बॉच आसव नेरान  
 शुर्य पनुन्य ह्यथ बागस फेरान ।  
 शिहलिस बु आसु आराम त्रावान  
 मॉज आसि शुर्यन हेछिनावान ।  
 मॉलिस नखु यिनु लॉगिव शोर  
 क्रकुनादु सुत्य छु गछान बोर ।  
 शुर्य मानुनस नु कैह तिम नखु यिन  
 चिर्यग्युश तुलन ज़ोर ज़ोर क्रकु दिन ।  
 यि वुछिथ खसि मे सख शरारथ



थोद व्वथु शुर्यन लारु लूर ह्यथ ।  
 बे खयॉली मंज़ द्युतुन लोरि दब  
 ब्रोंठ कनि लेज्य ऑस तु पॅत्य किन्य लब ।  
 लेजि येलि लोरि दब प्योव ज़ोरु सान  
 टुकरु गॅयि तथ ऑटिस गव फान ।  
 अँछ मुच़राव्यन गव पशेमान  
 खयॉली प्लावा क्याह स्पठाह जान ।।  
 (प्राणि कथु 2000 किताबि मंज़ )

स्वखन दुस

अख गव आदथ । ब्याख गॅयि हॉल । त्रेयिम गॅयि मान ।

(OTHER THINGS REMAINING SAME)

रतन लाल 'शान्त'

पंडित स्वखानंदन छि स्वखन बोज़ुनॉव्य बोज़ुनॉव्य मे ति ज़न मांद वॅरमुच़ ।  
 युथ ज़ि बोज़ुनावि तु बु छुस तंग यिवान तु दपान कर करि छ्वपु तु तुलि थफ़ ।  
 बोज़ुनावनि यियि नु बु छुस बेकरार गछान । खबर तस छा एहसास गछान किनु न  
 मगर तंग यिनुक या बेकरार गछनुक नकशि आसि मे ज़ोरु बुथिस प्यठ  
 व्वतलान ।

येलि तस वुछनस रयथ खंड गोम तु मे हेचन बेकरॉरी गछुन्य । अखबारुक  
 दोयिम पेज ति छुस फिर्य फिर्य वुछान ज़ि बगवान दीयनस रुमु रेशुन आय, खबर  
 क्याह छे तु वसाह क्याह छु ज़िंदगी प्यठ । दॅपिव हे गरु गॅछिज़ि हेस तु तती  
 ननिहे । मगर सु क्युथ गरु तु कस ? गरु गव येलि गरु वाजेन्य आसि । स्व म्वयस  
 बिचॉरिस सनु अकनमतस मंज़ुय, मुठी कम्पस मंज़ सरफ़ दवपि सृत्य । तनु गव  
 बे गरु । मगर कॅचन बेगरु वाल्यन छे ना दयन ज़िमुदॉरी थॅवमुच़ आसान, लुकु गरु  
 वाल्यन हुंज़ु ज़िमुदॉरी पानस प्यठ हेनि । स्वखानंदन ति कोर ती । व्वं गव लुख ति  
 मा सॉ छि सेद्य । दोपुख, अँमिस क्याह न शुर पोथुर तु न अंग ऑशिनाव । गरु गरु  
 फेरि नु तु अदु क्याह करि । युथुय सु बुथि प्योख यकदम ऑस्य बुथ फिरिथ मोड  
 च़टान । ति ति गछि करुन तगुन । मे तोग नु ज़ांह । सु वुछिथ ओस मे शायद  
 ड्यकस रंग बदलान या छ्वचर-खजर, तु सु ओस परेशान गॅछिथ मे अथस



थफ करान, गरु तान्य सुत्य यिवान तु म्यानि आशिनि म्यानि सैहतस प्यठ ह्यदायथ जॉरी करान। स्व ऑस तस कुन शुक्र करान जि तोति छेस फिकिर नतय हतु बँद्य समखान छिम रुनिस (याने मे) मिटिंगन तु सबायन मंज थज़ कुरसीयि दिवान छिम अँमिस तु अँम्य संज फिकराह छा काँसि। तोति छुस यि बुज़र्ग स्वखु जुव अख हमदरद।

वारु वारु गँयि मे स्वखानंदन्य मांद, युथ जि तसुंद्य स्वखन चोर नय बोज़ुहा, छूट छूट ऑसुम लगान। युथ बूज़िव जि ऑखरस येलि रेत्य खँड्य अकि दृहु सडकि वुछुम अपोर तरान, पतय गोसस तु नालु मति रोदुम। मँहलु वाल्यव आसि मे चॉरिस प्यठ गोंछव तँल्य ओसमुत, मगरमे ओन पंडिथ थफ वँगरिथ पनुन गरु। चाय चावनोवुम तु पंखस स्यदु बेहनाँविथ प्रायोस नु तँस्य बोलनस-ब्रूठिम पाँठ्य।

“क्याह माहरा न्यँबरु ऑसिवु कुन गॉमुत्य?”

हसबि मोमूल द्युत तँम्य जचवाब ज़न तु सवाल प्रुछुन —

“मे कुसू नेचुव-न्वश छु न्यँबरु यसुंदिस ‘दुकमरी फलैटस’ मंज चक्रज गँखेरावुनि गछुहा?” वनान वनान द्युतुन लफ़्जि फलैटस वर ह्युव तु ज़्यादय पहन ज़ोर। अथ जवाबस मंज ओस तिमन माल्यन-माजन प्यठ टॉनु (सैटायर) यिम नेचिव्यन निश गछान तु शैयव रेतव खॉतरु मगर चँलिथ यिवान अकी रेत्य जि हे ततेय ज़न काँद गँयि, अवय आयि चँलिथ ब्रॉठय।

“अदु क्याह येत्य ऑसिवु? बखॉलन सर्दी गर्मी मा ऑसुव गॉमुच?” मतलब ओसुम वनुन जि ब्यमार मा ओसुख प्योमुत। कथि कोडुम वाश — “युहुस वँगरुन नु माहरा सर्दी ति सख। ज़ोम बन्यव वँशीर।”

यि म्योन वनुन जि तस ज़न लँज ज़ीर। अँश गंड आयस बँरिथ — “चै क्याह छुय, वँरुथ कथाह! ज़ोम बन्यव वँशीर!”

मे दोप हयहे अतुर गव। वँशीरि प्यठ छु पंडिथ जज़्बॉत्य गछान। याद आस्यस प्यवान। बुडन छे नु वँशीरि हुंज कल वुनिति सोरान। प्रकटिकली मा छि सोंचान अमा व्वन्य कति छु तोर गछुन, वँशीर मँशरावनी गव जान।.....

मगर सु ओस नु जज़्बॉत्य गोमुत, बँल्कि तस आसु अँछ त्यंबरेमचु हिशि। म्यान्यन अँछन सुत्य अँछ रलावान वोथ मे कुन बडु राज़दॉरी सान ज़न तु एलान करुन ओसुस —” बु आस ऊतरय वापस। वँशीरि ओसुस तोरमुत।”



बूझिथ प्योस बु ज्ञन पथर। क्या पंडित स्वखानंद तोरा वॅंशीरि। युस पनुनि  
 चलनुवय वाकात वॅन्य वॅन्य थकान ओस नु, युस जनवरी नमतुक खोफनाक  
 माहोल तु तथ मंज पनुनि लाचॉरी तु बे वॅंसीली हुंघ कुसु तिथु वॅन्य बावान ओस  
 जि तसुंदिस हकीकतस मंज ति बोज्ञन वॉलिस अफसानुक ह्युव बयान बासान  
 ओस, युस कसम करान ओस जि मरनु पतु ति दिमख नु पनुनि लाशि वॅंशीरि  
 कुन बुथ करनु ...सुय तरया वॅंशीरि, बेयि वंदस मंज, येलि नु तति ओरु योर  
 फीरिथ हेकि नु, वुहि वुहुर्य फुटराव्या सु पनुन वृथ ...बु छुस सूच्य सूच्य अकि  
 बालु खसान तु बेयि बालु वसान। बु छुस दपान, बु प्रछु क्याह अॅमिस, वनस  
 क्याह, मे छु नु बोज्ञनुय तगान कैह।

मगर स्वखानंद! म्योन बुथ परन वोल जोतिश, डेकु तु अॅछ परन वोल  
 जोदगार, म्यानि दिलुच दुंबराय ज्ञानन वोल नबुज शिनास पंडित स्वखानंद, बु ति  
 नय ज्ञानन, अदु कुस ज्ञान्यस? तॅमिस फोज वुठन प्यठ असन त्राय।

“हॉरान मु गछ! तोत मु खे! बु ओसुस रूपस सुत्य तौरमुत। रयतस! तु  
 अकि रेत्य तॉरुम स्व ति पानस सुत्य वापस। व्वन्य ओयि समुज किनु .....?”

वॅनिथ त्रोव तॅम्य लंबासाह तु म्यानि ज्ञनानि वोनुन —”व्वलुबी अन व्वन्य  
 चायि खोसाह। चमव तु दिमव कदमाह। कॉम छे। यि ज्ञन येम्य ओनुस योर नरि  
 थफ वॅरिथ। नतु कति मे फुरसथ?”

जॉहिरे ओस जि डाइलाग बूलिथ ऑस तॅम्य पनुनि कथि फुठ वॅडमुच तु  
 पनुनि तरफु ओसुन म्यान्यन सारिनुय मुमकिन सवालन जवाब द्युतमुत। मगर तस  
 ओस नु अंदाज जि पनुनिस अथ अफसानस मंज रूपु तु शारिका याने प्रेम  
 नाथुन्य कूर तु ज्ञनान, यिम ज़ु किरदार शॉमिल वॅरिथ कॉत्यन सवालन ओसुन  
 ज्जनुम द्युतमुत। म्यॉन्य कथ त्रॉव्यतव, बु छुस तसुंदान स्वखनन हुंघन वर  
 वकानन वॉकुफ, म्यॉन्य आशेन्य ऑस तसुंद म्वगुल्य चायि आडर बूझिथ ति  
 तॅती दर-मांद रुजिथ गॅमुच।

प्रेम नाथ ओस स्वखानंदस बापोथुर युस मिलिटंटव तमी सातु गूल्य लॉयिथ  
 मॉरिथ छुनमुत ओसुख येलि तॅम्य कुनवुह शथ नमतस मंज अॅकिस बौदूकचीयस  
 सुत्य जेफ्य मिलनावेयि, येम्य तसुंद मोल राथ क्युत गरि वॅडिथ न्युव जि सोन  
 सरदार छुय बुलावान। गामुक नॉमी ज्युठ आसनु किन्य ऑस्य तस मारनु ब्रोंठ ति  
 आमुत्य मगर कामयाब ऑस्य नु गॉमुत्य। प्रेम नाथ प्यव तॅती तु मोल वुछुख  
 सुबहस बेयिस गामस मंज फासि खॉरिथ अलोंद त्रोवमुत। तेलि कयॉव



स्वखानंदनुय जुरथ तु पगाह राथ क्युत चजोव गरु बार तु गामु जादाद त्रॉविथ,  
प्रेमुन परिवार ह्यथ। जेमि मुठी कंपस मंज येलि पतु जनान ति म्वयस, स्वर्गी सुंज  
वेदवाह न्वश तु कूर रँछिन पनुन्यन कोर्यन हुंद पॉठ्य। तनु प्यठु ऑसुस कँशीरि  
हुंद नाव ह्यनु सुत्य ख्वरु न्यठु प्यठय जन तु रेह गंडान तु नास त्रास ओस  
बोलान।

तु व्वन्य ओस स्वखानंद यिमु अबलायि जु ह्यथ कँशीरि तोरमुत तु रेती  
चँलिथ बेयि आमुत। अजीब मसला ओस। बु कथ त्रावुहन सु। चाय चोव म्यानि  
जनानि तु मे रोट बतस

तँमिस गव मँशिथुय जि कोतताम ओसुस क्याहताम कॉम करनि गछुन।  
म्यानि कैह प्रछनु ब्रॉठुय वोथुम ओरय –

“मेय हसॉ दोप रूपस, व्वथी कूरी सेदि बुथि नेरव। पगाह यि जन हालाथ  
तिथिय खराब गछन जि बुथ दिन्य लायख रोजव नु।”

मे ज़ोन यि छु जु सास दँह क्यन गर्मी हुंदन दहन हुंजि तमि व्वलहँरिशि  
नहुंज कथ करान येलि त्रेन च्वन रयतन कँशीर यि दँपिजि ति रुजिथ गँयि।  
सॉरुय जिंदगी कँर आजॉदी हुंदव जोलूसव तु पुलसु गोल्थव हुंदि मारु तु नारु  
किन्य थामि। तिथी हालाथय बेयि गछन तु यिम जवान लँडकु तु कोरि नोकरीयन  
थफ करनि तोर तँर्य, तिम गछन बे कज़ा मँरिथ कँरिथ। मे वोन स्वखानंदस “गव  
ना रूपस ओस नोकरी हुंद धडर म्यूलमुत तु तोह्य ऑसिवोस सुत्य तँर्यमुत्य।”

“ख्वहय छुवु ना त्वहि अँजिक्यन रंगरेठन ऑब। वुनि छे आसान कथ अँडुय  
कँरमुच तु तोह्य छिवोस माने कँडिथ निवान।....बु ओसुसस नु सुत्य तोरमुत।  
मॉज ऑसुस। द्वाशवय माजि कोरि आसु गामुसुय मंज मुसलमान गरु  
अँकिसकिरायि कमरस मंज रोजान। स्कूल ओस बेयिस गामस मंज त्रे किलू  
मीटर दूर। बस ऑसुस वखतस प्यठ स्कूलु निश त्रावान ति तु तुलान ति  
.....”

“मगर.....” मे चँट तसुंज कथ मंजय। “तत्यथ दपान सरकारन छि  
कवाटर ति बनॉव्यमुत्य, युथ तोर तरुवुन्य लूख रुजिथ ह्यकन ....” “हे अमि  
दोप गरस मँहलस मंज रुजिथ बडाव, मकॉमी लूकन सुत्य प्र्य हिव्य  
तोलकात।”

“वाह बा! स्युताह जान कोरुन।”



“क्याह —क्याह ? जान कोरुन ?”

“न माहरा, कति कोरुन जान।” मे ह्यचन गुठ गोजि गछनि। तँम्य त्रौव ठाह ठाह वँरिथ असन खंगालु—”हय हे चु क्या सॉ बांबुर्योख बेयि। कथ छे बदल क्याहताम, चु छुख समजान बदलल।”

“अदु क्याह माहरा सपुद युथ त्वहि वोनवोस ब्वथ चलव ? त्वहि वोनु कौसि कैह ?”

“वाह्य म्यानि बंगवानु! हे चु कोनु समजान / बु ओसुसा वुनि तोरमुत ?बोज़ सॉ यिम आसु माजि कोरि तरि मचु येमि खयालु जि तँती रोज़व। मे प्यव पतु नरुन येलि पँछी फोन आम।”

“अछा!” ब्वन्य ओस असली मसलस प्यठ वोतमुत। ”तु त्वहि क्याह वोनवोख तु क्याजि /”

“कोरि हनि दोपनम यिनु माहरा नु मे पतु वँनिव नोकरी हय वँह्यताम बनेयी तु त्रौवुथ क्याजि। शारिकायि वोनुनम —बब, मे छु नु येमिस वनुनुय तगान, क्याह वनस।”

“ओखुर त्युथ क्याह माहरा कुडुर मसलु ओस प्योमुत जि दशवुन्य ओस अकलु बकल गौमुच”

“रूपायि ओस्य लँडकु कम ताम वति पकुवुन, बसि अंदर तु गरि अचुवुन नेरवुन छेडखॉनी करान . मकानु वाल्यन वोनुक तु दहन तारन रूद मॉलिख तस नज़रि। नज़र डलुवुनी ओस्य हुम बेयि नमूदार गछान . पत गयस मॉज सुत्य। बसि मंज़ ति तु स्कूल ति रूज़ुस सुत्य। तस ति हेतिख दकु दिन्य तु नास त्रास बोलुन। स्कूल वाल्यव वोनहस ओस्य क्याह करोय अथ . पुलसस गछनस ब्वहरेयि नु। वति प्यठय कुनि पुलसु वोला ओस सु ति ओस असुना त्रावान। बस युतुय गव मामलु ...”

“यि कुस मामलय ओस!” मे कारर पनुनि कम अकलि अंदाज़। “छेडखॉनी तु गुंडु गरदी कति छे नु।? पुलसु कॅलिस डोल कति छु नु? पानय गछि हे समाज बेदार तु मामलु बेहिहे गरदि हुंघ पौठ्य। ....”



“सु गव ना येलि रूदु राठाह पेयिहे। तति ओस ओबरुय ओबुर, रूद ओस नु कुनी। बस मॉज तु कूर क्याह यि जेमि प्यठ नोकरी करनि, बैठाक लागनि, यि जन गव समाजस बरतबाह ! चु छुहम समाजिच बेदोरी वनान!”

“आहन माहरा, समाज आसि हुशार तु माजि कोरि हुंद यज़थ रछि!” “हे सु गव येलि बाकुय चीज़ हिवी रोज़न?”

“हे इकनामिकुस छेय ना पॅरमुच? इकनामिक ला याने असूलचि तथ समाजस मंज़ तेली लोगू गछान येलि तमि असूलक्य बाकुय याने खॉरिजी हालाथ डंजि रोज़न, इकनामिक फोरसन डालन नु बैलंस। वन्य तोरयि फिकरि किनु कॉशिर्य पॉठय समजावथ?”

“न माहरा कॉशिरुय छिवु ना तोह्य ति बोलान?”

“चे कति तरी यिथु कॅन्य फिकरि। बोज़—other things remaining same-गव ना ती?”

“मगर अति मतलब कॅशीरि कम छि other things?”

“हे चु हसॉ दिवनावख मे बुथि बुथि। तति कोर नु असि जुरथ कॉसि जि अॅस्य हा छि असूली, असि ना छु नु त्वहि सुत्य कुंही ठोसु ठोस। तोति चॅलरॉवख ति क्याज़ि तिहुंद असूल ओस बदल। येति छु चोन तु म्योन असूल कुनुय, मगर ति कॅरिथ ति चॅलरावख चु मे।”

वनान वनान वोथ पंडिथ स्वखानंद थोद तु हॅहर नु चले तॅहर ख्यथ।

*तबसर*

**नोव केंछा मेंछा** (शुर्यन बापथ नज़्म तु कहॉनी यि) ग्वलाम नबी आतश 2009 श्रीनगर, म्वल

कॉशिरिस मंज़ छु स्यठाह कम शुर्य अदब लेखनु आमुत। अम्युक अख खास वजह छु जि यि ज़बान ऑस नु स्कूलन मंज़ परनावनु यिवान। हाल हालुय आयि कॉशिरि ज़बान स्कूलन मंज़ प्रइमरी तु मिडल सॅथरिस ताम रॉयिज करनु अमि सुत्य म्यूल कॉशिरिस शुर्य अदबस फॉफलनुक अख जान मोकु। वन्य छु वारयाहन कॉशिर्यन अदीबन शुर्य अदबस पोछर दिनस कुन दिलचस्पी बडेमुच।



शुर्य अदब लेखुन छे नु अख सँहल कॉम। अमि खॉतर छु शुर्यन हुंज दिलचस्पी नज़रि तल थावुन्य ज़ोरूरी। मोज़ू गछन मोकूल आसुन्य तु ज़बॉन्य हुंद वरताव गछि सँहल तु स्योद सादु आसुन। ज़बान तु असलूब गछि नु मोज़ू समजनस मंज़ ठोर साँबिथ गछुन। शुर्यन हुंज यि ज़ोरूरथ हेकि अख जान व्वस्तादुय ज़ॉनिथ

ग्वलाम नँबी आतश छि व्वस्ताद। यिमव छु ल्वकट्यन कलासन मंज़ परनावनुक वँसी तजरुबु। व्वस्ताद आसनु अलावु छु यिमन व्वस्तादन तरबियथ दिनुक कॉशिरिस मंज़ दरसी किताबु बनावनुक ति तजरुबु। यिम छि पानु शॉयिर, म्वहकिक तु लिखॉय। यिमव छि शॉयिरी छॉपमुच, लुकु बॉतन तु लुकु कथन हुंजि सॉबरनि तरतीब दिचमुच, तहकीकी तु तनकीदी मज़मून तु मोनोग्राम लीख्यमुत्य। यिंहजि बाज़याफत किताबि प्यठ आव यिमन साहित्य अकादमी हुंद अवार्ड ति दिनु।

नोव केंछा मेंछा छे कॉशिर्य शुर्य अदबस मंज़ अख अहम बँरचर करान। अथ मंज़ छि शुर्य बॉथ, आम शुर्य कथु नज़मावनु आमचु तु शरेन हुंदि खॉतर कहानीयि दरुज। यि सोरुय मवाद छु शुरेन हुंदि दिलचस्पी हुंद। ज़बान छे आम फहम तु स्योद सादु वरतावनु आमचु। किताबि हुंज शकूल सूरथ ति छे जान।

मे छे व्वमेद ज़ि शुर्य परन यि किताब दिलचस्पी सान तु यि यियि प्राइमरी सोथरिस प्यठ कॉशुर परनावनु खॉतर ति इस्तिमाल करनु। व्वमेद छेम ज़ि आतश सॉब थवन यि कॉम ब्रोंह कुन ति जॉरी तु बाकुय ज़बॉन्यन मंज़ दँस्याब जान शुर्य अदब ति फिरन कॉशिरिस मंज़।

**ओमकार कौल**

तबसूर

**जिगरुक मिश** शॉयिर, मखन लाल 'कंवल', जम्मू 2009.

मखन लाल 'कंवल' सॉबुन्य किताब *जिगरुक मिश* पॅरिथ छु रुह ताज़ु गछान तु दिलस फरहत मेलान। किताबि हुंद नाव तु सरवरक बरमहल आसनु तलय छु शॉयिर सुंद तजरुबु कार, बहलिपायि तु फनी सलॉहियँच हुंज शखसियत आसनुक पय लगान। यिथिस क्वहनु मशुक शॉयिरस मुतलक म्योन तबसूर करुन गव सिरियस चोंग हावनस बराबर। यि छे नकादन हुंज कॉम। व्वंगव लोल जॉनिथ छोट्य पॉट्य बावुथ करुन छु नु नुन करुन जानान।



प्रान्यन तु नव्यन गज़लन प्यठ मुशतैमिल कंवल सॉबुन्य यि तखलीक छे  
पँज्य पॉठ्य थेकुन्य लायख तु म्वलुवुन्य। शॉयिर सुंज़ सलॉहियथ, सँन्य नज़र,  
सोज़ि दिल, वंदुकि सँदरुक आवलुन तु बुख छु गज़लन मंज़ टाकारु अथि  
यिवान। तस कुन ति छिम यिथु पॉठ्य वनान :

ज़न पुनिम हुंज़ जून खँच क्वहु पँत्य युथुय तँम्य परदु तुल  
बस मोतुम तामथ ख्वदा, तँसबी, जुनारस वँन्यज़ि क्या  
तँम्य अगर ज़न ज़िंदगी दिच बस बराये बंदगी  
नोज़-बिला तेलि तिथिस परवरदिगारस वँन्यज़ि क्या

चे कुन पँर्य मे कम आयि, तकबीर पानस  
मे क्या क्या नु प्योमुत परुन चानि बापथ  
मदनवारु वेह प्यव ज़रुन चानि बापथ  
गहे प्यव लसुन गाह मरुन चानि बापथ  
जुदॉई अँछव खूनि दिल हारुनावान  
छु 'कंवलस' प्यवान अथ दरुन चानि बापथ

येत्यन प्रान्यन गज़लन मंज़ शॉयिरु सुंज़ फँनी सलॉहियथ तु प्वखतुगी हुंद  
बारान महसूस छु गछॉन तँती छि तिम माहोल तु अथ मंज़ हॉयसातन रँगीन  
अंदाज़स मंज़ गज़लन अंदर फिरनुच महारथ ति थवान। कुनि कुनि छि शॉयिरस  
तिम चिह्न, पँहर, तिम दूह, तमि मेचि हुंद मुशुक, तमि माहोलुच अँतुर तु तिमन  
यारन हुंद रावन त्योल वछ कूरान तु तछुन तुलान। गहे छु यादु वँतरिस व्वखुर  
लँगिथ गमन हुंदिस सँदरस मंज़ छालु मारान तु गाहे सँगिस्तानुचन खम्बरेन  
छावनु यिनु सुत्य पनुन्यन जज़बातन एतिदालस रटान।

यि ति छु पय लगान ज़ि कंवल सॉबस छु तमि मेचि हुंद लोल तु स्नेह रुमन -  
रुमन मंज़ श्रेपिथ। ज़मानुचि क्रेछिरुच नारु ब्रेह, बेबसी तु लाचॉली छे गज़लन  
मंज़ लबनु यिवान। प्रान्यन गज़लन मंज़ तिहुंद फनी असलूब तु प्वखतुगि हुंद बर  
पूर इज़हार कँरिथ कथ ताम कुन इशारु दिवान छि खुदी हुंज़ बावथ करान  
वनान:

वॉसि कँर्यमुत्य छिम ग्वनाह च़ेय वँन्य दिनुक्य



व्वन्य वनय क्या चानि म्बखु सोम्बरिम सवाब  
 युस ग्वनाह ज़ांह कोर नु तेंथ्य बूलुन सज़ा  
 वुछ थोवुन प्यतरुन व्वं 'कंवलस' बॅल्य अज़ाब  
 आस कथ बॅसती बदन रतु दौव्य गव  
 शीशि दिल ह्यथ छुस सॅगिस्तानस अंदर  
 लोलु बुत 'कंवलस' छु रेहनावान वोजूद

बस यिहॉय मॅसती छे मस्तानस अंदर

दज़ुवुन वोजूद मसती हुंदिस फ्रेमस मंज़ बंद कॅरिथ छु कंवल शीशिविस  
 दिलस चूर गछनु निशि बचॉविथ मस्त रोज़नुच कूशिश करान। तेंती छु बेहाल  
 ज़मानु तु खुदी यिथु कॅन्य व्यछुनावान :

येति आसि ख्वदॉई धारन मॅल्य, येति आसि थेकुन तकदीर मत्यो

येति येछि नु 'कंवल' ज़ांह सॅजदु कॅरिथ मंदुछावुन प्रानु ज़मीर मत्यो

छेकरस वातनावु बु अज़ीम ग्वनमातु सुंद पनुन म्बखसर जॉयिज़ु येमि

शारु सुत्य अंदः

तिमन पोशि बागन दिवय चानि वसलुच

मगर दूरिरुक्य दूह निबावुन्य छि 'कंवलस'

वोजूदुक्य सियाह खानु वोलेन कोतामथ

दिलुक्य चॉग्य ज़ॉलिथ सजावुन्य छि 'कंवलस'

रोशन लाल 'रोशन'

### वाख गोछ गरु गरु वातुन

देवनागरी लिपि मंज़ छु कौशुर परुन सॅहल। कौशुर परनु खौतरु छे दिलचस्पी  
 बडावुन्य तु बरकरार थावुन्य ज़रूरी। अमि खौतरु हेकि वाख अख अँहम वसीलु  
 बॅनिथ। यि गोछ सारिनुय गरन मंज़ वातुन। कौशिर ज़बान छे सॉन्य प्रज़नथ,  
 असि छे यि कुनि ति सूरतस मंज़ कौयिम थवुन्य। वाखु खौतरु सूज़िव तु  
 सोज़नॉविव चंदु। वाख-परिवारस दिथिव वुसजार।



## खबर नाम

### बावु पोश

यि छे दूखुच कथ जि नामावार कौशिर्य अदीब, शौयिर तु लिखौर्य सयिद रोसुल पौपुर गयि ४ मई २०११ दूह स्वर्गवास। तिमव छे कौशरि ज़बॉन्य मंज़ लगबग ३० किताबु लेछमचु यिमन मंज़ छे शौमिल शौयरी सौबरनु, एसे सौबरनु, तहकीकी तु तनकीदी मज़मूनन हुंज़ु किताबु, तु कॅह मोनोग्राफ। यिमव छि तरजमु ति कॅर्यमुत्य। यिमव छु कौशरि अदबुक्यन अलग-अलग सिंफन पेट मज़मून लीख्यमुत्य, तु वारयाहन किताबन हुंघ तबसरु ति लीख्यमुत्य। कौशरि अलावु ऑस्य यिम उर्दू ज़बॉन्य मंज़ ति लेखान। यिमन ओस साहित्य अकादमी हुंद यनामु म्पूलमुत। कौशरिस मंज़ रोज़ि यिहुंद द्युत हमेशु याद।

यिम ऑस्य वारयाहस कालस शीराज़ (कौशुर) रिसालुक्य एडिटर ति रूद्यमुत्य। यिहुंदिस गुज़रनस पेट छु वारयाहव कौशरेव अदबी अदारव तु बडेव-बडेव अदीबव तु ग्वनमातव दूवख बोवमुत। वाख परिवारु तरफु छि ऑस्य यिमव बावु पोश पेश करान।

### सैंटर फार कश्मीरी लैंगवेज लिटरेचर ऐंड कल्चर (अभाकास)

कौशीरि नेबर कौशरि ज़बॉन्य, अदबस तु सकाफतस वुसजार तु पोछर दिनु खौतरु आव अभाकस कि तरफु सैंटर फार कश्मीरी लैंगवेज, लिटरेचर ऐंड कल्चर परुस दिलि मंज़ कौयिम करनु। यि सैंटर छपायि कौशरिस अदबस सुत्य वाबस किताबु देवनागरी लिपि मंज़। यिमु किताबु यिन द्रेबनागरी लिपि मंज़ तैहंदि खौतरु छापनु यिम नु फारसी-उर्दू लिपि ज्ञानान छि। यिमन किताबन मंज़ आसन लल वाख, शेखु श्रुक्य, लीलायि सौबरनु, अफसानु सौबरनु वग़ोरु शौमिल।

सैंटर करि कौशरिस पेट सेमिनार तु वर्कशाप। देवनागरी लिपि मंज़ लेछमचन किताबन पेट दियि मास्टर ज़िंदु कौल यनामु।

कौशरि ज़बॉन्य, अदबस तु सकाफतस पेट बनावि अख ऑनलाइन एंसाइक्लोपीडिया। येमिच कॉम शरू छे सपुज़मुच।

सैंटरु तरफु आव 19 मार्च 2011 दूह ललदेद सैंटर, पम्पोश एंक्लेवस मंज़ अख सिम्पोज़ियम करनु यथ मंज़ कशीरि नेबर कौशरि ज़बान, अदब तु सकाफत



जिंदु थावनु खॉतर दुशवारियन पेट बहस आव करनु तु यिम दुशवॉरियि दूर करनु खॉतर आयि तजवीज़ पेश करनु।

यथ विचारगोष्ठी मंज़ यिमव पनुन्य खयाल बाँव्य, तिमन मंज़ आँस्य शॉमिलः डॉ० शेशि शेखर तोषखानी, डॉ० मोहनलाल सर, विजये साकी, बृजनाथ बेतान्ब, बाल कृष्ण संयासी, ए ऐन कौल साहिब, अलका लाहोरी, डॉ० रमेश रैना, मोती लाल कौल, तु प्रो० चमनलाल सपरु। सदारत कॅर श्री महाराज कृष्ण काव साँबन, खसूसी मेहमान आँस श्रीमती पदमा सचदेव, तु मेज़बान आँस्य डॉ० रूपकृष्ण भठ। वारयाहव न्युव ब्रहसस मंज़ हिसु। सेटर करि यिछु विचार गोष्ठी ब्रॉ कुन ति।

### सेंटर फार कश्मीरी लैंगवेज लिटरेचर एंड कल्चर (अभाकास) फंड

सेंटर फार कश्मीरी लैंगवेज, लिटरेचर एंड कल्चरचि कारकरदगी बडावनु खॉतर आव अख पब्लिक फंड कॉयिम करनु। प्रो० बृज बी काचरु साँबन, यिम युनिर्विसटी ऑफ इलिनाय मंज़ एमेरिटस प्रोफेसर छि, दित्य अमि खॉतर रु० 50,000 (पंचाह सास रोपयि)। अँस्य छि तिहुंद्य स्यठा शुक्रगुज़ार। अँस्य छि सारिनय अपील करान जि तिम ति दियिन अमि खॉतर मदद। कुल राशि हुंद तफसील छु यिथु कुन्यः

1. प्रो० बृज बी काचरु रोपयि 50,000 अप्रैल 2011
2. प्रो० ओमकार कौल रोपयि 5,000 अप्रैल 2011

अँस्य छापव तफसील ब्रॉह कुन ति।

### स्व० सर्वानन्द कौल प्रेमी सुंद शहीदी दोह

जम्मू एंड कश्मीर कल्चरल अकादमी कॅर कौशरि ज़बॉन्य हुंदिस अँकिस नामवर अदीब तु समाज सुधारक पं० सर्वानन्द कौल प्रेमी सुंदिस 21 हिम वरी शहीदी दोह किस यादस मंज़ 1 मई 2011 के ऐल सहगल हालस मंज़ जमि अख तकरीब। यथ मंज़ तिमन बावु पोश पेश आयि करनु। अथ मंज़ कॅर वारयाहव कौशरेव कलमकारव शरकत। सरकॉर्य अदारु तरफु आयि शायद यि ग्वडुनिचि लटि तंदिस यादस मंज़ यिछि तकरीबि हुंद संज़ करनु।



## डा० चौधरी संज नॅव किताब

जम्मू कश्मीरक गवर्नर श्री ऐन ऐन वोहरान वॅर डॉ० के एल चौधरी संज किताब Homeland after Eighteen Years जम्मू क्लबस मंज ८ मई २०११ दूह रिलीज़। किताबि पेट आयि जु तनकीदी पर्च परनु। सदारथ वॅर डा० रतनलाल शांत साँबन। किताबि पेट आयि खुलु दिलु तौरीफ करनु। यथ मोकस पेट ऑस्य वारयाह मुकौमी अँदीब तु दौनिशवर मूजूद। डा० चौधरी छि अंग्रीज़ी ज़बॉन्य मंज लेखान। तिहुंजु जु किताब छे ब्रौह ति छपेमचु तु अँकिस किताबि पेट छुख जम्मू कश्मीर अकादमी हुंद यनामु ति तोरमुत।

### तुहुंद वनुन

१. “बु छुस वाख परान। ग्वडु ग्वडु ओस परनु मुश्किल बासान, व्वन्य छु सहल। मे छु व्वन्य कॉशरिस मंज लेखुन ति शरू कोरमुत। मे छे दिलचस्पी लुकु अदबस सुत्य। मे निश छे अथ मुतलख कैह किताब ति। बु सोज़ोवु जलदुय कांह लेख छापनु खौतर।”

एम के भट, द्वारिका, दिल्ली

२. “मे वुछ वाख २२ अँकिस रिश्तदारु सुंदि गरि। मे दिच अथ पेटय पेटय नज़र तु आम स्यठा पसंद। मे पॅर दीना नाथ नॅदिम संज नज़म बडु शोकु सान। मे आयि अफसानु ति पसंद। बु सोज़ु अमि खौतरु चंदु। यि गछि प्रथ कॉशरिस गरस मंज आसुन। ल्वकुट्य शुर्य ति ह्यकन यि आसाँनी सान पॅरिथ। व्वंती छम ज़ि अथ मंज गछन प्रानि मशहूर लीलायि तु बाँथ ति छापुन्य।”

सरला रैना, जनकपुरा, नई दिल्ली।

३. “वाख छि अँस्य ग्वडु पेटय परान। यि छु दूह खोतु दोह तरकी करान। मे आसु कैह नज़म अमि खौतरु सोज़मचु अमापोज़ तिमु छपेयि नु। तिम आसु मे जोम सोज़मचु। शायद आसन नु तोहि निश वाचमचु। बु सोज़ोवु बेयि। बु छुस नु कांह बोड शॉयिर। मे छु बस लेखनुक शोख।”

राजेश कौल, चंडीगढ़।



४. "...बु ओसुस वारयाह कालु प्यठु सोंचान ज़ि बु ति लेखु कौशिरिस मंज़ केह। मे पेयि अज़ अँकिस अंग्रीज़्य पौठ्य लीखिथ पीसस प्यठ नज़र। मे सूंच बु करु अथ तरजमु।

बु छुस अंग्रीज़्य लेख ति सोज़ान तु अम्युक कौशुर तरजमु ति। मे छि व्वेद जि त्वहि यियि पसंद। फकत तुहुंद नेक खाहान।”

**माहराज कृष्ण काव, पम्पोश एंक्लेव, नई दिल्ली**

५. “ ....स्यठाह ख्वश सपदुस “वाख ”( जनवरी-मार्च) वुछिथ। नँविस आकारस मंज़ छु यि रिसालु ज़्यादय पहन मौर्यमौद बन्योमुत। मवाद छु मँयौरी, कुसुमवार तु रँछरुन लायख। येमि बापथ अम्युक यि किताँबी आकार ति बिलकुल मोज़ून छु। मगर रिसालु ज़न बास्योम जुवु किन्य हना लागर पहन। ति गव म्वचर छुस कम पहान, येमि बापथ सानि समाजिक्थन कलमकारन पनुनि माजि ज़ेवि हुंज़ कल फिकिर बडावनुच छि स्यठाह तौंजिली। मे छि पूर व्वेद जि तिम दिन ओर कुन द्यान तु माजि ज़ेवि बरन वछि वौलिंजि लोल तु त्वहि दिन बर पूर अथवास।

तुहुंद रुत काँछन वोल”

**डा० ए० एन० प्रशान्त**

६. “... तुहंदिस इदारतस तहत कोर वाखन नौव काड तु प्रोवुन नौव जुव जेतु। व्वेद छम यि रफतार रोज़ेस जौरी। मेन्य अफसानु छौपिवु तोहि ‘ख २१ तु २२ हस मंज़। बु छुस तुहुंद शुकरगुज़ार। मगर वोटुम नु कांह योर। अज़ चुस ब्याख अफसानु सोज़ान। अगर लिखारेन हुंद पूर पता तु मोबाइल नम्बरा ति दुरुज कौरिहिव जानु गयाव। तुहुंद खौरखा।

**अवतार हुगामी, शालीमार गार्डन, साहिबाबाद, यू पी.**

( बु छुस सारिनुय हुंद मशकूर यिमव पनुन्य राय सूज -एडिटर।)



## अख तहकीकी सवाल

यि छे खोशी हुंज कथ जि कॉशरि ज़बॉन्य मंज़ छु अख अदबी रिसालु *वाख* देवनागरी लिपि मंज़ नेरान। बु छुस यछान जि अथ मंज़ गछन कैह मज़मून कॉशरि ज़बॉन्य पेट ति छपुन्य। या ज़बॉन्य मुतलख मसलन पेट बहस सपदुन।

लिसॉनियॉती लेहाज़ु छे कॉशरि ज़बान स्यठा दिलचस्प। आर्य ज़बानन मंज़ छे अथ अख खास जाय हॉसिल। तिक्याज़ि सिरिफ छु कॉशरि ज़बॉन्य मंज़ुय जुमलस मंज़ हमेशु क्रिया दोयिमि जायि यिवान।

अमि अलावु छे अमिच जुमलु बनावठ बाक्य ज़बानव खोतु बिलकुल अलग। मे गयि यथ ज़बॉन्य सूत्य दिलचस्पी पाँदु स्यठा ब्रौह। मे ल्यूख ग्वडु अख तहकीकी मज़मून अमिकिस लफज़ु.तरतीबस पेट युस *इंडियन लिंगविस्टक्स* जरनलस मंज़ १९७६ ई० मंज़ छप्योव। अमि पतय सपुद म्योन राबतु कैचन कॉशिरेन स्कालरन सूत्य यिम कॉशरि ज़बॉन्य पेट कॉम ऑस्य करान। यिमन मंज़ ऑस्य शॉमिल ओमकार कौल यिम तमि सातु पटियाला नौकरी ऑस्य करान। ओमकारन तु मे लॉज कॉशिरि ज़बॉन्य पेट यिकवटु कॉम शरु करुन्य। असि लीख्य वारयाह मज़मून यिम वारयाहन जर्नलन तु किताबन मंज़ छपेयि। अज़कल छि ऑस्य पनुन्यन ताज़ु मज़मून हुंज सौबरन छापनु खॉतरु तयार करान।

अज़कल छुस बु अँकिस दिलचस्प मोज़ोहस पेट कॉम करान। कॉशरिस मंज़ छि **रुद त्रोवनस**, **ज़ांड तुजिनस** हिशि जुमलु -बनवटु मेलान। यिमन मंज़ छु कर्ता अमूर्त। बु छुस **ख्योन** क्रियायि सूत्य वाबस मिसालु छांडान, मसलन **मार ख्योन**, **टास ख्योन**, **दब खेन्य**, वगॉरु। बु रोज़ु मशकूर तिमन *वाख* परन वाल्यन हुंद अगर मे तिम यिछु मिवसालु जुमलु वरताव हेथ सोज़न।

**पीटर हुक**

Charlottesville (VA) USA

peter.e.hook@gmail.com



## लेखन वॉल्य

श्री रविंद्र रवि 13/497, लोधी कालोनी, नई दिल्ली 110003.

श्री प्रेम नाथ शाद, जम्मू।

डॉ० अमर मालमोही, पुणे।

श्री महाराज कृष्ण काव, बी ३६ पम्पोश एंक्लेव, नई दिल्ली 110048.

डॉ० रतन लाल शांत, 904 सुभाश नगर, जम्मू 180005.

श्री हृदय कौल भारती, अहमदाबाद।

श्री त्रिलोकीनाथ धर 'कुन्दन, बैंगलोर

डॉ० ओमकार कौल, सी-13, ग्रीनविव अपार्टमेंट्स, 33 सेक्टर 9, रोहिणी,  
दिल्ली 110085

श्री शंभुनाथ भट्ट हलीम, आई-1, कश्मीरी अपार्टमेंट्स, पीतमपुरा, दिल्ली 110034

श्री बाल कृष्ण संयासी, 276, MIG Flats, Southend Apartments, Pulprahad  
Pur, नई दिल्ली 110044.

श्री मखन लाल 'कंवल' पुरखू कैप, जम्मू।

श्रामती सुनीता रैना शालिमार गार्डन एक्स घ, साहिबाबाद 201005.

श्रामती नसीम शफाई, विमेन का लिज, नवाकदल, श्रीनगर।

श्री जगन नाथ सागर, विनायक नगर, मुट्ठी, जम्मू 181205.

डॉ० रोशन सराफ रोशि रोशि जम्मू।

डॉ० ए एन प्रशांत, एफ-315, नेगौर एनक्लेव II, C-348 शालिमार गार्डन एक्स II,  
साहिबाबाद 201005.





डॉ० बी० के० मोज़ा, कोलकता।

श्री रोशनलाल रोशन, 469 सेक्टर 4 वैशाली गाजियाबाद 201010

डॉ० पीटर हुक, 1940 माइक्ल प्लेस, Charlottesville (VA) USA




# CKLLC Symposium on Kashmiri





*With Best Compliments*

*From*



## **SUMO GROUP OF COMPANIES**

### **SUMO INTERNATIONAL PVT. LTD.**

425, Gemstar Commercial Complex,  
Ramchandra Lane Extn., Kachpada,  
Malad (W), Mumbai - 400 064  
Tel.: 0091 22 28449341 / 42  
Fax: 0091 22 28819841  
E-mail: [sumo@sumointl.com](mailto:sumo@sumointl.com)  
Web: [www.sumointl.com](http://www.sumointl.com)

### **SUMO HI-TECH MARKETING PVT. LTD.**

422-424, Gemstar Commercial Complex,  
Ramchandra Lane Extn., Kachpada,  
Malad (W), Mumbai - 400 064  
Tel.: 0091 22 42108888  
Fax: 0091 22 42108899  
E-mail: [admin@sumohightech.com](mailto:admin@sumohightech.com)  
Web: [www.sumohitech.com](http://www.sumohitech.com)

### **PCL-SUMO AIR TECHNOLOGY PVT. LTD.**

425, Gemstar Commercial Complex,  
Ramchandra Lane Extn., Kachpada,  
Malad (W), Mumbai - 400 064  
Tel.: 0091 22 32108578 / 32107242  
Fax: 0091 22 28819841  
E-mail: [info@pclsumo.com](mailto:info@pclsumo.com)  
Web: [www.pclsumo.com](http://www.pclsumo.com)

Printed & Published by Sh. Shiban Dudha, for and on behalf of All India Kashmiri Samaj from  
D-90, Sarojini Nagar, New Delhi - 110023 Ph.: 24677114 E-mail: [aiksnd@rediffmail.com](mailto:aiksnd@rediffmail.com)

Printed by : Jeffry and Bell Pub., Printers Ph. : 22047667

E-mail : [jeoffrybellpublishers@hotmail.com](mailto:jeoffrybellpublishers@hotmail.com) Editor : Omkar Kaul

Price : Rs. 30/-

CC-O. Agamnigam Digital Preservation Foundation, Chandigarh